


國學基本叢書  
潛研堂詩文集  
四



上海图书馆藏书



A541 212 0006 16348

~~175971~~

書叢本基學國

集文詩堂研潛

(四)

著昕大錢

行發館書印務商

上海圖書館藏書

僕自成童時喜吟詠。而父師方課以舉業。不得肆力於詩。年二十以後。頗有志經史之學。不欲專爲詩人。然是時客吳門。與禮堂。蘭泉。來殷。諸君子日唱和。所得詩亦漸多。旣而遂以有韻之文通籍。及成進士。承乏詞垣。十有餘年。恭遇天子右文。制作明備。每大典禮。輒有經進之作。其閒扈從屬車者。再廣和之作。往往盈帙。又嘗奉命典試山東。楚南。浙西。輅車所至。紀天時。述土俗。山水之明秀。民物之繁庶。皆得寓之於詩。獨恨才力緜弱。意有所及。筆不能至。又未嘗不泚然汗下也。昔揚子雲默而善著書。兼工作賦。蓋才之大者。能兼衆人之長。僕拙劣無似。在京都退食之暇。惟以經史自娛。討論異同。貫串古今。丹黃不去手。旣專心於著書。故不常作詩。偶有所作。亦復不工。譬之吐絲之蠶。不能吟風。才力有限。從吾所好可矣。歲丁亥。將乞假南回。檢囊中詩藁。得九百有七篇。其中稱意之作。什不得一。念其嘗耗日力於此。乃鈔而存之。以當敝帚遺簪之數。非欲出以示人也。竹汀錢大昕書。

予旣以有韻之文。受知聖明。然性不喜噉名。檢點篋中所作。亦無甚稱意者。故從未敢刻以問世。而江南書肆選刊近人詩。往往濫收拙作。眞贋相半。偶有一客過予。誦所見佳句。聽之愕然。謝以非某作句。亦殊不佳。客慙然而退。予於詩雖非專門。而寸心得失之故。要自知之。固不欲掠它人之美。亦豈可以惡詩冒爲己有。茲取前後所作鈔爲一集。不敢自以爲是。亦欲存廬山之眞面云爾。庚寅歲五月丁丑朔大昕書。

# 潛研堂詩集目錄

## 卷一

擬古七首

游橫雲山

讀任昉傳

春雪和東坡韻二首

徐毓洲讀書僧舍集杜工部句寄之四首

田家雜詩五首

金陵詠古八首

訪學成和尚集少陵句

讀曲歌

詠史雜詩三十首

短歌行

雉子班

五雜組八首

京口

登燕子磯

過明孝陵

京口晚眺集唐人句

席上贈王鳳岡顧培穎兼

懷王鳳喈在都下

詠史

少年二首

過昭慶寺訪喆公不遇

萊陽二姜先生祠

木棉花歌

宋徽宗畫龍歌

宜興道中

卷二

竹枝詞和王鳳喈韻六十首

望僊橋

滄浪亭

擬田家詞

寄邵高二秀才

訪顧上舍邨居

題爻吉兄赤壁圖二首

擊筑行

閏七夕 戊辰

漫成六首

用昌黎會合聯句韻送王良齋先生歸海

虞

聞金川平定喜而有作四首

秋柳次韻

歸家二首

舟行

遠別離

尙湖夜泊

秋日舟行

九日同潘璜谿凌叔子張策時王蘭成作

雪霽

贈翁朗夫徵君

春日閒居

金山

永濟寺

雨花臺

懷曹來殷二首

懷王蘭成

憎蠅

別席

同王琴德曹來殷沙斗初張崑南汎舟游

靈巖山寺

暮宿木瀆吳企晉園亭

游天平山歷龍門白雲泉蓮花洞諸勝

訪上沙陸氏園居

三十三山艸堂圖歌爲霽堂徵君作

送吳企晉游黃山

陽湖雨泊同諸君分韻得桃字

溧陽道中

金陵寄內

卷二

御試賦得指佞艸

奉旨特賜舉人授中書舍人紀恩二首

吳越宮詞十首

王次山先生輓詩二首

呈沈歸愚先生三首

五月

邵伯湖

寄內

題翁霽堂徵君秋林覓句圖

憶內六首

辛未七夕用李義山韻

淮陰釣臺

淮安弔褚不華

東軒相國七十壽詩二首

清口

清河道中

中河

邳州

與周西陳孝廉分賦漢陵得長陵茂陵二

首

元史雜詠二十首

冰茶聯句

移寓

兩頭織織詩二首

山行

青龍橋

香山月夜

靜宜園直廬卽事二首

贈金鍾越孝廉三首

送江蔗畦明府之官湖湘

題諸艸廬贊善高松對論圖

題曹夫人玉映樓詩集二首

題王琴德三泖漁莊圖

題王受銘比部龍湫宴坐圖

送翟晴江同年還杭州

聖駕東巡恭謁祖陵禮成恭紀

送吳挹楓

題同年范蘅洲比部詩卷四首

題杜太守甲相馬圖

平定準噶爾告捷禮成恭紀一百韻

## 卷四

丙子春帖子詞

題李西華給諫賞番圖六首

題吳觀山編脩洗竹圖

移寓珠曹街與禮堂夜話五首

題裘漫士少宰苑東寓直圖七首

恭和御製懷柔縣元韻

恭和御製遙亭行宮對雨元韻三首

恭和御製出古北口詠古元韻

恭和御製至避暑山莊卽事元韻

恭和御製熱河啓蹕之作元韻



恭和御製山店元韻

恭和御製都爾伯忒台吉伯什阿噶什來

觀封爲親王詩以紀事元韻

恭和御製入崖口元韻

恭和御製雨獵元韻

恭和御製霜元韻

恭和御製行圍卽事元韻三首

恭和御製蕃劍行元韻

恭和御製晚荷元韻

恭和御製宴土爾扈特使臣元韻

恭和御製雪元韻三首

恭和御製允南省諸臣之請於明春恭奉

皇太后再舉時巡詩以紀事元韻

恭和御製固爾扎廟火用唐韓愈陸渾山

火和皇甫湜韻并效其體之作

帳房四首

送蔡葛山少司寇請養歸里二首

蔡少司寇觀海圖

自珠巢街移居宣武門外題壁

金鍾越秋江擁權圖

送座主海寧相公予告歸里卽次留別元

韻六首

海寧陳文勤公輓詩

題盧紹弓編修檢書圖

送毛伊人檢討還萊州五首

石鼓

送禮堂學士典試福建

奉命典試山左出都述懷

自良鄉南行遙望大房諸山口占

涿州二首

卽目

白溝河

過河間城外居民有種棉花者

贈梁秀才用梅

梁秀才以秋碧堂帖見貽賦答

東方朔

匡衡

答醫者

多病

題張憶孃簪華圖四首圖藏繡谷蔣氏

## 卷五

回部蕩平大功告成恭紀一百韻

己卯除夕

初春懷鄉雜詠四首

題倪敬堂同年西谿探梅圖三首

恭和御製三月朔日御殿定邊將軍兆惠

副將軍富德等率成功諸將士朝謁詩

以紀之元韻

恭和御製上巳日凱宴成功諸將士元韻

八首

恭和御製塞宴四首

恭和御製行圍元韻二首

恭和御製哈薩克使至俾觀圍元韻

九日同習庵舍人叔華上舍晦之弟游城

南登陶然亭二首

送孫勛堂之官皖江

答施鐵如上舍見贈之作用山谷東坡贈

答詩韻二首

冬至齋宿題壁三首

正月二日夜雪用東坡聚星堂韻

恭和御製恭奉皇太后謁泰陵因至五臺

瞻禮卜吉起程得詩八韻

恭和御製過蘆溝橋元韻

恭和御製良鄉行宮晚坐元韻

恭和御製見新耕者元韻四首

恭和御製直隸總督方觀承奏報易州等

處得雨元韻

恭和御製永慕齋疊舊作韻

恭和御製謁陵禮畢載啓西巡瞻彼臺山

祝茲介祉元韻

恭和御製曉煙元韻

恭和御製日日元韻

恭和御製曉行卽景元韻四首

恭和御製曲逆故城元韻二首

恭和御製題愜適齋元韻

恭和御製復雨元韻

恭和御製降旨免宣化府屬民欠詩以誌

事元韻

恭和御製雪元韻四首

恭和御製停蹕元韻

恭和御製晴元韻

恭和御製阜平道中作四首

恭和御製三箭山疊舊作元韻

恭和御製射虎川元韻

恭和御製自長城嶺至臺懷再依皇祖元

韻

恭和御製殊像寺元韻

恭和御製顯通寺卽事元韻

恭和御製羅漢坪元韻

恭和御製眞容院再題元韻

恭和御製閱武元韻

恭和御製棲賢寺元韻

恭和御製降旨免山西前歲民欠詩以誌

事元韻

恭和御製游千佛洞得古體四十韻

恭和御製題陳規守城錄元韻

恭和御製題宋中興聖政艸元韻

恭和御製經畚書屋卽事元韻

恭和御製游獅子園憶舊元韻

恭和御製鹿角椅元韻

留王快鎮座主少宗伯介公有詩紀事次

和

三月朔日疊前韻

憶五臺山三疊前韻

三月三日自曲陽入行唐境途中杏花盛

開四疊前韻

座主宗伯公折杏花一枝插行帳茶鐺中

至晚盛開有詩五疊前韻奉和

奉酬宗伯公見贈六疊前韻

真定府隆興寺七疊前韻

游蓮花池八疊前韻

懷鄉九疊前韻

寄題雪浪石用東坡韻

送李菑晚進士東歸六首

中秋後五日同錢坤一侍講王琴德舍人

曹來殷蔣漁邨二庶常過大慈延福宮

苦雨

題韋慎旃舍人翠螺讀書圖

題汪對琴博士後譚蓺圖二首

過歸義廢寺

移寓二首

盧端臣先生招飲卽席賦呈

## 卷六

奉命典試湖南出都宿良鄉縣有作二首

宏恩寺

督亢陂

道中卽事

雨宿定興二首

輿丁

曲逆詠古

定州道中

雪浪石和東坡韻

真定

登隆興寺大悲閣周覽隋宋元碑刻晚宿

雨花堂對月得詩七首

望華塔寺

戲題趙州茶棚

柏鄉謁漢光武廟

題圖津庵用壁閒梁棠邨胡南茗湯西崖

諸公倡和元韻

鄴中詠古八首

苦熱

自鄭州入新鄭道中作

讀左氏傳

過許州追悼亡友周西隱刺史四首

望中嶽

許昌詠古

邨行二首

聞蟬

雨宿蔡寨邨舍

田家

雨止

曉行

與王惺園修撰對奕

確山道中

渡淮

山行二首

自信陽入平靖關六首

七夕宿平靖關

自應山入安陸縣二首

雲夢縣

行連岡開卽目

詠道中所見艸木八首

武昌

秋花

邨中記所見

萬松岡二首

蒲圻山行

高嶺舖

口占二首

## 卷七

宿萬年庵用壁閒吳文恪韻

將抵巴陵二首

岳陽樓

曉行二首

長沙

賈太傅宅

東長沙張慧川明府二首

屈賈二大夫祠

中秋試院對月

試院示同事諸公二首

楚南士子場後以試文謁學使吳雲巖前

輩雲巖決其必售者五人曰丁姓丁正

心張德安石鴻翥陳聖清比揭曉則五

人皆中式而五魁之中得其四焉楚人

傳以爲盛事雲巖有詩因和其韻

吳雲巖學使訂於重九日載酒嶽麓登高

兼訪山長劉孟調前輩以風雨不果往

次日孟調以詩見寄次韻奉答

嘲道旁楓樹

代楓樹答

予既作詩代楓樹解嘲次日山行楓林有

數株先紅者復成是什

重過武昌

登黃鶴樓懷翁覃谿中允彭六一編修二

首

田家

德安道中

楊忠烈公漣祠

入平靖關

信陽

確山

曉行口占

遂平

鄆城

臨穎

鄭子產祠

鄭州道中

渡河

曉行口占二首

湯陰

韓魏公祠

渡漳水

晚抵邯鄲

食客行

沙河道中

定州道中三首

晚行清苑城外見月二首

寄楚南諸同好二首

還京述懷

江明府于九拓石鼓山劉莘老題名見貽

并索詩

題袁蕙纒孝廉南湖艸堂圖

擇石宮庶庭前叢菊盛開招諸公同飲賦

詩並作墨菊長卷出以見示并屬題

送吳二匏舍人南還四首

五塔寺

萬壽寺

昌運宮

雙林寺

哭吳雲巖侍讀

題韋鐵夫授經圖遺照

獐酒詩爲查恂叔太守賦

題張右丞秋原放牛遺像

題陶吾廬前輩歸去來館圖

平確齋自臨川令被薦入覲賦詩奉柬三

首

送商寶意太守之官雲南

乾隆二十八年起居注書成詣乾清門入

奏恭紀六首

周稚圭同年觀察粵西

門神

火判

題曹檀潛先生柳汀觀稼圖

卷八

奉命典試浙江作三首

出廣寧門

趙北口

毛茛里

董子故里

周亞夫祠二首

途中偶作



卽事

晏城

將至開山鋪

長清山行

登岱四首

程蘊山明府招飲白鶴泉上

羊流店謁羊太傅祠

宿遷道中

雨中過永濟橋

隄上

清江浦懷舊

漂母祠

題淮陰釣臺二首

董江都祠和冰持前輩韻二首

同冰持前輩登金山次韻八首

游寄暢園

虎邱

山塘

游上方山

石湖

汎澹臺湖

入德清縣界有橋曰望僊喜其名與吾鄉

同作詩紀之

初到杭州

試院戲題三首

食筍

填榜四首

汎河

九日浙中當事招集小有天園登高卽席

得句

表忠觀

岳忠武墓四首

浙闡藏事蒙恩給假省親恭紀四首

過青駝寺遇雨

口占

曉行

望岱宗殘雪

山行

十月二十八日河間道中遇雨

雪後過鄭州

趙北口殘雪

琉璃河

題查恂叔太守榕巢圖

漫成

丙戌禮闈卽事用壁閒韻呈望山相國漫

士少司農鳧川少宰及同分校諸公四

首

題邵蔚田侍讀收綸圖四首

題趙編修鷗北耘菘圖

冬至後六日錢籜石少詹招同查儉堂太

守紀心齋侍御程魚門舍人畢秋颿侍

講曹竹虛編修小飲分韻予得日字

送趙雲松出守鎮安二首

謝文節橋亭卜卦硯歌

病起二首

人日同王琴德朱竹君曹來殷畢湘蘅陸

健男登法源寺後閣晚飲琴德寓齋用

東坡廣陵會三同舍故事各以字爲韻

予得曉字

舟行偶占二首

衛河

臨清

阜河

宿遷

見道旁艸舍戲作

汎光湖

冬至京口阻淺

偕蔣春農舍人游甘露寺

遣懷雜題九首

八音歌效黃山谷二首

## 卷九

到家作

虎邱追和清遠道士韻同陳藥耘作

和陸魯望補沈恭子詩韻

第三泉

游獅子林

鱗諸巷

虎邱觀玉蘭三首

同陳藥耘宿陸筱歛荷風竹露艸堂

同筱歛藥耘步至湖上汎舟登孤山放鶴

亭

上巳日游靈隱諸山

飛來峯

湖上雜題二首

湖上寓樓

葛嶺

葛嶺詠古二首

鳳凰山二首

水樂洞

三生石

重游飛來峯登絕頂壘前韻

韜光庵用白樂天招韜光禪師韻

神尼舍利塔

僧房偶題二首

學士橋

寶成寺觀元人所鑿麻曷葛刺佛石像次

藥耘韻

寶石山次韻藥耘

游吳山紫陽洞

湖上對雨

連日徧游湖上諸刹有懷古德各題一絕

虎跑寺寰中

法相寺行修

聖果寺文喜

靈隱寺慧理

鳳林寺道林

瑪瑙寺智圓

龍井元淨

智果寺道潛

歸舟口占

題王麓臺蘇齋圖卽用卷中查初白先生

韻

題王石谷蘇齋圖

題繡谷牡丹圖二首

家中牡丹

讀漢書六首

贈張丈擔伯

王彙英家藏古錢歌

題姚和伯射獵圖三首

登馬鞍山

題王未巖畫三首

崑山學宮石

題西莊丈室散花圖五首

邵桷亭築小樓題曰梧巢作詩四首諸同

人多有和章邀予繼和四首

讀蜀檮杌畢得絕句八首

外舅王虛亭先生輓詩二首

卷十

京口阻風

榜人謠

渡黃河四日入邳州境

昭陽河三首

謁先賢仲子祠二首

濟寧

杜文貞公祠

南旺

分水廟二首

衛河

古詩四首

楊邨道中

題王雅宜借銀券

題沈東田觀察小像

題箕僊畫爲曹慕堂給諫作

臘八日同曹習庵編修吳白華侍讀陸耳

山宗人集趙實君齋消寒小飲卽席口

占索和

翼日諸公和詩未到疊前韻催之

同人約爲詩會遲而未果習庵疊前韻見

示依其數答之二首

題寓齋壁疊前韻二首

再題寓壁仍疊前韻四首

柬習庵二首

曹劍亭刑部和韻見贈卽奉答

二十二日吳杉亭舍人招同褚鶴侶刑部

蔣漁邨編修陳寶所給諫小飲疊前韻

答嚴跂堂和韻見贈之作二首

己丑除夕疊前韻四首

次韻嚴跂堂正月三日對雪

跋堂和予詩兼訂春游賦此答之

正月十九日同曹習庵編修張繡堂趙寶

君兩上舍游白雲觀次習庵韻

寶刀行送龔梧生同年之官黔中

送胡牧亭侍御南還

二月廿七日同慕堂給諫竹君學士伯思

戶部登陶然亭

哭翟舍人均廉二首

題候官林氏所藏漢甘泉瓦拓本

題吳香亭鴻臚古藤詩思圖

同曹慕堂給諫朱竹君學士陳伯思戶部

史文量孝廉曹申之上舍爲西山之游

出郊宿二老莊和竹君韻

張忠烈王輔墓

山行疊前韻二首

戒壇二首

和竹君戒壇讀遼法均大師碑因弔學士

王鼎三十韻

姚少師祠

夜宿潭柘寺用石刻金僧重玉韻

妙巖公主拜輓

僧房偶題

潭柘寺

三月廿二日同錢宮詹籜石紀太僕心齋

朱學士竹君褚學士左峨曹給事慕堂

馮刑部君弼入法源寺觀海棠偶見旁

院牆脚支豨方石有異撤而視之則遼

大安十年觀音菩薩地宮舍利石函記

也心齋有詩紀其事卽次韻

琉璃廠窰戶掘土得古墓棺槨朽盡而骨

法殊異視其誌石題云大遼故銀青崇

祿大夫檢校司空行太子左衛率府率

兼御史大夫上柱國隴西李公墓誌銘  
撰書人則不可攷矣督厥工部郎中孟  
君澔令改埋於故兆東二十步并其誌  
瘞之世遂無拓本李公之名不見於遼  
史因摭誌文大略作詩以遺攷古者

題候官林氏陶舫硯銘册子二首

送江于九之官安慶

游善果寺

法源寺看花

法源寺觀牡丹因懷琴德

題黃星槎所藏漢華山碑拓本

題惠松厓徵君授經圖

爲袁春圃給事題苦瓜和尚餘杭看山圖

題沈椒園前輩松亭讀易圖

病目廿二韻

贈伊宛中孝廉

鐙下作

圓桌

暖炕

羅兩峯鬼趣圖

# 潛研堂詩集卷一

## 擬古七首

亭亭孤生松。結根山之阿。干霄聳直幹。蔽日撐交柯。下有伏苓芝。上有蔦與蘿。手植自誰氏。云已千年過。幽人倚樹根。日夕常高歌。願爲歲寒期。相對鬱嵯峨。青青河畔艸。灼灼池中荷。顏色豈不好。秋深當奈何。龍門百尺桐。輪囷盈十圍。斲爲綠綺琴。緹以白玉徽。水流何洋洋。山高亦巍巍。鍾期顧我笑。一彈情以移。奈何舍我去。破絃不復揮。不惜絃斷絕。所悲知音希。郢人泣匠石。蒙莊感惠施。形存質已逝。千古同歎歎。涼風號寒蟬。蛩吟徹四壁。蕩子游不歸。空房愁思積。相對影與形。夢裏憶疇昔。可憐團圞月。獨似去年白。飛鴻從遠來。雙足纏匹帛。我欲寄之書。飛去杳無跡。君行作水萍。妾願作山石。萍飄無休時。石立終不易。挾彈少年子。杖劍羽林郎。大冠鐵鈇鉞。錦衣繡襦袴。出入衛承明。車騎何輝煌。晨興戒徒御。射獵南山陽。前驅戒驂耳。後隊走騶驪。蒼隼摩雲起。羅罽彌天張。獲禽亦無算。犒賞百千強。生飲黃獐血。分割元熊肪。西南羽檄馳。埃火通沙場。何不從軍去。勒銘麟閣旁。

快馬志千里。健兒思邊城。結髮隨驃騎。大小數十征。數奇不封侯。賣劍歸躬耕。昨朝聞點兵。投牒從軍行。據鞍左右盼。意氣猶飛騰。指揮捕生口。竟抵休屠營。一鼓俘名王。再鼓犁龍庭。下馬艸露布。勒作燕然銘。



勿使漢廷中。衛霍空留名。

鸞鳩搶榆枋。晨風飛北林。萬族各有托。志士豈無心。昔我同門友。佩玉紆朝簪。折簡亟招我。彈冠當及今。翩然掉頭去。高臥東山岑。石溜滴清籟。冰絃鳴素琴。元雲覆屋上。白雲停樹陰。日夕無一事。把酒聊酌斟。此樂當語誰。知音有向禽。

蓬海渺何許。三山環其中。十二樓五城。金碧敞琳宮。有何古僊人。長眉更方瞳。煮就五色石。攜取九節筇。朝馳閩風顛。夕宿扶桑東。路人不能識。或疑是韓終。我來長跪問。欲言心憂忡。願茲下方民。奄謝如秋蓬。願賜玉箱藥。兼之養生方。膚容切各各使老壽。年命無終窮。

游橫雲山

九峯如髻相連緜。橫雲秀色何便娟。怪石蹲立虎豹伏。老藤蟠屈蚪龍纏。懸崖十仞尤斗絕。穿雲欲上脚蹶躑。白浪層層雨後明。翠螺點點煙中列。問誰好事王與張。山有王徽齋張得天兩尚書別業誅茅小築添山房。飛泉百道鳴漣漣。修竹萬个陰蒼蒼。是時山中秋正暮。落葉荒榛踞微步。四山楓林滅沒閒。夕陽掩映紅無數。回看前峯雲往還。依稀蠟屐經過處。咫尺機山相對青。風流當日傲荒倉。早知入洛名爲累。何似長聽鶴唳聲。

讀任昉傳

太行何崔嵬。世路更嶄絕。樂安任公子。海內之髦傑。騎兵呼天子。文筆冠同列。咄嗟起風雲。朱紫出唇舌。冠蓋紛相望。坐上皆名哲。人稱龍門游。並集蘭臺轍。清潭劇夜分。開樽酒同啜。刻燭賦詩成。擊鉢響隨滅。數子皆南金。能令公喜悅。盛衰會有時。風花隨轉瞥。一麾新安守。高朋成永訣。投盡綠沈瓜。滿坐爲哽咽。門庭烏雀羅。琴書蠹魚齧。白楊冷蕭蕭。藐孤走霜雪。傷哉匹練裙。朔風凜以冽。當時把臂友。驕馬嘶金埒。揮手長揖去。夷然若不屑。嗚呼市道交。何異劍首映。所以朱公叔。長與故人別。

春雪和東坡韻

輕塵乍糝玉。纖纖料峭寒。威幾陣嚴。誰挽竹弓彈密粉。王叔明岱宗密雪圖以竹弓彈粉爲之盡傾滄海煮形鹽。披篔獨釣

迷江岸。授簡長吟側帽檐。頗恨春光勾勒住。金鉤嫩綠未舒尖。石曼卿早春詩。屬金鉤綠未回。

重閣何心閉宋纖。軸簾聊避朔風嚴。小兒任意裝獅虎。野老相過索米鹽。寂寞遙山遮翠黛。模糊破屋沒茅檐。一杯獨飲渾無賴。臘甕須探郭索尖。

徐毓洲讀書僧舍集杜工部句寄之

隱者柴門內。林花落又開。水深魚極樂。客散鳥還來。多病休儒服。相迎自撥醅。眼邊無俗物。隨意坐莓苔。用拙存吾道。幽偏得自怡。寬心應是酒。排悶強裁詩。野寺殘僧少。茶瓜留客遲。由來意氣合。步履向東籬。林僻來人少。邨花不掃除。長卿多病久。中散舊交疏。把酒宜深酌。新文尙起予。吟詩坐回首。日暮且踟蹰。

同調嗟誰惜。親情獨有君。優游謝康樂。俊逸鮑參軍。舍下筍穿壁。階前樹拂雲。幾時杯共把。水竹會平分。

田家雜詩

生世寡所諧。駕言返我廬。我廬亦何有。桃李三兩株。春過結實好。童穉來徐徐。攀條摘其實。果腹已有餘。食竟無一事。嬉戲聊相於。時復成謳吟。似言太古初。感此三歎喟。真意我不如。

朝驅黃犢出。暮驅黃犢還。豈不憚溽暑。力作忘其艱。昨宵甘雨至。溝水流潺潺。新苗出始齊。微綠生中田。且復牽黃犢。驅之浴前川。水淺不沒背。雙角隱見閒。桔槔亦不用。機心漸以閑。

小屋纔三椽。編茅以蓋之。老農八九家。卜鄰亦於茲。門戶同所向。酒食常分貽。雞犬各相識。棲宿無疑猜。禾黍既登場。相見多好懷。既念手足勤。還感雨露滋。有年君莫恃。當思無年時。

浮雲隨風遠。飄散何所之。逍遙十畝閒。終歲乃安棲。孺人提甕汲。稚子持釣歸。把酒共勞苦。無事心亦怡。曲池方繞舍。萍葉相因依。魴鯉游其閒。鱗鬣皆可窺。出入响以沫。人喧魚不知。卽此悟濠濮。當與莊惠期。鳴蟬識蚤晚。落木知炎涼。秋風歛以來。庭際生繁霜。刈稻既以了。官租早輸將。皤皤沮溺子。相逢阡陌旁。傾蓋無別語。但言耕與桑。不知誰賓主。揖讓久已忘。

金陵詠古

蔣山王氣黯無光。天塹休誇擅一方。鎖斷千尋燃烈炬。樓高百步簇危檣。紫髯像古荒原廟。青蓋風翻入

洛陽一自銜杯歌爾汝。曹劉事業總淒涼。

堂堂江左有夷吾。那向新亭灑淚珠。只怪諸君多譽賊。賴從元老未遷都。祖生擊楫猶吞石。謝傅圍碁亦卻苻。堪笑宋家修誓表。臨安得似建康無。

大廈還憑一木扶。哀劉駢首竟何辜。漫將腰扇誇寒士。無奈須眉不丈夫。眼作白虹終貫日。苔生黃石遽膺符。領軍腹大渾堪射。悔殺輕投金僕姑。

楊柳歌殘別苑聲。玉兒風貌正傾城。鳴雞埭遠迎鸞輅。射雉場開颺翠旌。豈有蔣王來左掖。只聽趙鬼誦西京。黃金此日真如土。化作蓮花步步生。

譚經同泰八關開。幾費金錢贖帝回。紅席未歸滄海使。青絲不道壽陽來。枯牆枳棘詩空在。曲項琵琶夢已灰。贏得暮年詞賦客。人閒爭數庾郎才。

玉樹新聲久不彈。黃奴去後思無端。雲隨鐵騎來桃葉。水汲銀瓶冷井闌。歌舞會聞袁學士。江山猶恨孔都官。迷樓亦是銷魂地。一樣蘇華取次看。

珠翹誰復整雙鬟。太息江南國步艱。天水碧痕深淺在。皖公翠色有無閒。宮娥揮淚嗟何及。騎省飄蓬竟不還。從此小樓風又急。更無人唱念家山。

原廣衣冠三百秋。匆匆五馬又南浮。君王但卜通宵飲。弟子新翻法部謳。拱手盈庭尊狎客。囊頭詔獄盡

名流石城重見降幡出。曹社何須怨鬼謀。

訪學成和尚集少陵句

澗水空山道。相過人不知。美花多映竹。桐葉坐題詩。易下楊朱淚。難酬支遁詞。扁舟吾已就。舍此復何之。

讀曲歌

紅豆向春種。黃蘗向春生。薄霧隱三星。有心不分明。朝憶復暮憶。憐歡還念歡。夜雨沒牛跡。躑躅無日乾。

詠史雜詩

執手陳留邸。歛歔空復情。大書魏貞士。不署晉安平。吾笑阮嗣宗。臧否不挂口。艸罷勸進牋。歸飲步兵酒。林下山河邈。黃墟憶舊游。敗人憐俗物。祇解執牙籌。樓闕知何處。舉帷一笑開。洛陽府小吏。白日上天來。築壇建行宮。一鼓罪人得。不是溫平南。諸君但譽賊。運甓渾無事。孤忠判致身。天門折翼夢。謗史恐非真。一雌復一雄。飛來入紫宮。鳳皇在椒寢。枉用種梧桐。

別墅楸枰賭。小兒破賊還。西州空灑淚。身不到東山。  
林木巢歸燕。行宮啓佛狸。封狼徒有志。何日一申眉。  
侍疾延昌殿。開言淚數行。那知書一紙。喜字在中央。  
金翅何來鳥。芟夷到七王。諸兒皆不長。涕泣自燒香。  
長驅白門道。車騎何驛騷。欲得家豪富。今朝事御刀。  
捉燭寂無言。引枕獨酣醉。此中可飲酒。解纒渾閒事。  
金鋌不堪食。何妨乞與人。卻嗤蕭阿六。黃紫榜標新。  
瑞室依巖築。高人寢處安。蟹螯堪下箸。多事問鍾馗。  
巴馬行千里。長驅抵建康。黃塵何自起。失計納貞陽。  
嶺外勤王返。淮南戰國埋。白頭持酒脯。收取血盈懷。  
莫望功名立。難將鄉里忘。常年翻背將。不及一黃蒼。  
大槩取富貴。傭書安足儔。卜人不忘語。南下作公侯。  
自起臨春閣。但聞桃葉詞。擘箋宜夜飲。八婦總能詩。  
明月今宵晦。蒺藜舊日埋。銷魂內宴罷。無復墮君懷。

舉觴勸官家。瘵人復何似。投壘尙能飛。可憐青雀子。  
攷室三臺壯。長生卅載難。且貪人世樂。臨死服金丹。  
欲雪先朝恨。銜枚戰馬嘶。投杯枉震怒。何不度關西。  
任沈工詩筆。江南二妙稱。鄴中誰作賊。邢魏兩相矜。  
捧藥賜蘭陵。謠言忌百升。長城君自壞。辛苦事椎冰。  
父不識北斗。兒偏爲世神。瓠蘆空有月。掘堊伴誰人。  
十二院分時。林泉妙一時。敝衣還乞食。何處著窮兒。  
薄暮軍書至。天池校獵忙。大家正作樂。忘卻陷平陽。  
魂斷琵琶絃。碧染青谿血。南北兩麗人。至竟誰優劣。

短歌行

對酒當歌。慷慨轉多。敲缺唾壺。和我者無。解一躬耕一畦。不如販脂。奉粟一囊。不如賣漿。解二言有金丸。乃成少年。言有錢刀。乃成賢豪。解三陟彼崇巒。言采其蘭。盛之佩纒。以祓不祥。解四

雉子班

雉子班。飛飛野田閒。吁嗟卒逢主人子。左捩弓右彈以丸。毛羽摧積。向天鳴悲。爲我謝主人。微軀不足惜。

有雌山梁有子原澤。請勿張羅向其側。雉子班心煩冤。

五雜組

五雜組。羅紈垂。往復還。連錢騎。不得已。學馬醫。  
五雜組。腰金帶。往復還。監司廨。不得已。望塵拜。  
五雜組。鷓吐綬。往復還。箕張口。不得已。飲醇酒。  
五雜組。金紫升。往復還。餐錢增。不得已。且模稜。  
五雜組。僧伽裝。往復還。藥必腸。不得已。拜佛忙。  
五雜組。錦千純。往復還。金千斤。不得已。謁朱門。  
五雜組。貴公子。往復還。五都市。不得已。窮餓死。  
五雜組。窈窕孃。往復還。紈袴郎。不得已。嫁茶商。

京口

百雉樓高鐵甕城。朱方形勢尙崢嶸。江山秀合南徐鎮。士馬雄誇北府兵。雨霽瓜洲颿影出。雲開京峴黛痕明。擬摹古鼎雷回篆。枯木堂前躡屐行。

登燕子磯



扁舟泊江滸。乘興何所適。捫蘿上危磯。支筇踏盤石。徑仄勢欲崩。膽怯步愈窄。秋色江上來。吳楚千里碧。渺渺獨愁予。潮平葦花白。

過明孝陵

盤鬱鍾山麓。神邱闕寂寥。眞容隆準在。王氣秣陵消。濠右膺符命。江東正斗杓。初承龍鳳號。終應富家謠。元末諺云富家莫起樓貧家莫起屋但看羊兒年便是吳家國法踐三章約。星除九野妖。隆中起諸葛。塞上走嫖姚。劍佩丹墀肅。山河銅柱標。提戈開一統。畫界晒南朝。穎宋心徒赤。胡藍首已懸。遂銷丞相印。特遠侍人貂。密網刑雖峻。維城寵太驕。棊收留失著。木撥出橫條。枉逐高飛燕。眞成毀室鴞。青詞虛設醮。碧血恐難招。守衛規猶壯。朝陵路竟遙。春秋三百改。枝葉十傳彫。聖代存寬大。遺墟禁牧樵。隧無金椀出。火未玉衣燒。椒酒天王酌。香函使者輶。康熙中聖祖南巡至江寧躬親奠酒國有大慶典輒遣官往告祭繚垣宮監住。宰木尙蕭蕭。

京口晚眺集唐人句

雨微煙暝立谿頭。風緊雲寒欲變秋。日晚江南望江北。兩三星火是瓜洲。

席上贈王鳳岡顧培穎兼懷王鳳喈在都下

相逢意氣重相期。翦燭更闌話雨時。榼酒三鉶傾宿醞。旗亭七字睹新詩。清譚只許王平子。癡絕終輸顧愷之。更憶薊門風雪裏。騎驢應起故園思。

詠史

曾經經略似龍韜。浪說烏衣甲第高。健卒秋風鳴射鏑。元戎曉日擁征袍。歌酣油幕揮如意。寒禦貂裘酌小槽。褒鄂家聲銷歇盡。空教血淚衛公刀。

少年

少年不羨執金吾。赤鯉銀盤酒玉壺。沒羽南山朝射虎。聽歌北里夜呼盧。驚沙秋漲鵬鵠湖。射落雙鷗金僕姑。乞得君王丈二組。一時縛取五單于。

過昭慶寺訪喆公不遇

五宗誰嗣響。清絕有祇林。水月觀空悟。風幡答法音。我來虎谿下。佛火一龕深。不見維摩詰。悠悠訪道心。萊陽二姜先生祠

仰蘇樓外有遺祠。漂泊當年事可悲。血染朝衫攀檻日。霜飛白簡毀碑時。山河轉眼分今昔。兄弟傷心灑涕洟。回首敬亭雲近遠。游魂兩地竟何之。

木棉花歌

木棉之花古未有。流傳乃自林邑南。高昌緬甸及南詔。移來交廣雷瓊儋。桐身楓葉芙蓉蕊。秋來結實離相參。周遭徑尺修數丈。非杞非梓非檉楠。蠻方寶此作活計。不數八蠻吳中蠶。爾雅釋木置不錄。南州舊

志披琅函。迦羅婆刼。載梵夾。嘉名肇錫。由瞿曇。艸棉晚出。乃居上。卑枝弱幹。霜苞含。古終古。貝名少。別騷翁。辨說徒。詰誦何人分。種到江左。花開處處。臨激潭。吾鄉所種皆艸棉。沿其名曰木棉耳。崖州老姥年七十。卓椎雙髻頭。鬢

鬢。傳來上世種。植法至今立。祠香茅庵。烏泥涇上。靈旗卷。風鬢霧鬢。留空龕。爾來傳授五百載。鄉鄰男婦

人人諳。弓彈桿。札良自苦。如食蓼葉蟲。知甘。吾生雖無田。負郭田家月。令會研覃。四坐勿諠。聽賤子。試爲

具述。忘愚慙。嚶城土燥不宜稻。稻田十塵得二三。三月才過微雨潤。木香花下香醞醞。木香花開。種花之候。農夫走

尋官。歷日翻閱。敗壁祛白蟬。詰朝相戒種花去。蓬頭散髮除襪衫。從朝至晡不得息。汗出浹背流如泔。東

皋幾日生意早。新芽迸土抽瑤簪。火雲觸熱青笠覆。艸根細斲長鉏鉞。向午不憚日杲杲。凌晨時聽鐘鐺

鐺。磨門穉子攜酒榼。饑餉小婦簪宜剪。嗟爾婦子大作苦。面目黧黑中心慚。去年種花花事歉。家中積儲

無一甌。今年天氣晴更好。十日一雨波滄涵。里巫釀錢賽邨社。社翁社母醉且酣。巫言祀神神不怒。福汝

祐。汝非戲譚。三秋轉眼西風緊。捉花處處爭探探。提囊花鈴大於繭。腰繫圓籠攜荆籃。不辭采擷指爪禿。

十五五。賴肩擔。歸來茅舍夕陽暮。少長列坐齊羅罍。園蔬餽釘剝菱芡。水族瑣碎持蠃蚶。紅蓮飯熟出

破甑。菊花釀美開新罍。拍手頓足紛雜沓。太平有象樂且湛。朝來忽訝聲剝啄。市牙估客頻停驂。得錢捆

載渡江去。吾廬依舊空沈沈。長含切。蚤花捉後花漸少。霜黃滿地羣兒擗。賣錫老翁打鼓過。傾筐換取目耽

耽。促織初鳴河射角。篝鐙一縷光猶斂。黃紗夜紡軒車鬧。抱布賤售憂如慄。我農經年長碌碌。夫豈本性

由來耽官租私債償未足。吁嗟筋力何以堪。明年力作催丁男。

宋徽宗畫龍歌

畫龍古今誰妙手。前有僧繇後所翁。宣和道君亦能事。游戲落筆侔神工。空齋歛忽風雨晦。粉墨黠黠吐  
光怪。陰雲合沓迷高穹。震電崩騰驚下界。一龍天矯胡髯垂。遙空隱見鱗之而。神物變化意飛動。豐隆列  
缺相追隨。左方題識更瀟灑。瘦金小字兼行楷。興雲噴霧豈有心。欲吸長江濟四海。題云興天上雲吸長  
江濟四海民落天  
下兩凡一十六字。我聞汴都全盛初。太清樓閣收圖書。關全董羽妙蹟在。至尊清暇時臨摹。棗蓬花花日月促。瞥  
眼宛枯如轉轂。五國城頭寒馬嘶。真龍終受泥沙辱。吁嗟乎。尺幅丹青千載傳。烏號去杳竟誰攀。一從曲  
洧南歸後。寂寞龍顏想像閒。朱弁使金得二  
帝御容以歸

宜興道中

連邨葦蕪足安居。罨畫谿光畫不如。兩岸綠陰微雨後。半簾花韻試茶初。遙山疊髻晴鋪絮。隔浦鳴榔夜  
打魚。陽羨買田曾有約。沈吟此地十年餘。

此页空白

# 潛研堂詩集卷二

## 竹枝詞和王鳳喈韻六十首

練祁秋漲接空濛。望裏微茫是海東。短棹遠衝煙樹外。綠蓑漁子話鄉風。宋寧宗嘉定十年知平江府趙彥櫛提刑王棐請割崑山縣之

安亭春申臨江平樂醋塘五鄉置縣以練祁市為治所練祁水名也宋吳惟信泊舟祁川詩片颿屢捲暫停船東望微茫接巨川元陳達觀遊練水詩短棹遠衝秋色裏

彈丸城小只如鄉。繞郭春流匹練光。僻左自來遺跡少。圖經空識府君莊。莊府君墓在澱江門南相傳土人掘得墓石云府君諱秦咸通

三年葬崑山縣東一百里伍家岡身橫瀝水西八十步

麗譙蓮漏急相催。背郭層樓面面開。夜半鐘聲驚客夢。應奎山上月華來。鐘樓在城東南隅應奎山在儒學前

紺塔峻嶒枕水湄。昇僊臺下短蓬移。蒼松翠柏天台路。可憶高歌擊楫時。王可交華亭人移居白鶴江以耕釣為業一日櫂舟擊楫高歌

泛江歛見中流綵航載七道士呼可交登航謂曰汝好骨相合為僊與之二粟食之甘如飴命黃衣送上岸但是峯巒重複松柏參天乃在天台瀑布寺前今昇僊臺故址在青龍寺塔西

活谿風度自超然。烽火催歸海上船。吟罷看雲滴露句。不知蘿月落平川。王逢江陰人避亂青龍江上顏其室曰蘿月山房逢有詩云病

就山中隱烽催海上舟又云看雲暮影齊巾角滴露春聲落枕凹

海運乘風快使颿。千夫長各署頭銜。何人為仿官師例。也補題名勒翠臧。楊樞字伯機嘉興人官松江嘉定等處海運千戶曹某常熟人

戶黃濬俱為誌墓見黃文獻公集

徵歌會費錦纏頭。檀板家僮唱石州。好事沈郎今不見。曉風殘月且歸休。安亭有二沈氏。昔時有沈元壽者。慕宋柳耆孺之為人。撰歌曲。

教僮奴為俳優。以此稱于邑人。見歸有光撰朱肖卿墓誌。

柳條拂浪水平磯。一片清光漾落暉。遙指幽人結廬處。風清月澹半開扉。元王子昭詠練川詩。芦芽迸土。抽白玉柳線。拂浪搖青金。又隄。

旁有人新結廬。軒窗瞰水宜幽居。風清月澹堪娛樂。笑掬滄浪纓可濯。

渺渺張騫槎畔煙。茫茫黃歇渡前川。滄桑閱盡恆沙劫。不信還留鐵力船。槎浦俗傳張騫乘槎處。黃渡大。名黃歇渡。攷邠。宜水利書。有大。

黃肚浦。小黃肚浦。後人訛肚為渡。乃以春申君姓傳會之。明嘉靖初。邑人沈東津宅後。掘得鐵力木船一。蓋朱清張瑄造舟海運時所遺。

耆德爭推中隱堂。科名父子破天荒。清修謹勿因人進。傳與當官一瓣香。龔明之中。吳紀聞。曾大父諱宗元。字會之。登天聖五年。第主杭。

州仁和簿。時范文正公為帥。改容禮之。曰。公器業清修。它日必為令器。謹勿因人以進。曾大父敬服其訓。又云。曾大父自都官員外郎。分司南京。謝事家居。建中隱堂。與尚書屯田員外郎程適。太子中允陳之奇。相與從游。日為文酒之樂。三公皆耆德。碩儒致政于家。吳人謂之三公。

移栽盆樹綺窗妍。截得筠筒手自鐫。花鳥徐熙山馬遠。無人知是小松傳。朱稚征號三松。善仿名畫。翦盆中花樹。朱纓號小松。善雕刻竹。

器三松小松之子也。

離披雨笠與煙蓑。款乃聲聲放棹過。一自樊川曾夜泊。至今清露白雲多。杜牧吳淞夜泊詩。清露白雲。明月天。與君齊棹木蘭船。

牡丹頭小撥輕橈。兀坐低頭長日消。行徧九行十八鎮。櫂歌聽唱雨瀟瀟。牡丹頭。船名。

楓染秋林葉葉丹。斜紋彩薄惹輕寒。野田黃雀飛將宿。月上蘆花白一灘。斜紋布可製衫。黃雀。西鄉多有之。味美。

莊嚴佛像法堂供。五粒松枝翠影重。怪雨淙淙風瑟瑟。夜深疑化作蒼龍。西隱寺古佛元時新安巧匠洪

三四百年物。葉方藹詩。晝鳴風瑟瑟。晴怪雨淙淙。今皆無存。

叢殘詩碣倚積垣。姓氏傳譌竹素園。記否嚴陵投贈句。南窗家世本蘇門。集僊宮有元人石刻詩首題詩

頓首未題天歷已。已夏孟書于練序冷齋南窗煉師者。集僊宮住持提點冲靖守正凝和法師孫應元也。故詩有煉師蘇門僊丹竈。煮白石之句。韓浚嘉定縣志載此詩。題云寄集僊宮葉煉師案。續吳錄云。嘉定

道正。賜號冲妙大師。此詩作于元天歷中。不得與葉同時。

花朝二月雨初晴。笑語相將北郭行。折得細桃剛一朵。小鬟偷壓鬢雲輕。俗以二月十二日為花

刺眼繁花細細開。陌頭女伴踏歌來。燒香纔罷遊園去。延綠軒前薄相回。城隍廟後園水石亭臺最勝。中

辛苦吳郎髮早衰。誅茅曾此傍江湄。輕陰細雨東風軟。又是梨花瘦盡時。宋吳惟信字仲孚。湖州人。寓居

年。閒將心事卜金錢。梨花瘦盡。東風軟。商略生平到杜鵑。

橫塘縱浦水瀼洄。吉貝花鈴兩岸開。朵朵提囊看似繭。急攜花籠捉花來。木棉一名吉貝。花房曰花鈴。花

人。稱木棉花。止稱花者。猶洛陽之牡丹也。

漁鏡橫照漾波明。插蕩編蒲岸岸平。沙裏鉤來鄉味好。統勝糖蟹與糟鯉。沙裏鉤。蟹屬。以

菜圃瓜畦拓百弓。杭家邨北夕陽紅。棟花倒覆三閒屋。酒幔低垂十里風。杭家村在顧浦西。明巡撫周文

周公邨。



澹沱湖光漾晚曛。龍船戲水綠云云。丹沙書就符教佩。蕙帳涼風夜辟蚊。五月五日看龍舟競渡丹沙符佩之辟蚊。

橫斜藻荇鏡中涵。洗盡浮雲天蔚藍。煙際幾番回艣窾。櫂歌聲入匯龍潭。匯龍潭在儒學前。

白鶴江邨吠乳厖。白鶴江水射船窗。苦師舉網日薄暮。定者四鰓鱸一雙。白鶴江在縣西南有白鶴邨。

病瘡唐生果怪哉。流連時命亦堪哀。胸中磊塊難消得。日飲無何且百杯。唐欽堯答友人問疾書僕之賤恙雅與衆異它人病瘡多氣亂

僕茲病瘡轉神清就枕之後一念感慨心雖萬夫應制之撰述面君之議論原祖宗之綱紀究廟社之安危延諍千言具有條理乃途蕩清宿惡扶植天常明揚幽沈剔抉淫蟲事已就緒謝政東歸素願大慰則夜已過分以此疾不知當屬何門而治之當用何藥也承兄愛厚輒述病原觀畢便擲還小僕勿令世人知有此怪症也見歸太僕集

黃姑遺廟傍江涯。膜拜紛紛乞巧兒。聞說金篦曾割水。晚風蕭蕭捲靈旗。中吳紀聞崑山縣東三十六里地名黃姑古老相傳云嘗有織

女牽牛星降于此地織女以金篦割河水湧溢牽牛因不得渡鄉人異之爲之立祠

依依墟里散炊煙。短短筵籬帶晚川。黃葉西風鹽鐵路。布颿一半販花船。鹽鐵塘吳越王運鹽鐵處

沈司徒廟夕陽沈。趙四官墳蔓艸侵。沙浦潮兼桑浦急。腰涇水比界涇深。沈司徒廟在婁塘元至正六年建趙四官不知何人有墳在腰

界涇二水之間沙浦桑浦二水名

綠樹依微繡幕圍。平橋細雨正霏霏。菜花開後梅頭出。麥浪翻時團尾飛。梅頭魚名團尾鳥名俱出高橋

一簣閑園近石岡。青蟲網戶弄斜陽。恰宜消夏浮朱李。亂打新荷雨氣涼。石岡在澄江門外曩方伯錫爵別墅在焉程嘉燧石岡園雜詩

竹風荷澗北雨氣石岡南又同唐婁二兄遊石岡園詩林晦今朝雨荷故昨夜風安來無洒掃網戶有青蟲

鷓鴣鵲任往還。野田雨過瀉潺潺。婁江北去無多路。記取儂家相見灣。劉家河古婁江也有相見灣。

期願堂下綠凝苔。垂白牙緋拜賜回。九十年華彈指過。有人曾識壽星來。吳郡志龔明之字希仲居崑山黃姑別墅作期願堂日飲其閒。

中吳紀聞予年二十時與鄧君聘應求同在郡庠應求精於人鑒語予曰吾友乃一壽星然亦可銀瑯瓊後七十年予始拜牙緋之寵

菱角青青荳莢黃。秋成風候未全涼。老農屈指稻將熟。下馬試看烏野香。烏野香下馬看皆稻名。

天僊古街繞清渠。鹿眼編籬密更疏。紅蓼白蘋秋色好。分明畫出野人居。吳轍字中行台州人元末避亂溆濱顏其室曰野人居倪高士

續爲作圖後徙清浦里之天僊街。

水面懸芎香餌多。搬頭船子晒漁蓑。斜陽一帶平蕪岸。依舊淞江落葉波。白居易望海詩震澤平蕪岸淞江落葉波。

沙外平沙邨外邨。黃墩東望是雷墩。吳航販取秋瓜去。柔艣呀啞劃水痕。黃墩在縣西南二十里雷墩在縣西南五里產西瓜最美。

墊巾樓下雨如絲。點水蜻蜓故故遲。記得新安老處士。松濤竹露醉題詩。墊巾樓程嘉燧故居嘉燧有詩云曉案晴光研竹露夜瓢明月

賁松濤。

曲綠寒塘鴈齒橋。澹黃楊柳影迢迢。扁舟載酒江湖去。好趁初三十八潮。楊柳橋在十四都初三十八潮最大。

走馬塘邊下釣綸。青龍江水渙潛鱗。蓮衣褪後秋風緊。開徧繁花四葉蘋。走馬塘在縣東南青龍江在縣西南相傳吳王造青龍戰艦於此。

齊公卓錫闢榛蕪。疏瘦天然冰雪軀。怪得邨氓爭布施。不知曾見鶴飛無。中吳紀聞崑山縣臨江鄉有南翔寺初寺基出片石方覆丈餘。

常有二白鶴飛集其上。有僧號齊法師者。謂此地可立伽藍。即鳩財募衆。不日而成。因聚其徒居焉。二鶴之飛。或自東來。必有東人施其財。自西來。則施者亦自西而至。其它皆隨方而應。無一不驗。月明往事。重堪悲。殺氣東來。假將旗。故壘西風。魂斷處。不知誰唱。輓歌詞。晉書袁山松出遊。輒令人唱輓歌。時謂道上行殯。後爲吳郡太守。守滬濱壘。爲孫恩所害。嘉定縣志作袁崧。誤合山松爲一。非也。元楊瑀滬濱壘詩。莫向月明悲往事。卽今滄海已塵生。

外岡西去是儂家。數畝清陰落照斜。一扇柴扉容叱犢。半颿漁艇慣撈鰕。外岡在縣西十二里。又西五里爲望儂橋市。

莊濱南與練祁陽。一道平波跨石梁。顧浦待潮天欲晚。田居冷僻似僧房。望儂橋跨顧浦上。余家在其西。右爲莊濱。左爲小練。祁郊。宜水。

利書載松江北岸自北陳浦東至海口有大浦二十條。顧浦其一也。顧發有待潮顧浦宿耕者張欽舍詩。載崑山雜詠。

三椽老屋薜花斑。只少谿南數尺山。試上望儂橋上望。玉峯翠黛有無閒。登望儂橋可見崑山馬鞍山頂。

半塍黃豆半青秧。花藥圍邨竹遶岡。河射角時勤夜作。商量莫負好秋光。藍葑俗呼青秧。

笠澤江聲接杳冥。一雙白鷺立沙汀。望中點點如螺髻。數徧雲閒九朵青。吳淞江一名笠澤。九峯在其南。

潮聲半夜滿寒塘。銜尾中流到海航。載得黃魚白鯊至。閣鮮一路賣沿鄉。俗呼海魚。新鮮者曰閣鮮。

膽瓶換水貯清漪。月下鐙前影倒披。羅漢松青天燭赤。輕黃更閒蠟梅枝。新年瓶中插花如蠟梅。天燭羅漢松之類。

茅柴壓酒最清甘。醉踏郊原春色酣。黃艸鞦輕棉布暖。生來不識上山蠶。涼鞦出新。澤取黃艸織之。邑不宜蠶。人家皆種木棉作布。

銀餠粧妝滿盤盛。正月人家未出耕。鐙火夜闌喧小婢。鍼姑細語聽分明。正月鐙時。迎鍼姑。

婉兮卅角亦多姿。上學初從句讀師。粗記神童詩一卷。聰明傲煞牧豬兒。小兒上學。讀神童詩。千家詩。三字經之類。陸放翁所謂邨書也。

木龍漿薄抵輕冰。橄欖瓜甜蔓細藤。燕子春來抽燕筍。魚苗秋老放魚鷹。取木龍子磨作粉。夏月食之名。涼粉。橄欖瓜。西瓜。別種出外岡。

燕竹以燕來時生筍。魚苗俗名魚秧。近太倉人家多畜之。魚鷹俗名水老鴉。

巨螯團壓認雌雄。手縛寒蒲教短童。頗羨楊涇老漁者。一年活計緯蕭中。楊涇蟹最美。諺云：雄蟹捨不得螯。雌蟹捨不得腳。

激灩銀河低玉繩。嬋娟弦月挂西脰。舟移畏壘亭前泊。遙憶書帷幃蠟鏡。畏壘亭。歸太僕。有光讀書處。

木棉花黃蝴蝶飛。木棉花白豆葉稀。木棉收盡軫車鬧。紡得黃紗製妾衣。

艸冷煙清一望平。錢門塘上掩柴荆。簞鐙細細鳴梭急。好和疏籬促織聲。錢門塘市出布。

生泚醜醜出新筓。令節分冬一醉休。怕見三朝迷霧重。裴縣徑寸暖于裘。冬至前一日。飲酒。謂之分冬。酒。諺云：三朝迷霧刮西風。

蜜餌糍團和粉餠。九斤爛煮大場雞。宵來送歲還迎歲。齊換宜春帖子題。三黃雞。出大場。重至九斤。元日題宜春二字于門。

蘆簾紙閣好盤桓。煙篠風蒲水面寬。合喚漁兄與漁弟。柳陰深處下筠竿。

### 望僊橋

傍水低低屋。穿橋小小船。潮來從顧浦。煙細認安亭。種豆青攢筴。收棉白拆鈴。邨邨歌歲稔。樂矣返柴扃。

### 滄浪亭

蘇君昔寓蘇。傍水小亭建。清風明月佳。買斷錢四萬。誰云傲骨屯。自取兼山艮。竹翠穿日光。窗青延野蔓。

日光穿竹翠。玲瓏野蔓。盤青入破窗。皆子美句。吟詩寄歐梅。餘子毋我恩。平生金石文。委積塵一寸。那知謗焰息。聲名出蹇鈍。翻

令後遊人到此適所願。前孫與後章。棄置勿復論。清兮滄浪水。濯纓來者勸。

擬田家詞

學稼數十載。不入城市門。婚嫁早已畢。含飴聊弄孫。幼孫六七齡。岐嶷亦可人。問之讀何書。孝經與魯論。大意雖未曉。句讀粗能言。向母索棗栗。畏翁卻復前。撫景忽長喟。忽憶翁少年。此景難再得。回首心茫然。

寄邵高二秀才

寥寥旅鴈尙南征。母對西風百感生。孤客途窮還臥病。天涯知己苦關情。持竿雨後思高鳳。種圃城東羨邵平。何日一樽重話舊。夜窗挑盡短長檠。

訪顧上舍邨居

五載曾爲客。重來訪舊游。麥青纔覆雉。沙淺不驚鷗。鮭菜參差市。颿檣遠近舟。比鄰如可約。還往儘風流。

題爻吉兄赤壁圖

月射烏篷岸。明攝衣絕巘上頭行。危巢夜半驚棲鷺。知是當年長嘯聲。崎嶇石磴足淹留。如畫江山一望收。絕壁登臨應更快。笑它二客未風流。

擊筑行

朔風蕭蕭翻地軸。燕南酒徒盡擊筑。壯士一時怒瞋目。平生不識秦舞陽。殺人如麻人莫當。須臾色變何

倉皇秦廷劍光飛不起。青銅柱裂白虹死。輕身一擲長已矣。

君不見博浪飛椎椎折軾。下邳圯上無人識。大索十日索不得。子房全身卒能報韓悲荆卿之不能也。

閏七夕 戊辰

又是秋河絡角時。停機重把韉羅移。多情葭管灰偏剩。解事蓮花漏較遲。兒女穿鍼翻舊樣。詞人乞巧換新詩。素娥此夜知遙妒。不放金波萬里垂。是夕無月。

漫成六首

說詩解頤匡鼎問。事長頭賈逵。汗青一時未了。艸元後世誰知。坐客青眼白眼。名士大兒小兒。搗鼓三通古調。詠懷百首新詩。風裏登山落帽。雨中出郭墊巾。捋鬚欲臣老子。伸足不識故人。乞米平原有帖。移家東野無車。聊復中之美酒。且往觀乎異書。巨口鱸魚秋美。長腰粳米冬春。新拓三椽老屋。恰對五粒小松。宅畔雞頭鴨腳。生涯蟲臂鼠肝。寄貲斷無錄事。送菜可有園官。

用昌黎會合聯句韻送王良齋先生歸海虞

朔雪凍差差。慳慳寒氣重。王鳴盛先生懷故園。浩然歸計勇。王昶冷雪武邱疑。秀嶂虞山聳。錢大昕。裴輕

僕無痛。颿舉浪猶湧。曹仁虎養疴公志便。問字我忱壅。鳴盛結添卜商衣。履曳原憲踵。昶叩鐘聆噌吰。帶  
經鉏畝壟。大昕游嘗舁輿從。學歎望洋恐。仁虎嗚呼文教衰。流傳多繆種。鳴盛七略誰囊該。九師空雜冗。  
昶弔詭卜火珠。荒誕搜汲塚。大昕袞袞逐積瀾。紛紛博世寵。仁虎先生筦道樞。詞林作梁棋。鳴盛砭俗論  
必嚴。匹古意未恂。昶覃思幹元造。購籍損官奉。大昕幽鍵啓突奧。銛斤斲拳腫。仁虎十道九域探。三篋百  
城擁。鳴盛當其烏臺遷。屹然白簡捧。昶默默嗤寒蟬。啾啾嘲羣蝥。大昕正色排螿螂。直筆刺微鱣。仁虎然  
犀燭罔象。伏弩射闕鞏。鳴盛獨立仰丰規。先鳴振偃齔。昶乃知一士愕。足令千夫悚。大昕旋解紫綬還。閒  
雍碧艸茸。仁虎酒兵整鞦韆。騷壇集球琪。鳴盛遂初欣歸吳。耽榮恥得隴。昶吾谷峰嶙嶙。尙湖波溶溶。大  
昕閒身侶鷗鷺。塵鞅脫桎梏。仁虎五年主講席。詩禮誠發冢。鳴盛教比時術蛾。文喻吐絲蛹。昶執經紆矩  
步。解惑快曲踊。大昕情愴驪駒歌。令紀烏獸耗。仁虎往矣冰蹙紋。來思花坼雨。鳴盛佇立望河干。霜風浩  
呼洵。昶

聞金川平定喜而有作

西南絕徼漫傳烽。命將專征出九重。闔外建旄麾鐵騎。軍門推轂賜黃封。雲連壁壘龍蛇陣。日閃旌旗茶  
火容。聞說如山號令肅。六師枕席過巴庸。  
元戎出塞陣堂堂。制勝遙承廟算長。鳥道千盤朝縹馬。龍韜三略夜封章。電矛雨矢軍威壯。雷鼓風旗士

氣揚聞說蠻方今納款。亟銷鐵甲事耕桑。  
桃林重疊賞元功。廉李威名出禁中。長子帥師期盡敵。大君懿德載囊弓。笳簫夜靜三更月。鼓角春開萬里風。勒石橋門重紀績。奎章百丈氣如虹。

秋柳次韻

極目長條更短條。永豐西角最魂消。渭城舊恨歌三疊。白下新愁送六朝。零落夜烏嗁轉急。蕭疏客鬢話無聊。春來縱說輕離別。尙有濃陰拂畫橋。

歸家

刺促何堪道。生涯逐布颿。高堂將白髮。游子尙青衫。短檠愁韓愈。長竿笑阮咸。歸來斷黃獨。託命手中鐙。數點灑塵雨。新涼亦復佳。著書翻鄴架。沽酒壓茅柴。更有羊何契。相於笠笠偕。天涯少知己。不用敝青鞵。

舟行

棹入煙蘿裏。幽探願不違。共知濠上樂。漸息漢陰機。柔艣謳鴉語。閒鷗撲鹿飛。坐看林際暝。猶有白雲歸。

遠別離

尙湖夜泊

扁舟破浪行。布颿疾于箭。紅豆盛羅囊。相思不得見。



微茫雲水自萋迷。平遠山光入望低。唱罷竹枝颿盡落。孤篷殘夢尙湖西。

秋日舟行

西風一夜生。秋氣倏清爽。峯遠明餘霞。林疏透微晃。邨煙細如絲。水田平于掌。出泉占旣濟。虛舟利攸往。漸聞榜人語。始知暮潮上。鷗鷺眠不驚。水石激成響。忘機境俱恬。乘化意彌廣。逝者亦如斯。因之寄遐想。

九日同潘瓊谿凌叔子張策時王蘭成作

木落鴈南下。天涯各滯淫。百年多病客。九日故鄉心。風度高樓笛。寒生別浦砧。西山爽氣在。無計一登臨。

雪霽

平明雪初霽。幽人此散步。徐看朝暎升。忽訝時雨澍。青山如新沐。螺髻恰微露。老樹影漸瘦。陳根尙封固。早梅舒素萼。暗香纔半樹。疑是窈窕姿。輕紈障逾嫵。言尋小僧寮。蒼茫問古渡。橋鼓劣容足。泥融略識路。隱隱鐘梵聲。靜聽得清悟。趺坐憺忘歸。不知日遲暮。

贈翁朗夫徵君

緯蕭抱犢白家風。薦牘頻看達紫宮。東國人倫歸郭泰。西京儒術數申公。江湖載酒風流在。耆舊論交意氣同。擬向君山來問字。相從踏徧碧玲瓏。

春日閒居

五畝城西路。郊居賦若何。鳥聲新雨過。颿影夕陽多。酒熟人初醒。詩成客解歌。生來耽習靜。閒坐說禪那。

金山

方丈瀛洲路渺茫。金山終古獨蒼蒼。孤根自立何依傍。濁浪相排有抵當。樹影只疑雲影幻。鐘聲遙帶水聲長。中冷泉味誰能別。且坐僧寮子細嘗。

永濟寺

懸厓青瘦似檻礮。中有清涼十笏居。六合山光凭檻入。大江颿影卷簾餘。譚禪不契空行脚。養病無妨且廢書。三載重過忙底事。晨鐘送響只紆徐。

雨花臺

說法雨曼陀。高風宛如昨。坐久寂無人。惟有松花落。

懷曹來殷

忽忽三秋暮。兼葭況復殘。涼颿一以至。落葉洞庭寒。我友今多病。相思獨倚闌。因風寄消息。中夜起盤桓。綠苔凝芳榭。子建獨煩憂。今夜西窗月。懷人定倚樓。天寒租賦急。歲歉稻梁愁。辛苦江鄉夢。郵籤肯寄不。

懷王蘭成

井梧撼撼下閒庭。悵望同心隔遠坰。舊雨祇今勞夢寐。三春曾此共飄零。白沙夜月潮聲急。紅葉秋山屐

齒停遙憶五茸雲正遠。折麻何處寄芳馨。

憎蠅

營營亂形聲。散豆不可打。都瓦切。從未續降禮韻。適從何處來。會須杖門者。

別席

楊柳無端折。笙歌有意留。清言仍袞袞。長路但悠悠。細雨兼花落。歸雲赴客愁。江淹黯然別。南浦一扁舟。

同王琴德曹來殷沙斗初張崑南泛舟游靈巖山寺

申旦戒清遊。極目路非遠。橫塘流琤淙。枉渚任回轉。幽賞心忘疲。津逮境屢變。弭棹入山中。相於陟崇巘。琴臺旣清峻。石廊復平坦。緬懷昔時人。繁華自流灑。原荒走麋鹿。徑僻積苔蘚。代往迹豈邈。物移理空顯。雍門操未彈。牛山淚先泫。因之感古今。徘徊遂忘返。

暮宿木瀆吳企管園亭

羲輪不暫駐。夕景來陰崖。沿途越修眇。命駕登幽齋。吾友早遺榮。相見愜我懷。盍簪樂情話。容邴升堂階。坎習激清籟。解作滋新荻。以茲邱園樂。況復聯朋儕。迢迢月初上。千里無塵霾。清輝長不滅。良覲寧愁乖。素履貞无咎。同心道長諧。願言崇令名。相於游息偕。

游天平山歷龍門白雲泉蓮花洞諸勝

夙昔慕臺尚。散髮事登陟。名山志遠游。攜屐探九域。天平況在邇。蔥翠望不極。屯雲生層岡。蒙泉注巖隙。壁立石骨露。峻絕苔徑仄。梯空疑無路。攀蘿若可卽。行險心惟亨。仰止道自得。理以湛寂超。境與幽邃適。卽此澹塵慮。奚自逃藪澤。歲宴期重游。眷茲山中客。

訪上沙陸氏園居

尋芳信坦步。徑行越故蹊。名園在西郊。不辭路逶迤。自田復之湖。果得瞻巖棲。木水自明瑟。蒲稗相因依。激泉植疏榭。折柳樊新籬。機忘魚鳥適。地偏心神怡。幽人托肥遁。衡門忘朝飢。高風未緜邈。軌躅良在茲。我亦澹蕩人。寄興耽山茨。相期沮溺耦。開徑耕東菑。

三十三山艸堂圖歌爲霽堂徵君作

前峰後峰石嶮峴。千重萬重雲往還。秋林滿眼楓葉丹。艸堂突兀當其間。主人乃是湖海客。著作終年樂泉石。方瞳皓首冰雪顏。恐是列僊天上謫。暨陽城邊嵐氣濃。五畝之宅一畝宮。說經勝匡鼎。鑿穴師臺修。三詔六聘笑不應。芒屨竹杖踏徧三十三青峰。煙蒼蒼兮乍合。水澹澹兮生漪。喬松蔽天以磊砢。野卉裊露以華滋。遙岑出沒望不極。惟見長江東下奔赴大海。一氣磅礴無端倪。使人目眩色動而嗟咨。蓬萊在何所。五嶽不可期。四壁臥游太癡絕。撫琴動操徒爾爲。何如艸堂卜築好。日餐蛾綠可娛老。窗前皓月來如期。階下蒼苔閒不掃。青山便是耐久朋。息壤盟言悔不早。我披艸堂圖。爲君試作艸堂歌。安得誅茅開

徑來傍山之阿。從君艸堂晨夕時相過。

送吳企晉游黃山

黃山三十六。杏靄望難分。初日天都上。峰峰皆白雲。赤松學道處。嘯傲列僊羣。亦擬支筇去。鐘聲煙際聞。陽湖雨泊同。諸君分韻得桃字。

溧陽道中

去去甃壇路。孤邨繫小舸。隄邊折楊柳。竹外拆細桃。風雨同鄉夢。江湖對濁醪。三更聽棹曲。轉念客途勞。漠漠平蕪野色寬。林泉幽勝足盤桓。疏隄燕語垂楊路。細雨春扶蓺藥欄。地近洮湖沙岸長。煙昏瀨水客。飄寒更思入饌蕻。羹滑好著紅衣下釣竿。

金陵寄內

春江回望路迢迢。簫管秦淮空暮朝。三十六鱗封錦字。澹煙疏柳白門橋。

# 潛研堂詩集卷二

御試賦得指佞艸五言八韻  
得忠字

中天方遠佞。小艸亦懷忠。匪手偏能指。無心乃至公。孤標宜近日。勁節詎隨風。自欲傾葵效。全教滋蔓空。根依階砌畔。影射棘槐中。賦性嗤蕭艾。遭時異梗蓬。觸邪神豸似。紀瑞歲蓂同。聖代明良會。欽茲勵百工。奉旨特賜舉人授中書舍人紀恩二首

俳優薄技擬枚皋。給札金門異數叨。五色霏微承紫誥。十年蕉萃媿青袍。登科仍許陪先進。通籍何須謁選曹。小艸自來無遠志。也蒙搜采到蓬蒿。趨承行殿謝恩齊。冰樣頭銜紙尾題。葵藿忽回初日照。鸞鳩何分上林棲。青綾被暖中宵擁。紅藥花翻入戶低。却笑杜陵誇獻賦。五年纔得尉河西。

吳越宮詞

婆留水淨了無塵。腰鼓城堅霸業新。握髮殿頭耽午睡。不應翻怒沃湯人。清歌緩緩惱人懷。陌上花飛濕錦鞵。一望浮圖如紺碧。不知破費幾金釵。枕來圓木肆勤勞。宮嫗司更各一遭。蜥蜴沿緣油欲竭。君王昨夜飲麻膏。

東院釵鈿十二行。金櫻的的各含房。錦綳貴子生來早。碧眼高僧獻玉羊。  
新添侍女直嚴更。青絹輕幃夢未成。曲宴胡琴纔弄罷。牆陰微度彈丸聲。  
擲筆波心膽氣麤。匆匆除夕失歡娛。當時應悔輕題句。一軸鍾馗擊鬼圖。  
帳前銀鹿弄羣兒。嬪御翩翩窈窕姿。獨有才人吳漢月。練衣淺澹道裝時。  
麗春院子夜沈沈。樂部更番奏雅吟。怪底佛堂鐘梵歇。好催新月譜新音。  
龍蕊千金購海南。真妃稽首供精藍。山僧不遇波斯客。一笑唐捐日本簪。  
一彈指頃願心微。佛髻旋螺出禁闈。多謝君王親合十。插天金塔榜黃妃。

王次山先生輓詩

西臺眞御史。東觀舊詞臣。賦艸凌雲筆。車埋當道輪。平生尙風義。傲骨獨嶙峋。  
辛苦遺孤在。誰爲分宅人。掌夢巫陽杳。催人鬼伯侵。計來猶恐誤。悲極不成吟。寥亮山陽笛。摧殘爨下琴。  
半生知己感。淒斷竟難禁。

呈沈歸愚先生

通籍清華紫纈深。乞身歸老解朝簪。文章巨手唐燕許。山水前盟漢向禽。  
綸閣容臺譚故事。赤城黃海入新吟。年開九秩身猶健。獨樂依然戀闕心。

舊宅靈巖十笏安。天留耆碩領詩壇。御賜詩壇者 碩四大字 高承沆瀣中霄露。獨掣鯨魚大海瀾。供奉拾遺光燄在。

椒園竹里嘯歌寬。集成不用求元晏。帝製鴻文在簡端。

絲竹東山閱歲時。白頭重話主恩私。途初久已辭中禁。清俸猶煩給度支。層閣靜聽松籟遠。平泉細譜藥苗滋。五湖煙水明于鏡。好鑑蒼蒼海鶴姿。

五月

五月秧鍼綠。兼旬雨澤稀。甌窠乾欲坼。布穀暮空飛。米價頻年長。田園生計非。老農占甲子。辛苦候荆扉。

邵伯湖

澤國微茫長綠蕪。薄游蹤跡感羈孤。疏鐘夜火孟城驛。官柳長隄邵伯湖。往日漂流悲鴈戶。祇今邨落足漁租。波光面面清于鏡。得似沙鷗穩宿無。

寄內

徐淑偏工病。潘仁未定居。艱難千里別。迢遞八行書。已負餽糜約。能禁愁鬢疏。相思應最苦。酒醒夢回初。

題翁霽堂徵君秋林覓句圖

四序天平分。最好惟三秋。秋高氣迴望不極。滿林清籟鳴颼颼。遙岑明滅碧無數。楓柏經霜點紅樹。彷彿江南黃葉時。煙邨漁舍斜陽暮。中有詩翁矍而清。扶藜散步探雲扃。山空人靜參真悟。無心得句如天成。劃然蘇門鸞鳳嘯。千巖萬壑音泠泠。君不見柴桑陶徵士。采菊東籬插籜蕊。地偏心遠日夕佳。吟向南山



蒼翠裏君不見吳興柳使君。清詩五字妙入神。寒砧北渚蘋洲晚。隴首西風木葉聞。先生吟卷煥羣雅。標格古今足比亞。拄頰長歌得意初。定知十手爭傳寫。憶昨相逢吳會閒。問奇載酒每忘還。疏鐘夜訪楓橋寺。蠟屐朝看林屋山。甘羅城邊同作客。話雨西窗樂晨夕。天末鄉心白露深。河干官柳寒煙碧。示我小幘一尺餘。吳裝渲染却蕭疏。分明清逸倪迂畫。貌出吟詩孟浩圖。年來我亦因詩瘦。滿眼秋山重回首。只合從君汗漫游。欲向林閒掇三秀。

憶內

薄寒疏雨睡蒼騰。忽憶年時別緒增。一幅水精簾未捲。遠山濃綠畫眉曾。方池菌萑葉田田。斗帳溫麕應未眠。別整雲鬟香霧裏。月明涼浸夜飛蟬。輕衫彈畫折枝疏。屈戌終朝掩玉除。一翦微風梳鬢影。滿庭河柳納涼餘。無心繡佛說禪那。雨過閒階長綠莎。屈指刀環知幾日。澹雲清漏落秋河。參橫斗轉夜闌干。自試麋丸墨未乾。爲寄新詩裁錦字。中央四角幾番看。匆匆書劍枉飄零。水驛山程次第經。君上高樓休望遠。銷魂官柳短長亭。

辛未七夕用李義山韻

搖落天涯感別離。幾番屈指數歸期。懷人江上參橫後。聽雨更闌夢到時。西北浮雲秋望遠。東南孔雀夜

飛遲。那堪客裏逢佳節。莫怪安仁鬢有絲。

### 淮陰釣臺

淮陰未遇日。遺跡此河干。洵有真王相。曾登大將壇。藏弓鐘室恨。捲雪釣臺寒。輸與嚴陵客。忘機把竹竿。

### 淮安弔褚不華

我登韓信城。平野莽無際。極目古戰場。浩然足長喟。嗚呼至正年。劇盜起如蝟。衛公來石樓。孤城手扞蔽。指掌悉兵形。分壘扼地勢。白簡飛風霜。總戎爲短氣。鐵頭撥已孤。青軍氛更熾。鼓衰落日低。矢盡空拳銳。破賊滅賀蘭。嗟哉志不遂。蒼茫大將星。中宵竟隕地。長淮怒浪高。豐沛浮雲逝。招魂去何之。麥飯無陳祭。不見清水塘。穹碑負負最。謂余忠宣誰爲立專祠。我將告具位。元始稱軍興死事之臣。以不華與余闕爲第一。

### 東軒相國七十壽詩

久登黃閣領簪紳。後樂先憂在一身。門第膏腴唐宰相。經筵啓沃宋儒臣。骨清真有僊曹分。事練還勝年少人。七十杖朝仍古制。天留大老展經綸。

星軺銜命出台階。歷試勳名邁等儕。畫戟森嚴兼使相。金隄鞏固定河淮。行其無事休民力。告厥成功慰聖懷。今日生申歌介雅。東南老稚頌聲皆。

### 清口

黃河如奔雷。驚濤走沆漭。長隄束兩崖。鬱怒激危響。淮陰地勢卑。河身出其上。三秋水稽天。有識心惚恍。清口受全淮。洪源故深廣。瀦水以刷沙。議自印川昉。築堰塞尾閘。不惜糜內帑。併力趨一門。驚湍瀉萬丈。浩浩雲梯關。二瀆相摩盪。稍紓南顧憂。且以助轉餉。迄今讀遺書。擘畫若指掌。成跡詒後人。喟然起遐仰。

清河道中

清晨北渡河。破浪長風駛。峭颿若飛鳥。瞥眼無停晷。撥棹指中河。邨落正邈迤。依依垂柳絲。隱隱炊煙起。居人傍遙隄。柴門臨水涘。鄰近八九家。一鬧成小市。趁虛賣魚蝦。沿邨散雞豕。地瘠少桑麻。民貧戒浮侈。灑河彫劫餘。安堵差足喜。來牟方有秋。年豐未可恃。努力護長隄。勿使蟻穴毀。哀哀諸鴈戶。忍令數轉徙。

中河

東南歲轉漕。海道久廢。長淮泝流上。黃河路迢遞。中經呂梁洪。洶湧浩無際。冒險非長策。各各獻大計。鑿渠泐溝始。開道卓河繼。我朝靳中丞。持節江淮澁。周歷審地脈。慷慨闢浮議。渺瀰駱馬湖。泉源納千派。引之使南行。築隄以扞衛。嶷嶷大輻來。峭颿趁風利。破浪不須時。截流占既濟。宿預逮下邳。百丈銜尾至。水驛經三千。魯齊泊幽薊。遂令運租船。踏浪若平地。竭來溯遺蹤。波光正容裔。想像經濟才。倜儻竟誰嗣。前陳瑱與後宋禮。鼎峙差無愧。敢告載筆臣。采入河渠志。

邳州

百里彈丸地。傳聞古下邳。孤城奚仲國。衰艸石崇碑。入市魚蝦賤。瀕河波浪危。船頭青數點。山色隱修眉。與周西隲孝廉分賦漢陵得長陵茂陵

金刀天啓入咸京。扶義居然長者名。三尺獨提游子劍。一杯險啜若翁羹。芒山雲起蛇先斷。垓下歌殘狗已烹。誰道英雄多嬾易。也能輟洗謝狂生。

寶帳珠簾甲乙陳。樓居縹緲切星辰。浪傳阿母來青鳥。却喜奇童對白麀。鑿空徧通旁國節。舞文幾積後來薪。長門枉買相如賦。不記當時金屋人。

### 元史雜詩

一介相邀泛淥醪。角張未許嫁娉婷。南鴻一夜驚飛去。枉信人閒有白翎。鐵券金符異代書。艱難王業未寧居。班朱泥水渾流在。莫忘君臣信誓初。凌兢瘦馬各銜枚。韜韞蹠皮誓不回。傳語乃蠻諸部長。統軍盍喚可敦來。兀朱加葉總名邦。大將征西金鼓攔。百里沈檀香霧遠。軍門曉受算灘降。名王西北翦圭桐。萬里神京封事通。站赤星馳三百日。計程未到大安宮。歲賜平分五戶絲。蒼兒海子浸玻璃。冊妃尙主承新旨。忘却揮刀蹋岸時。金章蠲紐備藩臣。甥舅姬姜肺附親。歲歲江南分戶鈔。一時望闕拜溫綸。

軍門獻策氣無前。百戰勳名露布宣。白馬朱纓朝突陣。霸州元帥破丹延。  
金沙灘險瀉灣濶。飛度爭趨龍首關。六詔一時分郡縣。軍威先已震烏蠻。  
微茫國語乍宣初。關紐翻來屈曲餘。傳是法王新製字。詞頭休進畏吾書。  
雪山六月未流澌。九渡河源度馬時。終古乘槎誇漢使。幾人曾到朶甘思。  
乃顏故地水潑澗。漁戶千絲舉網纒。進得巨魚剛九尾。無人知向肇州來。  
窮海淹留歲月徂。風高霜落鴈飛孤。金明池上彎弧客。曾見纍臣繫帛無。  
灑馬年年祀禮成。葡萄細乳革囊盛。如何太祝升神座。偷喚先朝帝后名。  
真珠簾柙自重重。織錦花紋肖御容。擁護還憑龍象力。影堂人定聽鳴鐘。  
正殿朝儀集九賓。兩宮竝御肅楓宸。誰傳珠絡天家詔。別有跣趺上坐人。  
梵書白繖影團圓。儀鳳雲和樂未闌。游徧紅門城內外。官家親御綵樓看。  
金甕珠衣寵錫新。退衙夜宴洒千巡。花枝瞥眼渾如夢。空作鴛鴦會上人。  
名鷹文豹賜頻仍。一字真王封邑增。七寶玉書鐫上輔。頭銜未換薛禪稱。  
殿中宿衛早承恩。侍直還教近至尊。宣喚內庭催博進。衣香輕浣餅茶痕。

我讀桑苧經。載馨惠惠割。大昕活泉半杓煎。細茗一旗狹。吳志鴻江心汲中浴。雨前焙清雪。大昕碾磨競  
八閩。薑鹽晒三峽。志鴻冰茶防何年。濫觴誌某甲。大昕土甞啓及時。凌人供未乏。志鴻腹堅紋乍裂。頭綱  
芽新搯。大昕取彼明月光。配以驚雷莢。志鴻一片玉斲初。百過湯沸恰。水火適既濟。炎涼變一霎。大昕雀  
舌凍欲含。蟹眼浮漸壓。志鴻甌倩樵青擎。椀任玉川呷。大昕肺熱渴思消。齒冷酒徒狎。志鴻兩腋散松風。  
六角拋紈箑。大昕火宅生晨涼。妙諦參梵夾。志鴻吾儕稽阮儔。脫略忘巾帽。西山拄笏看。東華染塵插。大  
昕。花影亞檐牙。波紋漾簾柳。志鴻譚高屈雕龍。香熏浮睡鴨。大昕滿貯玉壺清。小試竹爐法。炎歊稍破除。  
襪襪謝款洽。志鴻寒泉浸瓜犀。涼颿扇莆蕤。大昕手弄月團香。心盟白水畝。志鴻鬪茗會有期。強韻好重  
押。大昕

### 移寓

客居燕臺兩寒暑。有似澤雉游樊籠。虎坊菜市三易寓。去住蹤跡風轉蓬。我生倚著詎定在。雪泥指爪隨  
虛空。重陽風雨條又過。借車攜具何匆匆。書籤藥裹手摒擋。邨夫子態與我同。枳籬周遮當硯北。繩牀曲  
簾安牆東。舍後老槐恰兩本。經秋樹影猶龍葱。芻尼定巢久不去。侵曉輒語枝頭工。主人兀坐風簾捲。苦  
吟竊比寒號蟲。褚生季野吾執友。褚鶴侶舍人與予同寓論文說賦相磨礪。同心竝命蛩負簷。容膝共此一畝宮。化  
城暫生安穩想。底事落託悲途窮。直沽紫蟹味不惡。凍易清釀時復中。明朝好約高陽侶。醉鄉竟去從無

功。

兩頭織織詩

兩頭織織蠶繭絲。半白半黑楸枰棋。臚臚膊膊春冰澌。磊磊落落亂石堆。  
兩頭織織指南鍼。半白半黑沙際禽。臚臚膊膊落葉音。磊磊落落松柏心。

山行

終葉風初定。疏林艸未芟。晴雲深洞壁。返照亂山銜。僧院青蓮漏。人家白木鑱。避喧宜小住。便覺隔塵凡。

青龍橋

崎嶇卵石路。延緣鴈齒平。橋望渺然。十里長隄虹影落。一灣淺碧澱紋圓。午窗翠袖調笙地。夜柵青帘鬪酒天。想像故園真在眼。沿流只少楸頭船。

香山月夜

來青軒外月。迥出碧雲端。穆穆金波滿。遲遲玉漏殘。疏鐘諸界靜。落葉萬山寒。憐爾南飛鴈。棲枝尙未安。

靜宜園直廬卽事

別苑西郊外。山腰蠟屐登。重湖鏡面闊。遠嶂黛眉層。襪被周廬近。判花細字能。小春風候暖。幽澗未凝冰。晝轉松濤響。宵分月氣涼。格詩閒索句。品字細焚香。吏隱真難判。林泉此不忘。上方塔鈴語。清韻落回廊。

贈金鐘越孝廉

澆愁十榼似淋灰。絕妙詞成大雅材。風雪長安吟思在。蹇驢重向灞橋來。

三隱高人剩舊蹤。家山作遠是誰儂。酒徒尚有吳郎在。謂杉亭舍人共話桑根點黛濃。

菜把多承地主恩。圍爐輭脚共寒溫。清言擁鼻相酬和。也勝投書光範門。鍾越寓東墅太史邸

送江蔗畦明府之官湖湘

天末郵籤幾十程。銅章綠髻吏人迎。山如宋迪圖中好。花到潘仁縣裏明。疏簾棋聲簾乍捲。匡牀琴響月初生。平沙遠浦無窮思。贏得詩篇風格清。

題諸艸廬贊善高松對論圖

古松在庭隅。孤榦恰疑入聲立。凜然歲寒姿。霜皮圍四十。盤回鶴騰空。蜿蜒龍出塾。入夜濤淙淙。巡檐風飄飄。其根漱寒泉。井灤可用汲。相傳尙書第。項襄毅忠故宅老屋松陰葺。嘉蔭垂至今。計年百有冊。先生此卜居。七錄盈藤笈。懷鉛仰屋梁。謝客閉戶屐。窗前支離叟。相於若素習。空齋寂無人。蚪髻儼對揖。閒來折一枝。聊代麈尾執。妙義忘言筌。何用多曷曷。昔聞柴桑翁。盤桓落景入。真逸居華陽。樓閣三層葺。杜陵四小株。圓陰如覆笠。東岡種百枚。雨過亦戢戢。懷抱今古同。清標誰能及。伊予蒲柳材。龍門仰豈岌。松高比如何。可許阮生集。



題曹夫人玉映樓詩集

字苻賓黃星槎  
孝廉之配也

薇露傳來絕妙詞。松煤澹寫更多姿。風流詩格誰能似。陳竊辛蕭王邵之。

窗閒芳艸長于帶。樓上青山曲似眉。集中想見含豪風幔底。竹陰翠袖暮寒時。

題王琴德三泖漁莊圖

昔游三泖秋正暮。涼波十里浮吳艫。中流塔影插天半。突兀如建蓮花幢。蒼茫葭蕀望不極。半篙淨綠流淙淙。漁人此時齊結網。蜻蛉一葉張棹雙。編篔挾昌繫箬簪。扣舷樂甚歌無腔。斜風細雨波不起。時聽野寺疏鐘撞。前塵十載寄夢寐。此意耿耿誰能降。王郎湖海一奇士。潛夫作論驚愚蠢。清詞雅材追百五。勁筆直擬龍文扛。風塵侘傺不得意。便欲采藥尋老龐。故園況在長泖上。三閒老屋開虛窗。維摩十笏塵容鄰。恰喜面面當晴江。漁兄漁弟還往熟。籬根那復驚花虜。有時一棹乘興去。繫纜好在枯楊椿。背篷圓笠自攜取。得雋往往窺魚矸。金銀鱸膾味不惡。痛飲且倒玻璃缸。但見青芙蓉九朶。遠近出沒連空磴。一聲款乃交唱和。有似等瑟壘箎控。人生所貴在適志。年華晼晚同奔馳。京國留滯幾寒暑。登樓洵美非吾邦。披圖舊游宛在眼。浮家有約無虛詭。拂衣我亦竟歸去。潞河南下挈輕舲。葑中洞上好相待。可許主客圖成雙。

題王受銘比部龍湫宴坐圖

我聞天笠諾。矩羅尊者。偶來震旦。棲重巖。其東南面臨大海。芙蓉削出青巉巖。龍湫挂空五百丈。散作飛雨。何靈籤。蒲團入定。此宴坐。白豪五髻頭。彭彭六根聞。見都寂滅。齒冷饒舌。徒詰誦。誰與讚。誦禪月老。至今靈蹟傳琅函。王郎山水有奇癖。平生嗜好殊酸鹹。永嘉作客大快意。躡屐未要人扶攙。初尋靈巖入古寺。方丈四面圍松杉。探奇濟勝興不已。健步上下同躡屨。大龍湫忽落吾手。懸流倒瀉衝空嵌。有若白虹挂天半。駿馬下坂脫轡銜。投梭激箭轉車轂。霏絲卷絮堆球城。勻圓萬顆撒璣球。連縣一幅垂旒縵。廣陵觀濤賦雷雨。洞庭張樂鳴韶咸。匡廬天都恨未見。其餘下視皆卑凡。津梁疲甚一憩足。耳畔但覺音颯颯。冷然清寒沁肺腑。那惜霑濕青蕉衫。榻來燕市幾寒暑。前塵瞥眼如驚颿。閒提畫幀出示我。息壤有約神明監。幼輿祇合置邱壑。客兒最愛窮暫曩。忘歸亭子堪小住。黃精細斲攜長鑱。西來大意參慧業。生天成佛毋譏讒。它年後游紀歲月。題名重擬常苗劄。小龍湫有常鼎苗振題名。

### 送翟晴江同年還杭州

翟君逸才真希有。往往新詩敵雙井。閉門日夕耽苦吟。百鍊還同金出礦。鵬鷲高秋獨控搏。驂騑天際能馳騁。榻來長安初會面。數載神交喜合併。曲江隄柳共探春。夜雨檐花同說餅。一朝過我便分手。片葉歸颿。拏舫艫。誅茅好在屋三間。負郭恰贏田十頃。但尋沙戶相逢迎。恥向朱門工造請。家園風景況不俗。處處菰蕩雜蒲荇。南屏踏花手柳栗。西谿釣雪腰箬箬。江湖小集自足傳。那羨頭銜署臺省。人生所貴在適

意避俗快如喉脫。君今還山追禽尙。我亦夙志慕張邴。何時過訪揚嘉橋。主客圖成清話永。

聖駕東巡恭謁祖陵禮成恭紀

在鎬王居壯。子豳祖澤貽。迪光繇舊德。繼序頌今茲。納泥周原廡。枌榆漢社基。遂修時邁典。重舉上陵儀。六校鳴騶從。千屯控鶴隨。柳邊回玉輦。榆塞駐金支。納款通疏勒。傾心逮月氏。谷蠡泥首拜。頡利捧觴辭。鑿齒雕題侶。前歌後舞時。短簫朱鷺曲。槃木白狼詩。敖漢峰回互。伊松水渺瀰。星隨行幄動。月傍列營移。石鼓岐陽碣。河宗漆澤陲。天低圍大幕。野曠建長麾。怯薛呼鷹掣。云都試馬騎。艾蘭虞侯職。舍芟夏官司。長白連雲峻。升中望祀宜。高山彼作矣。列聖乃康之。四七貞符叶。三千佐命姿。澗灑宅新邑。皋應度宏規。原厖松楸古。橋山霜露思。玉衣神宛在。綃帳儉如斯。祕殿藏宗祏。豐碑拓色絲。戊辰烝祭歲。丁巳戒賓期。嚴具當軒設。鳴鐘進食遲。東廂奏安世。太祝告蕃禧。莅政黃金掇。班朝赤羽旗。九賓瞻北極。五位拱南離。視膳君王孝。承歡聖母慈。推恩真不匱。錫類總無私。禮樂神人洽。隆平福祿綏。慶成宜獻頌。額手上彤墀。

送吳挹楓

落託將歸客。牢愁送別時。臨岐猶款款。揮手尙遲遲。著錄晁公武。評詩敖器之。西沾後夜月。應照兩相思。

題同年范蘅洲比部詩卷

籍甚才名范德機。篋中秀句近來稀。月泉社裏如相識。奪取隄塵百笏歸。

家園好在賀家湖。萬壑千巖入畫圖。譜就竹枝翻古調。不教輕薄類吳歙。翼匡師伏有功臣。經笥便便洵絕倫。剩有格詩如束篋。還將慧業傲文人。

竹蒙詩格最清奇。

謂穀原比部

比舍聯吟樂不支。歷下弁山詞客盡。風流重見白雲司。

題杜太守甲相馬圖

世間何者真驍驪。九方一去誰能求。驪黃牝牡且莫辨。況從骨相論殊尤。杜公夙有王濟癖。阜莢橋頭回玉勒。估畫常懸韓幹圖。呼詩直偪少陵格。東郊風日當清和。平岡沙淺艸滿坡。奚奴牽鞵者幾輩。五花汗血高鬼峨。一馬昂首意雄傑。一馬回身工轉折。雙耳晨批隴阪雲。四躡夜蹴幽并月。掀髯撫掌氣雄哉。徑欲乘此游八垓。天生神物信有待。坐令沙苑成凡材。卽今燕南控大郡。紫綬朱駟肘銀印。牧民無改馭朽心。不假鞭笞祇靜鎮。甘棠蔽芾邨邨栽。行春五馬來山隈。兒童驂篠走相告。使君自有雙龍媒。

平定準噶爾告捷禮成恭紀一百韻

聖武恢三略。皇謨運六奇。成功惟獨斷。制勝在乘時。蒲海沙重沓。葱山路險巇。從來稱倔強。自古廛羈縻。耆定先猷遠。威稜祖烈垂。洗兵幹難水。飲馬朮居湄。繼序思皇考。宣靈愴赫曦。電矛明煜煜。鐵騎騁駸駸。解網邀寬典。包蒙廓聖規。煙銷光祿塞。戍撤拂雲祠。望氣旄頭暗。交爭蝸角岐。控弦多不靖。鳴鏑競相持。遂有瓜分勢。真成瓦解危。五原齊納款。百部各陳詞。贊謁呼韓服。朝正突利隨。龍顏瞻咫尺。鴈序列逶迤。

食甚鶡音革。遷喬鷺羽差。感恩咸蹈舞。效力願驅馳。枕席過師穩。山川聚米知。阡危情正迫。待拯踵方跂。天意誠多助。宸衷決在茲。非常承廟算。定識破羣疑。鵝鶴堂堂陣。蛟虵正正旗。牙璋諮典瑞。竹矢問工倅。燕頷元無匹。龍驤本不羈。材官揮黑稍。都尉夾長鉞。鄉導諸當戶。前茅左谷蠡。指撝驅阿跌。籌策用烏黎。獻歲旃蒙紀。中星鶉火移。初消鹽澤凍。漸解雪山澌。兩路分鑣進。曾峰入阻采。柳垂青冉冉。艸長碧猗猗。鼓角從天下。旌旄匝地麾。儲胥雲畫護。敕勒曲宵吹。斥堠風無警。飛芻士不疲。懸梯緣巖劣。拔帳出塵巖。聞說王師至。還如化雨霽。市皆安畝幕。農自樂耕耨。羌女供華鬢。僮童和竹枝。官茶嘗蠟面。搗酒醉醇醪。風定時聞柝。沙平可畫錐。受降來款款。慕德舞僛僛。自是欽威信。奚煩剖質劑。投戈胥帖伏。折箠足鞭笞。巴罕峰回互。伊犁水渺瀰。長驅猶破竹。飛渡自浮箠。壯士爭探穴。殘兵盡倒旂。何曾遺矢鏃。底事缺鉢錡。空幕巢烏樂。求林班馬悲。兔投徒趨趨。鹿走漫伎伎。五技真窮矣。三軍果赫斯。金牙擒賀魯。赤谷縛昆彌。豨突逃無地。鯨奔氣已衰。渠魁施械杻。苞蘖逮妻兒。去疾真能盡。除殘靡有遺。三年鬼方伐。六月太原師。在昔猶夸大。于今況倍蓰。氛霾激縱徼。掃蕩滌纖疵。一月聞三捷。崇朝達九逵。摧枯堪比似。壓卵信如之。寮案羣加額。君王屢領頤。如神歸睿算。用命在戎綏。異數施何渥。酬庸賞不訾。大勳惟豫順。至德更謙撝。保泰恆兢業。承乾益儆咨。明禋蒼蒼昊。愍祀展黃祇。列聖神靈祐。重光基緒丕。孫謀念詒厥。祖武庶繩其。弓劍橋陵鞏。球刀手澤詒。戊辰書祝冊。丁巳卜神蓍。琴撫空桑響。卮當宥坐敬。告成陳洎賚。述德溯豐郊。

重廣尊親義。還明教孝思。大安崇懿號。長樂晉純禧。鸞詔頒三殿。鴻恩溥八夤。康衢頻擊壤。編戶慶含飴。  
振旅軍容壯。邁歸士氣怡。山莊親駐輦。曲宴各揚觴。饌出紅螺椀。湯擎白雪瓷。芳醪浮鑿落。掾匕載雷犁。  
上將囊鞬服。名王熊豹姿。需雲占宴樂。兌澤布含孳。紫微通千障。黃圖拓四維。版章連漆齒。正朔被長歧。  
黃赤雙環極。璣衡六合儀。土圭測分寸。句股算豪釐。豎亥東西步。羲和昏旦推。廣輪窮道里。準望定高卑。  
銅柱銘勳地。橋門飲至期。摩厓鐫篆籀。勒石負躡蹠。倬彼瞻雲漢。昭茲拓色絲。湯盤孔鼎作。金檢玉符基。  
天錫仁兼勇。神符軒與義。六韜歸掌握。萬里中機宜。方略璇圖炳。編摹柱史爲。高文垂誓誥。鉅筆染淋漓。  
王會陳籙露。昆侖貢織皮。上林栽苜蓿。大子舞侏儻。鴻業昌而熾。明堂坐以治。鏡歌擬朱鷺。願侑萬年卮。

此页空白

# 潛研堂詩集卷四

## 丙子春帖子詞

綵樹千花放。僊萼五葉敷。青雲鋪似錦。春蚤是皇都。天街綠意蚤萋萋。殿上銀幡入賀齊。幾日甘泉揮書報。春風先到玉關西。

## 題李西華給諫賞番圖六首

奇絕平生此度游。長風駕浪送扁舟。從來不信譚天衍。真到婆娑第一洲。青螺澳外鳳山偏。頒賞諸番例久沿。麻達暹郎襁負出。一時羅拜繡衣前。轅門初啓曙霞分。意氣軒軒屬使君。帳下健兒紛夾侍。試將蠻語問參軍。禾閒高下足官租。織就戈紋新樣殊。風俗依然是唐魏。不知身已度澎湖。輜軒別國足清探。蠻俗方言略已諳。狀出南中開艸木。咫聞端合傲嵇含。天南盡識相如節。海外爭傳玉局詩。重遣吳裝圖粉本。烏嵌城下賞番時。

## 題吳冠山編修洗竹圖

無竹令人俗。此語古有之。但得青蔥峭。舊落吾手。那用千戶封侯爲。主人雅負子猷癖。十笏小築谿南宅。



平泉花木百不愛。獨放叢筠數竿碧。上番移種春方酣。駢頭戢戢多于蠶。堅中筴中細分別。凱之舊譜粗能譜。亟攜鴉觜鋸。自闢百弓徑。蒙密一以除。娟娟新綠淨。疏篁瑟瑟靜。可聽輕風敲。憂響不停著。書風幔日卓午。惟見萬个攢空青。燕郊庭際只消三兩竿。便覺衫袂生清寒。何如家園千畝疏影合。我欲從公親授洗竹法。

移寓珠曹街與禮堂夜話

殘氈斷帙舊柴車。畫裏邨夫子不如。僂指桑根幾度宿。五年光景七移居。

予以壬申六月至都寓繩匠街衙十二月寓艸廠衙僧舍癸

酉二月寓潘家河沿九月寓椿樹衙乙亥二月寓憫忠寺街六月寓橫街至是凡七移寓矣

積潦晴餘聚白沙。新蒲雨後迸青芽。荆高酒伴如相訪。白紙坊南第一家。刻燭論心水乳投。廿年親串意綢繆。前身兄弟機雲似。仍占東西屋兩頭。圍爐鐙火夜團圍。丈室居然夏屋寬。爨婢奚奴無彼此。兩家原當一家看。團焦小小類吳艤。茶竈藤牀蠟屐雙。先算安排筆硯地。棗花陰裏讀書牕。題裘漫士少宰苑東寓直圖

去天尺五苑東偏。休沐歸來步屨便。員嶠蓬壺在人世。風光真不數平泉。風前踈地萬垂楊。曲棗橋通宛轉牆。不信軟紅香土裏。神僊仍占最清涼。

樓外偏宜煙雨冥。西山窈窕入簾青。分明著色鑿頭景。一幅天然好畫屏。  
趨臺西畔有新廬。履道坊南宅不如。公賜第在長安右門西應爲城居少花竹。天教銷夏此閒居。

溫宜春更澹宜秋。避暑方知此地幽。載得碧筩三伏酒。菱荷香裏蕩扁舟。  
棐几牙籤次第排。清風朗月見公懷。若爲評隲林居勝。應較秋屏閣更佳。  
溫室從容造鄴陳。長源僊骨是前身。金蓮燭外雙騶引。傲煞東都獨樂人。

恭和御製懷柔縣元韻

郊圻駐翠輿。羽衛肅周廬。初旭林梢出。朝霞天半舒。紅螺峰繞髻。白水溜通渠。望幸諸童叟。康衢定跂予。  
恭和御製遙亭行宮對雨元韻

浙瀝遙亭雨。空濛行殿秋。層峰疑半隱。薄霧未全收。細溜松閒響。飛泉樹杪流。清塵應有意。先爲灑山郵。  
疏疏還密密。靜聽不知煩。最喜連畦潤。兼聞時鳥言。天當雨後爽。節爲閏前暄。明發龍旂動。先驅度塞門。  
四山飛瀑布。一帶辨炊煙。對景真悠爾。披襟益曠然。宸章裁綠字。御墨灑瑤箋。預卜明朝霽。羲和曉振鞭。  
恭和御製出古北口詠古元韻

雄哉留幹嶺。設險有重關。地控神京臂。大連古塞山。百尋攀磴上。一綫劃崖閒。鉤抱長城峻。縈回九折艱。  
唐家乘障戍。漢使戴星還。誰似皇圖遠。清風鼓角閑。

恭和御製至避暑山莊卽事元韻

到處林亭宜入畫。望來巖壑宛疑僊。激泓水似空明鏡。峭蒨山當翰墨筵。滿眼禽魚皆至樂。會心艸木有真緣。昇平中外承嘉讌。好待深秋羽葆旋。

恭和御製熱河啓蹕之作元韻

秋郊新霽啓行時。發軔僊莊歷廣達。山路平開紅樹裏。人家半在白雲涯。輕風迤邐隨龍旆。曉日依稀擁翠蕤。扶杖邨農頻額手。停輿問俗每遲遲。

恭和御製山店元韻

連邨結構總天成。半是山樵半是耕。疏柳千條遮酒幟。澹煙一抹露柴荆。馬頭遠近青螺繞。木末參差候鴈征。有象太平宜入畫。豫游處處愜皇情。

恭和御製都爾伯忒台吉伯什阿噶什來覲封爲親王詩以紀事元韻

納款弟從兄。承恩襲組纓。渾邪泥首服。疏勒革心誠。湛露三巡洽。分茅五等榮。聖朝懷遠略。陋彼渭橋盟。

恭和御製入崖口元韻

不用河江遠結陸。塞山歲歲奉鑾輿。四圍列陣雲成幕。一綫嵌空石作閭。小隊呼鷹鞞脫蚤。平岡試馬艸肥初。渠搜諸部頻來覲。翹首瞻雲恐後予。

恭和御製雨獵元韻

木蘭校獵何雄哉。羽林萬騎如雲來。批熊拉虎尋常耳。況乃鹿友與雉媒。六飛乘秋一莅止。長楊上林何足擬。乍覺雲頭冉冉迎。有時雨脚垂垂起。艸柔沙軟彌可喜。發蹤只如臂使指。周官大獮典所詳。王道山來無懈弛。卽看一矢射天狼。魚海洗兵兆應此。

恭和御製霜元韻

山迴寒偏蚤。清霜乍降時。白沙渾不辨。紅葉最先知。暗拂昏鴉翅。平添疏柳絲。含豪傳睿藻。遙向五雲披。恭和御製行圍卽事元韻

森嚴羽仗自天來。雨霽重嵐掃碧埃。控鶴三千神策士。飛龍十二上襄材。令懸旌旆和門合。陣布風雲大幕開。共識聖人親講武。不煩司馬戒銜枚。

野闊天高九月秋。伊松河上塞風遒。玉鞭乍指祥煙拂。紫幄初開瑞靄浮。雲入望中皆澹蕩。山當佳處暫停留。廣成欲進詞臣頌。詰屈空慚短韻搜。彌山絡野勢分張。變化神機自廟堂。蕃部傾心瞻法仗。降王泥首懾天綱。握奇齊列龍蛇陣。懷德遙迎日月常。頻見玉關西奏捷。攙搶掃盡國威揚。

恭和御製蕃劍行元韻

清波淬鏢激寒塘。流星迸采飛電芒。細觀不類昆吾鑄。渠搜作貢輸尙方。天山之西雪嶺外。重巖百折如羊腸。四衛拉特舊屯據。夜郎自大矜豪強。控弦十萬隨指噉。谷蠡左右紛成行。就中有人最趨捷。雄視吐渾兼燒當。橫磨霜劍新出水。按鐔四顧非尋常。傳聞風雨匣中吼。恍惚變怪難具詳。分爭廿載彈指過。電光石火寧久長。此劍豈有神護守。不隨兵燹俱銷亡。一朝持獻詣闕下。從官傳視趨紫閭。由來神物歸有德。什襲合備天家藏。什襲合備天家藏。熊熊魂光氣騰未央。

恭和御製晚荷元韻

亭亭標格壓羣芳。秋晚猶開十里香。依約風前明月佩。參差鏡裏絳綃裝。僊肌自醜能離垢。素節何妨獨傲霜。畫手崔吳應未識。溶溶祇傍玉波長。

恭和御製宴土爾扈特使臣元韻

重巖詰曲路極乂。行盡昆侖萬里賒。受吏願同烏弋國。承恩許賜綠雲茶。占風所至寧殊俗。懸度能通總一家。自是至誠無不屈。非關拓塞徧幽遐。

恭和御製雪元韻

乍深乍淺雲圍幕。宜整宜斜雪散絲。始識僊居在人世。瑤田瓊樹只如斯。不愁落葉連山積。還有繸花著色開。雪後塞垣無限景。天工留待聖人來。

萬樹綴來珠的皜。千峰疊就玉嬋娟。此中疑到光明國。慧業重參清淨緣。

恭和御製允南省諸臣之請于明春恭奉皇太后再舉時巡詩以紀事元韻

年年宵旰軫斯民。載舉虞家典四巡。長奉慈顏娛太妣。克繩祖武繼高辛。天低牛斗星遙接。地入徐揚境是鄰。獻賦昔時真忝竊。重逢盛典感恩頻。

恭和御製固爾扎廟火用唐韓愈陸渾山火和皇甫湜韻并效其體之作

玉關以外逾羌渾。伊犁之水無盡源。洪波齋淪自吐吞。上有祇林高以軒。齋魚粥鼓香薪燔。刹竿百尺凌遙原。部婁輒敢矜厚坤。問誰剏建來西垠。瓦刺遺孽盜塞垣。彎弧鳴鏑窺花門。張眼不識扶桑暎。爰爰者兔啾啾。嘯聚蜂蠆驅魚鼈。腐鼠漫欲同游鶻。眈眈虎視兼狼奔。一傳而後彌自尊。鳩材爰構祇陀園。苾芻優婆類實繻。偏袒膜拜咀誦喧。法螺鈴鐸閒箎埙。蠢爾詎解參風旛。失笑何異蝨處禪。梵相殊詭露肘臂。鳩荼藥叉旁挾轅。天魔鬼母弓垂韃。人非人等塞朱幡。廟門空爾颺風帟。神不顧饗其脈騰。前年王師戊巳屯。日昭昭兮照戴盆。蕃落鞠臆陳酒罇。彼狡豎罪何可言。煽誘黃帽心覆翻。干上帝怒難平反。祝融承命賴兩暖。除惡務絕其本根。一花五葉紛兒孫。若冠有綏履有跟。合掌不知報佛恩。迅掃惡業還真元。轟礮碎礮不可援。懲汝助逆并案論。雷車虹靄燭九闕。青紅像設無留痕。天意褫爾貳負魂。膽裂魄慄心煩冤。犇竄大宛難久存。宵無慮帳朝無殮。烏合數輩豈世婚。王師再舉出堅昆。布陣雲立還山蹲。怪鴟那

許飛騰。蹇渠魁。斯得士雪怨。誓批猊。踰屠鯨鯢。大書深刻銘崑崙。日月所燭警昧昏。除殘不愁玉石焚。天人感召非虛煩。迷瞽罔覺心爾捫。

帳房四首

斜支布幕當團焦。小幟風前各認標。椽杙丁丁張鴈翅。奚囊一一卸牛腰。破寒乍爇圍爐火。跌坐眞成放帚寮。彷彿春江煙水闊。圈篷船泊短長宵。直將大地作蘆廬。野曠沙平展幔初。半面放開延月入。四圍密釘避風疏。道旁築舍成偏易。岸上牽船景略如。家具比車還覺少。莫嫌一日一移居。卷舒隨分占山坳。行處還從馬後捎。豁爾便疑林屋洞。呀然只類惠施匏。三竿日出俄成集。五鼓鐘敲各打包。身作社前飛燕子。偶然得木便營巢。與我周旋有幾春。團欒鐙火夜分親。都嘗風雨冰霜味。長伴東西南北人。上銳下豐伸脚穩。前軒後輕打頭頻。往來細把光陰數。鴻爪泥中幻亦眞。

御試賦得夏雲多奇峯

藹藹層雲合。蒼蒼遠嶂重。垂天纔一縷。拔地忽千峰。乍作凌虛勢。仍含出岫容。卷舒排玉笏。突兀簇芙蓉。卓立全開面。光明欲盪胸。懸崖疑似鷲。觸石宛如龍。萬壑空中落。三山海上逢。御園晴眺處。歷歷翠微濃。

送蔡葛山少司寇請養歸里

廿年稽古被殊榮。清望西曹冠列卿。海內文章韓吏部。昌黎由刑部侍郎遷吏部故云閩中人物蔡端明。由來勇退根僊骨。況是陳情出至誠。歸到北堂萱葉蚤。小春已見惠風生。

起居八座古來稀。樂地偏于名教宜。綵服回風依鄰下。板輿置酒趁花時。一行帶艸康成里。六首陔蘭束皙詞。祖帳都門傳勝事。如公真不媿經師。

蔡少司寇觀海圖

騶衍譚九州。奇詭不可稽。海外環以大瀛海。阿誰津逮窮端倪。先衛卜居近海上。三神咫尺堪攀躋。讀書要窮萬里目。官令局促同測蠡。太武峰高接縹緲。五更直上青雲梯。天風浩浩海水立。光明世界堆玻璃。怒濤砰磕自奔湧。有似萬馬爭鳴嘶。海若游戲劇狡獪。撞鐘伐鼓振鐸聲。須臾一輪出鏡面。樽桑隱隱枝柯低。茲游奇絕足千古。下視河伯猶醯雞。十年移家住人海。蓬萊侍直趨金閨。文成懸河瀉萬丈。導源星宿注百谿。夢游時落滄溟外。忘機欲狎鷗與鷺。竭來一權賦歸去。釣游舊跡今不迷。九十九山青滿眼。櫻鞋筇杖相扶攜。壯觀重作第二卷。裝池珍重開黃緹。

自珠巢街移居宣武門外題壁

真似山僧慣打包。桑根三宿等閒拋。勞如車軸無停轉。拙比林鳩未定巢。市近米鹽喧耳畔。客疏塵土積



堂坳年來學得安心訣。容鄰三閒卽樂郊。

金鐘越秋江擁櫂圖

兩三株樹風瑟瑟。四五尺水秋淙淙。天邊賓鴈落幾點。沙尾母鴨飛一雙。煙波叟蓑笠小影。猗玗子款乃。舊腔菊花黃酒獨自酌。醉著高枕烏篷窗。

送座主海寧相公子告歸里卽次留別元韻

清望朝端孰比肩。溫公事業潞公年。丹霄地峻擎中極。黃閣班高領列僊。北闕上章陳雅尙。東門祖帳賜華筵。春風安穩三千里。看徧江鄉蔗芋田。

近光常被日華臨。黃髮番番在禁林。應變守文真相略。立誠主敬大儒心。明農歸去留姬烏。洞酌歌來矢召音。手補袞衣無闕事。太平元老合抽簪。

三朝珥筆侍彤廷。舊種槐陰已滿廳。絳帳論文清似水。朱轡開府福爲星。卷舒自在春雲藹。衾影無慚夜火熒。儒術致君從古少。韋平家世有遺經。

午橋水作珮環鳴。丞相安車取次行。到處吟風還弄月。陪游張丈更殷兄。黃花晚節秋逾潔。海鶴精神老益清。料得平泉閒撰杖。肯忘曳履殿頭聲。

秦華高峯大海瀾。樂全邨要九還丹。千秋道脈承非易。一點靈臺畫亦難。謝闕更聞頻替秩。詔加太子太傅。賜閒

未許竟休官。

特令不  
必開缺

臨行鄭重頒天藻。袖有驪珠拜手看。

栽成桃李已經年。得御龍門喜欲顛。雪夜每參洛下座。菱谿常預醉翁筵。清銜漫竊同冰冷。學道無能媿火傳。遙望台星滄海上。從游何日重殷然。

### 海寧陳文勤公輓詩

赤舄三朝望。蒼松百鍊姿。獨能扶直道。真不愧台司。寂寞還鄉夢。淒涼墮淚碑。它時言行錄。應與富文垂。

### 題盧紹弓編修檢書圖

書齋十笏清且佳。丙丁甲乙牙籤排。主人謝客門不闔。尙友直與先民偕。丹黃鉛槧不去手。盡掃風葉無纖霾。自從二篆變隸楷。豕虎轉寫多參差。有宋以來雕板盛。南閩西蜀逾江淮。咄哉俗生不自量。叫噪埽井官私蛙。金根銀鐙私竄易。坐使真本嗟沈埋。以茲繆舛貽末學。猶以烏喙投積痰。日思誤書乃一適。子才所見何其乖。先生博雅由天授。上窺姚姒追皇媯。百家七錄咸瀏覽。夜分雜誦然麻稽。平生汲古得真諦。屏除俗說刊淫哇。觀書如月靡不燭。峩然洞中竅會皆。刊誤真笑李涪陋。正俗切與顏籀儕。一瓚借鈔倘見許。儼屋恰近春明街。

### 送毛伊人檢討還萊州

同年五載又同官。意緒纏綿有萬端。忽聽驪駒初戒道。教人真數別離難。

著書善病亦吾徒。膠漆酸鹹略不殊。寂寞西窗舊時燭。更誰主客譜新圖。  
金薤遺文世少知。從君一一剖然疑。不知天柱山南望。可有滎陽第二碑。  
石刻何人辨糾紛。唐公德政拓遺文。如何靜治堂中錄。只說萊州于府君。  
孤瘦真如病鶴身。掉頭歸去理漁綸。頭銜仍領承明署。未是行吟澤畔人。

石鼓

岐陽石鼓其數十。至今遺碣留橋門。甲乙迄癸分左右。古色斑駁倅敦顛。團團柱礎忽中斷。纍纍覆釜當階蹲。磊塊面凹似杵裂。彭亨腹果欲手捫。鑄饒歌詩垂不朽。三百字比千瓊璠。奎斗墮地芒爛爛。蛟螭擎雲形蜿蜒。文斜時作倒薤勢。苔缺半露屋漏痕。田車旣安宮車寫。右驂隳隳左旛旛。小大具來樂天子。吉日丙申蒐于原。鹿雉兔旣狘蜀。其來趨趨咸毆奔。禮成歸格禘嘗享。獻用太祝陳脈膳。摛詞似出吉甫手。車攻常武齊肘跟。況兼史籀筆蹤古。天矯鸞鶴雲中騫。蟲書禾穗法始變。下視斯邈皆兒孫。斤權毆豸強分別。一笑辨口徒瀾翻。岫嶰禹篆跡茫昧。好事摹拓猶紛緼。銅盤殷銘壇山字。亞駝詛楚多謾言。三代遺文漸漸滅。歛忽過眼雲煙屯。歸然此鼓獨無恙。四千年物能久存。自雍移汴入燕市。歷恆沙劫如晡昏。金石集錄此最壽。獨立誰與爲弟昆。成均位置特帖妥。深檐大廈繚以垣。鐘鏞絳籥共陳列。永鎮竹素千秋園。平生愛誦韓蘇句。橫空奇語恣騰掀。作歌媿乏懸河舌。布鼓敢向雷門論。

送禮堂學士典試福建

玉尺真煩大匠持。八閩迢遞使車馳。日空已盡驅黃種。手植都成桃李枝。朝望歐陽真學士。文壇孟縣是宗師。僊霞嶺上新秋路。天遣留題絕妙詞。

奉命典試山左出都述懷

容臺宣詔出明光。相馬真慚比九方。濟上定多名下士。岱宗況是聖人鄉。沙平冀北停行騎。月落盧溝趁急裝。卻憶十年前此日。蹇驢席帽大功坊。

自良鄉南行遙望大房諸山口占

無心舒卷暮雲還。百里諸峰鬪髻鬟。貪看大房濃翠色。涿州南去更無山。

涿州二首

舊宅樓桑在。祠宮闕古苔。千秋比豐沛。遺恨不重來。  
潞涿君誰是。狂生語太譚。西州求士日。何意忌芳蘭。

卽目

蒼茫平皋路。停鞭四望餘。乾沙疑積雪。古道半成渠。秋思聞蟬後。人家剝棗初。冷然風乍過。殘暑已全除。

白溝河

我行白溝河。鱗鱗綺塍接。遙見稷與黍。有穗無一葉。停輿問田叟。蹙額久乃荅。飛蟲昨者來。紛若蠟毛集。葉傷心已枯。安能結寸粒。之蟲夫何知。蠕蠕仍戢戢。風露恣汝餐。謀食胡太急。中飽曾幾時。撲滅行自及。物性固如斯。令我增喟喟。

過河間城外居民有種棉花者

吾鄉木棉大于蠶。每到秋收鬪比鄰。今日河間城外路。眼明如見故鄉人。

贈梁秀才用梅

秋碧風流擅一時。謝家玉樹有孫枝。門才共數烏衣巷。藝苑新傳白雪詞。清似冰壺真見底。澹如春竹自多姿。探奇況具歐陽癖。響榻摩挲辨色絲。

梁秀才以秋碧堂帖見貽賦荅

泰山流落一豪芒。過眼雲煙詎易忘。自到平泉留祕本。人閒不數戲鴻堂。

東方朔

奏牘三千墨未乾。歲星幾載住長安。一囊奉粟饑須忍。怕作將軍食馬肝。

匡衡

說詩妙處解人頤。牢石同朝默不知。但服儒衣稱醞藉。李微陳惠亦饒爲。

人獲生遼左。補中功殊特。一莖重五銖。白金一鎰直。良醫憫我衰。苦勸厲聲色。家雖無甌石。孰與身命亟。假貸猶足支。何苦自遴嗇。服之勿遲遲。後悔無終極。再拜謝醫言。生死匪藥力。上藥果活人。誰游不死國。維揚富家翁。儲篋當蓐食。用之或失宜。大限在頃刻。昨聞田家嫗。百歲髮尙黑。有病不求醫。三極眼未識。多病

多病方求道。端居且避囂。無心調息訣。不寤讀書宵。舌以柔難敵。松因勁後凋。南華養生主。第一是逍遙。

題張憶孃簪華圖

圖藏繡谷蔣氏

裴履風流宛舊時。綵雲化去杳難追。何人解喚真真畫。有客爭題好好詩。一枝春到髻雲邊。盡道呈花臉更妍。不遇才人洪玉父。千秋那得小名傳。珠喉一串案紅牙。好事爭迎油壁車。怪煞休文歌六憶。不曾相憶到簪花。春風繡谷列金釵。細步纖纖引上階。六十年來傳本事。青衫紅袖說蘇齋。

我有青衫無限淚。與君紅袖一般多。蔣樹存題句也。

此页空白

# 潛研堂詩集卷五

## 回部蕩平大功告成恭紀一百韻

西極功成聖武揚。紫宸稱賀集冠裳。黃圖遠關堅昆塞。朱鷺重歌魚雅章。日運萬幾逾業業。星馳八陣總堂堂。神謨有濯高三捷。盛事無前邁一匡。纘序兩朝欽至孝。宣威往歲定遐荒。天山雪霽銷烽堠。碑嶺霜寒試劍鏑。執馘虎臣齊矯矯。射生騎士竝泱泱。屯田已過伊犁水。乘障無煩都護防。渭上呼韓初築邸。殿頭頡利許擎觴。靈臺測景分昏旦。重譯占風共享王。勃律陪臣瞻日角。洛那侍子覲天閭。傾心內向同葵藿。汗血牽徠盡驪驪。大閱和門旗正正。山莊曲宴露瀼瀼。三階常朗星從斗。八表攸同網在綱。翮彼飛鶚猶食葦。蠹茲黠鼠漫跳梁。花門雜種原無定。大食分支杏莫詳。俗尙高車傳自魏。派承回鶻衍由唐。兩酋項領依蛩。窮塞么麼轉蝓。蛻兔首頻年隨籠絡。推枕一旦脫銀鐙。何期狼子心終野。俄見螳螂臂已攘。伏莽頓施蜂蠱毒。控弦欲任鸞鳩搶。六軍聲罪詞嚴正。七萃邁行氣激昂。分遣材官傳羽箭。還咨典瑞下牙璋。上襄齊聘金羈勒。小隊爭裁鐵繡襜。初抵庫車申討伐。羣看禁旅競騰驤。摧枯屢振稜威壯。漏網翻令小醜颺。改命師中謀上將。爰攜麾下度連岡。鷹揚衛士材無敵。燕領元戎勇莫當。傳檄諸蕃皆潛伏。款關百部效趨跄。阿蘇郭外浮醕酪。烏什城邊獻柘漿。鄉導前驅探虎穴。諸軍深入歷羊腸。奔驛踰伏應無



地。瘳犬狺。獒尙逞狂。四面崇墉遙屹屹。一麾徑渡正茫茫。流星隊隊鳴鶻急。掣電聲聲激石強。奪槩甫微人伉健。揮鞭偶值馬元黃。列營仍占層峯險。築堡旋當黑水傍。撼似岳家軍不動。守如墨翟應無方。連宵格鬪空峇勁。排日鏖兵擊鼓鏜。不數耿恭求井拜。還勝道濟唱籌量。軍書絕域傳郵到。廟略先幾握算良。五校赴桓已蚤發。八旂健銳各分行。蘆笳響遠吹邊月。鐵甲光寒踏曉霜。兩月兼程經瀚海。先春轉戰度河湟。前茅稟旅紛超距。後隊驕驍亡脫韁。入夜斫營風獵獵。平明合隊氣橫橫。徒跣突鬻徵吾壯。隴種籠東晒彼恇。共計大助侔破竹。始知秘策比探囊。休兵暫命三軍駐。制勝誰能一旅亢。投石驍騰交習鬪。飛芻絡繹每因糧。裹餽餉處頻盈橐。抱布歸時恰滿箱。略地和闡揮短稍。屯兵玉隴奮長槍。遙知山壓無完卵。蚤見瓜分剩破瓢。引脰鏡中方悚惕。游魂釜底益倉惶。驚弓漫訝飛鳶墮。鉞險俄傳駭鹿忙。遠挈妻孥行彳亍。盡攜輜重走踉蹌。名城次第來降表。伯克趨迎夾道旁。日月無私歸所照。雲霓有象久相望。酒漿戶戶盛罇缶。糗果家家載筥筐。樂德共聞歌宛轉。承恩翻使涕淋浪。逃疏何幸霑皇化。撫字重煩奠此疆。令甲新頒人皞皞。先庚申命澤滂滂。丁中黃小皆登籍。黍稷梁稊競築場。吉貝花繡勝南粵。蒲萄子熟似西涼。青蚨改鑄司農式。赤鋌仍輸少府倉。遂使窮荒分尉候。長令編戶樂耕桑。犁庭已見龍沙靖。躡影難容獸迹遠。捷比票姚征遼濮。健踰充國定開羌。衝堅竝放千鈞弩。剷逆爭持百鍊鋼。突騎登山凌巖崑。神槍臨淖震雷礮。千夫賈勇整弧舉。萬衆呼降龍纛張。鼉兔投林空趯趯。飛蛾赴火漫佹佹。遐方延踵咸歸

化蕃部同仇共侮亡。捧檄纔教擒猥獠。援戈親爲殪封狼。三驅冑使前禽失。壹發頻看大兕戕。疏屬尸方  
械貳負。專車骨已折。汪芒搥喉真快人心。憤懸首還將國法彰。進表稱臣趨魏闕。訊囚獻馘到虞庠。從茲  
遺種殲芽蘖。永見新畬絕莠稂。露布明駝馳遠徼。星躔侯瑄應初陽。握樞乙夜垂衣肅。送喜千官佩玉鐙。  
師克在和嘉衆帥。功成惟斷仰吾皇。天休滋至時難失。祖烈丕承動必臧。直拓提封周二萬。獨恢大略軼  
尋常。園壇昭告瞻顛若。清廣升禋倍肅將。諏日陵園陳鬯卣。分曹嶽鎮禮琮璜。百神咸秩隆儀舉。三殿親  
臨鉅典煌。聖澤普霑高以厚。慈寧齊祝壽而康。南薰解慍仁風扇。北陸迎長淑氣翔。異數酬庸增爵秩。近  
郊宣勞奏笙簧。析圭已荷盼茅土。賜馬羣看簇繡瓊。蒲海沙平明似雪。于闐玉美白于肪。洗兵欲輓銀河  
水。度索應通濛汜鄉。鉅製伊西鑿壁嶂。鴻文太學炳琳琅。捧來薤葉芝花潤。拓取銀鉤鐵畫裝。允矣豐功  
垂宇宙。咄哉浮議沸蜩螗。一篇特啓羣言惑。五載眞勞睿畫長。燕翼有謀貽列聖。至誠所感協穹蒼。乘乾  
惕惕惟無逸。保泰孜孜自不遑。豫順行師功莫尙。謙尊下濟德彌光。宣饒願譜昇平曲。拜手陳詞獻未央。

己卯除夕

謬占金閨籍。于今歲八除。思親頻佇望。報國愧迂疏。病久無良藥。家貧少異書。光陰敲石過。太息負三餘。

初春懷鄉雜詠

郭澤塘南顧浦西。

水東日記。范石湖爲李結記。潘塘浦云。浦有五。曰新洋江。曰小虞。曰下張。曰顧浦。塘有三。曰郭澤。曰七丫。曰至和。

吾宗四世卜幽棲。肥田屋後

秧針細。漲水門前蟹。齧齊市小數家成。一闋酒醜有戶借偏提。官租輸了無它事。饋歲紛紛筓榼攜。土風瑣碎記邨氓。故老相承例莫更。偃子驅邪蒙紙面。鏘童祀竈爇鐙檠。支門炭取長身立。印砌灰偏巧樣呈。拜節家家總相識。不須半刺更通名。

人家大半住茅茨。木几藤牀位置宜。黃皺香椽裝定武。紅凝天燭插軍持。春風游屐徐公浦。夜月神絃英布祠。吾鄉以英布爲土地神。傀儡登場纔過了。盲兒遮莫又彈詩。

人日元宵興不孤。小時了了記歡娛。燒鐙巧解藏頭謎。對局偷拈謁選圖。潘叟蹋歌宵按板。陳孃貰酒午當爐。橋東巷北嬉游地。二十年來夢故吾。

題倪敬堂同年西谿探梅圖

桃李漫山未足珍。橫枝數點逗先春。天然清瘦非凡格。比似先生骨性真。橫空嫩蕊簇疏枝。彷彿西谿入夢思。共羨齠花滿頭插。幾人賞到未開時。樸學君家世澤沿。黃門介操憶當年。七清妙墨依稀在。要與茲圖一例傳。

恭和御製三月朔日御殿定邊將軍兆惠副將軍富德等率成功諸將士朝謁詩以紀之元韻  
金殿晨開鷓鴣排。六師大獻愷歌皆。分茅列爵周三等。舞羽敷文舜兩階。蕩蕩天門初日啓。依依楊柳入春佳。行閒將士羣羅拜。其喻投醪聖主懷。

恭和御製上巳日凱宴成功諸將士元韻八首

青郊宣勞禮言旋。王會新開西海壖。五載豐功天祐聖。萬全成算聖因天。洗兵魚海龍沙外。張樂流觴曲水前。嘉讌昇平當此日。春臺何地不熙然。

澹蕩韶光春事深。連茵曲宴集華林。食苹鳴鹿來郊極。在藻游魚戲水潯。九奏鈞天人既醉。八風妙舞樂難禁。手檠瑤舜樹初徧。要識分甘聖主心。

玉關新柳正垂垂。壯士長驅入塞時。犒賞百千沾闔澤。登咸三五慶昌期。饒歌試譜伊涼曲。鼓吹新翻洵寶詩。繩武由來追祖德。百年豐芑念留貽。

屈指師行暨凱旋。輸將幾歲荷除蠲。握奇乙夜義軒略。推轂三軍衛霍權。往矣冰霜酣戰地。來思花柳暮春天。回中伯克全歸附。葱嶺西徧執訊連。

瓊筵曉啓趁芳辰。飲至論功巽命申。五等析圭先燕頤。千官獻壽近龍鱗。卻從鱗甲橐弓日。爲念披堅執銳身。感激一時齊額手。臨觴猶軫結纓人。

生長行閒荷聖憐。從征親到雪山邊。眞逢采玉于闐國。快覩竿頭涿鹿年。拔幟名城誇捷。執爻絕徼盡精堅。卽今秋杜歌成日。譜入南薰叶舜絃。

纏頭別部向風歸。羅拜華裯初日暉。盡識軒轅通道遠。方知光武閉關非。金人捧劍剛修楔。玉塞韜弓遠

集禩大食刀環爭入貢。天戈從此已停揮。  
三日風光朗更清。禮成上壽聽呼聲。勛名眞見圖麟閣。賞勞頻煩酌兕觥。錫宴周京多受祉。詰兵禹迹克方行。欲知討叛綏邊略。保泰淵衷在不盈。

恭和御製塞宴四首

名馬數百皆龍媒。牡者四驪牝者騃。誰其騎者惟嬰孩。控之曾不施銜枚。神鎗一聲殷若雷。翻身上馬寧徘徊。風雨驟至急箭催。砰礮振蕩何喧豗。直下峻阪凌曲隈。四蹏飄瞥無纖埃。二十里外往復回。如響斯應。彈指纔就中卅六。尤傑魁觀者咋舌驚且哈。詐馬舊俗有是哉。至尊顧之歡顏開。宣敕頒賞陳觥疊。名藩小大紛具來。拜手敬進萬壽杯。右詐馬

天淨秋高張大幕。頭鵝宴中什榜作。蘆笳羌笛應節鳴。亦有箏琶雜弦索。將進酒。遠如期。當筵自奏樂府詩。陛下之壽千萬歲。東臣元菟西月氏。前有緩聲後有促拍。颯颯入耳太古音。不減撻金與拊石。敕勒企喻古所傳。白狼慕德共勉旃。况今龜茲諸部盡內屬。西涼散樂更進破陣篇。右什榜

高秋曲宴紅氍鋪。布庫之戲古所無。壯士脫帽膽氣麤。先聲直欲吞於菟。空拳搏蹕兩兩俱。騰蹕撇捩百變殊。角力以智分錙銖。失勢一蹶愧弗如。何人得雋酌以觚。整暇自謂可賈餘。彼哉厄魯亦善鬪。坦腹跣足不巾袖。老拳怒臂發以驟。使氣氣出若饋餽。強者植立弱者仆。伏而鹽腦亟相就。屈肩著地昂其脰。有

覲面目悔大繆。勝負既決斯放手。曰四衛拉俗之舊。吾皇顧之樂且康。何以予之蒸黃羊。天厨禁饗大嚼忙。以手爲箸腹爲囊。鞠膾再拜頓地搶。食指不動已十霜。一飽何幸在帝旁。天章頒示紀事詳。昇平同樂誌不忘。右相撲

平原如掌水艸肥。驅來駿馬各不羈。滅陽第方類自別。升甌上阪隨所爲。誰與少年雄且傑。短後之衣長竿掣。翻身走馬疾于飛。欲使生駒就銜繼。雕鞍繡勒色樣殊。控紮未及跳擲俱。有如負奇跣跣士。倔強不受人閒拘。飛揚跋扈驥且急。有時豨突作人立。乘閒直上跨其顛。持之以暇久方習。八尺曰馘七尺騾。追風躡景游八垓。乃知駕馭得其道。上襄詎乏飛黃材。維昔周官訓馬政。佚特攻駒順月令。卽今塞北多名藩。善馬調來千里騁。至尊九月行獮田。割鮮行賞排長筵。庾人閒試教馘法。小雅兼陳攷牧篇。况聞天馬來徠西極。大食康居歸有德。不是君王神武姿。絕域安能服羈勒。右教馘

恭和御製行圍元韻

平林呦鹿自咩咩。六轡安行不動塵。鼻嶂環來成帟幕。周陞結處儼城闐。材官共試批熊技。蕃部新攜回鶻人。咫尺天威齊額手。塞垣肆覲拜恩頻。

舍芟張羅各有司。名王扈從遠如期。天開靈囿規模壯。山入深秋眺覽宜。壹發其欣威遠振。三驅仍示惠兼施。承平詰武還綏遠。豐芑貽謀監在茲。

恭和御製哈薩克使至俾觀園元韻

葱嶺西偏逐艸居。獻琛久已隸方輿。六師韎韐歌瞻彼。萬里郵籤蚤跋予。特敕陪臣從捺鉢。重教獵士布周陝。漢家漫詔長楊賦。蕃使來觀詎有諸。

九日同習庵舍人叔華上舍晦之弟游城南登陶然亭

不到城南五載餘。軸簾真似蜀嚴居。登高偶趁重陽節。結侶同乘下澤車。淺水牛涔經雨後。遠峰螺黛勝春初。聽來吳語真多味。曾是當年共隊魚。

十笏閒亭曲徑旋。到來便覺避喧闐。三秋鄉夢囊萸後。一段詩情落木前。廢廠尙傳宣德樣。古幢細認壽昌年。卻輸扈從灤陽客。直上興安絕塞巔。謂禮堂光祿。

送孫勛堂之官皖江

曲江簪取一花新。便縮銅符出牧民。名士何妨工製錦。甘霖况是果隨輪。底須譜自山陰授。會見名逾漢吏循。說與孫廉兩字訣。它年惠化定如神。

苔施鐵如上舍見贈之作用山谷東坡贈苔詩韻

寸田不自耕。坐成荆棘場。活水來有源。斯涵千頃光。衆卉亦蒼蔚。所愛蘭蕙香。幽谷本無言。登之宜嚴廊。彼美淮東彥。抗志義黃。詞壇趙軼拔。道味伊俎嘗。置身百尺樓。白雲翼其旁。自立良獨貴。勿爲遺俗傷。

下里久聒耳。泠泠聞古聲。郢中引商羽。碩人歌榛苓。三歎竟此曲。愧非鍾期生。金斷本同心。萍合乃異蒂。相賞自有真。詎以形迹計。昌黎有遺言。雲龍願相似。

### 冬至齋宿題壁

襆被奚囊載滿車。迎門呵殿吏人譁。冷官公事常多暇。逢著齋期始到衙。

煖炕騰騰石炭薰。呼童拚掃去塵氛。詞垣資格皆前輩。促鄰相從話夜分。

謂吳易堂朱石君秦澗泉三學士周石颿侍講

東廳槐樹老輪囷。偃蹇離奇不我親。太息誰能如汝壽。空庭閱盡去來人。

待詔廳事前古槐一株蓋金元以前物

### 正月二日夜雪用東坡聚星堂韻

茶爐半槍始展葉。夜窗手點浮綠雪。開門密霰已滿庭。狂呼失喜冠纓絕。軒轅忍寒肩輒聳。柴桑習懶腰愁折。松枝插戶壓漸低。鐙影搖空暗欲滅。生涯碌碌風輪轉。歲月堂堂電光掣。頻浮薊北柏子樽。苦憶江南梅花纈。停雲遠道空滯留。歸夢殘更付騷屑。詰朝初旭雪半消。似有仍無只一瞥。空中色相定何著。文殊師利猶多說。便須參訪不二門。顧我舌根鈍于鐵。時有扈從五臺之命

### 恭和御製恭奉皇太后謁泰陵因至五臺瞻禮卜吉起程得詩八韻

孝治協人天。重光帝德宣。上陵崇漢典。肆覲展虞年。演法參師利。延釐紀握先。啓途張翠葆。初日出黃縣。官路西郊直。人家東作便。擘雲山疊疊。浥露艸芊芊。已致登三治。還尋不二緣。承恩諸父老。額手屬車前。



恭和御製過蘆溝橋元韻

西陸朝靚將出冰。六龍夙駕官道平。鼓車記里未一舍。長橋翼然自昔稱。渾河西北來。厥性善遷徙。酈元所記載。曩跡半湮矣。上游多山下平衍。所難不在首在尾。至尊指示周且詳。疏淪有方勿旁諉。從今永永慶安瀾。永定之名不虛耳。

恭和御製良鄉行宮晚坐元韻

吉行五十首駐蹕。暮色自遠蒼然生。牽波孤塔湧香界。苾題兩峰抽筍萌。有滄雲興未成雨。艸木欣欣如有情。行齋清永供宸賞。景物到眼皆空明。卷阿游歌詎爲樂。無非事者春省耕。

恭和御製見新耕者元韻

柳稊初綠麥苗滋。有事西疇及是時。二月豳風人舉趾。分明粉本馬和之。新畬如羅足遐觀。蹂踐頻聞戒從官。萑葉杏花農侯蚤。一人春省萬人歡。焚香夾路拜恩齊。扶犁皤然與草兮。欲識太平真有象。煙中簔笠雨中犁。耕鑿堯民作息均。不須布穀巧催人。臘前三白春初雨。好協維魚吉夢頻。

恭和御製直隸總督方觀承奏報易州等處得雨元韻

陣雲如墨勢方酣。滋液燕南又易南。天遣雨師先灑道。人迎日馭望停驂。丹邱不遠誠能格。綠壤均霑樂

且湛欲擬載芟良耜頌。小臣橐筆祇懷慚。

恭和御製永慕齋壘舊作韻

橋山咫尺構宸居。帝曰精誠庶鑒予。天縉依依通旭卉。皇風皞皞繼羲遽。永言弓劍心恆慕。如見羹牆境。豈虛入暮廉。纖將作雨。八神先路爲清除。

恭和御製謁陵禮畢載啓西巡瞻彼臺山祝茲介祉元韻

麗農瑤室占高涼。親祝純釐孝治彰。五百僊人行教地。三千法界大慈光。金根啓處祥雲擁。玉燭調時化雨長。天保九如天瑞協。至誠昭格聖心覆。

恭和御製曉煙元韻

暮山含紫九秋凝。春曉看來景最勝。澹似游絲飛不定。濃如蒸餿氣方升。柳容新沐黃千縷。麥氣微烘綠一塍。山市人家貪起蚤。炊煙隱隱出高陵。

恭和御製日日元韻

吉行日五十。羅拜盈馬前。十年望幸心。何異望歲焉。雨暘旣時若。耕鑿皆安使。詔書免正供。觀者杖屨駢。出作入而息。不知何以然。三多祝我皇。庶符觀華年。

恭和御製曉行卽景元韻

曉雲鬢未全晴。邨屋炊煙次第生。貌出山居農作景。人從摩詰畫中行。  
巖巒複沓路回斜。蘆荻初芽柳未花。陌上豚蹄奉賽社。堪嗤持少願偏賒。  
一帶嵐光繞遠坳。好山在望玉鞭停。恰從拂霧籠煙處。全露霏藍翕黛形。  
甘澤依旬候不遲。歲占大有更何疑。伊祁山下倉箱滿。遙祝千斯與萬斯。

恭和御製曲逆故城元韻

遺封猶是壯哉城。阿世難逃身後評。但割膏腴胙諸呂。笑渠分肉那能平。  
反閒徒誇沮范增。第功畢竟遜陽陵。美如冠玉中何有。變理陰陽或未能。

恭和御製題愜適齋元韻

行旌小駐古渠濱。猶是伊祁舊俗淳。峭嶺山容眞入畫。霏微雨脚不霑塵。唐河九折窗前見。隄柳千絲檻  
外春。別有愜心嘉景在。堯民擊壤望堯巡。

恭和御製復雨元韻

極望重巖又作霖。春鳩喚雨杏花陰。雲容鬢鬢低猶濕。樹色依微綠漸深。古道衝泥添滑滑。懸崖濺瀑尙  
淋淋。天膏卽是君膏澤。誠意相孚在一欽。

恭和御製降旨免宣化府屬民欠詩以誌事元韻

體仁以長人。義在易春秋。有孚占元吉。是惟益下優。涿易泊恆代。玉輦首經由。復除昨頒詔。後樂常先憂。猶恐地僻左。或致向隅不。延訪咨大吏。尺一下置郵。災黎所逋課。蠲放無徵收。二月春始和。好易鳴栗留。山田耕及時。樂哉助以休。龍門互赤城。養欲給所求。耕三可餘一。勉旃足食謀。

恭和御製雪元韻

二月十九日

臘前瑞雪占三白。春蚤甘霖慶九農。法駕漸臨香界近。天花先灑翠微峯。簏簏六出點行旌。茅屋依稀是雪坪。一望千山皆玉立。天工渲染若爲迎。藻思禪悟兩相期。萬斛源泉千首詩。一片輕翼飛几案。金壺初試剡藤時。踏雪扶犁未少休。邛邛叱犢尙鳴牟。勢山駢石皆宜稼。何論三施更五猶。

恭和御製停蹕元韻

暫止倅人駕。師紓陞楯勞。濕雲迷灑霧。遠岫羃周遭。一宿停清蹕。千屯儼列曹。幾餘吟趣洽。斯咏復斯陶。

恭和御製晴元韻

連朝兼雨雪。此日喜新晴。古道山腰轉。前旌樹杪行。平疇猶帶潤。細艸乍滋萌。遙指周廬合。紅雲拱幔城。

恭和御製阜平道中作

積雪澹于一幅練。鳴泉清入五絃琴。人家半在山深處。遙見炊煙出柳陰。

一邨欲盡一邨連。風景分明似輞川。父老呼兒課東作。無過鑿井與耕田。  
龍泉關外駐輕驂。咫尺僊山路舊諳。天外數峯明霽雪。清涼世界靜中參。  
派河乍漾麴塵絲。彷彿僊源異境移。好是杏花菖葉候。春旂遙拂柳梢時。

恭和御製三箭山疊舊作元韻

豐碑御射舊曾聞。天錫仁皇勇出羣。飛鏃同時穿疊嶂。呼嵩萬歲動千軍。  
霜濃白羽三成勁。斧劈青巒一道分。今日神孫重繼武。王弧親試氣如雲。

恭和御製射虎川元韻

一綫雲關峻嶺前。當年射虎尚名川。唐弓親輓神如在。夏諺來游事宛然。  
祖德懋貽以燕翼。皇心克紹若稽田。卽看探穴恢天網。葱嶺西頭振旅闐。

恭和御製自長城嶺至臺懷再依皇祖元韻

龍藏載五頂。演法自曼殊。眷屬一萬衆。東來歷雲衢。大啓功德門。示以清淨途。  
各各生歡喜。合掌寶號呼。微聞千花塔。鈴語清于竿。時巡祝純嘏。詎爲游觀娛。  
長城塊兮軋。曲徑繚而紆。清涼境不遠。天開靈異區。仿彿常喜國。  
室利之所都。五朶青芙蕖。可望不可圖。神鏡夜光見。地菜法雨濡。  
天人跨狻猊。妙手徒形模。百千億化身。非有亦非無。

恭和御製殊像寺元韻

不二眞如相。何曾法報殊。圓光融指月。妙諦悟衣珠。棲鶴禪王窟。乘猊道子圖。天花迎羽葆。咫尺卽雲衢。

恭和御製顯通寺卽事元韻

演法遙居七祖前。金身入夢憶當年。肇開震旦獅王窟。宛似靈山鷲嶺天。三度巡臨祈介社。十方供養拜瑤筵。成虧彈指分今昨。戒慧還須積寸田。

恭和御製羅漢坪元韻

妙相三十莊。莊嚴誰能過。各生歡喜心。受福詎不那。何人寫殊像。永峙山之阿。諸方護持者。天龍摩曠羅。似聞梵夾書。名號各異科。八百與五百。沿襲多紛訛。此此缺其一。聊足笑且呵。本無我人相。分別作甚麼。

恭和御製眞容院再題元韻

上方雪初霽。寒意倏已退。止輦禮花宮。像設妙于續。三十二好相。如月圓不晦。是真見文殊。歡喜復遐愜。百牟尼珠圓。八功德水漑。聲聞辟支乘。誰能企項背。

恭和御製閱武元韻

展義臨三晉。乘時習五戎。山連恆嶽壯。兵練代方雄。赤羽和門日。朱旗列幕風。九重親教閱。不數被廬功。

恭和御製棲賢寺元韻

三峽匡廬勝。幽棲略似之。應真飛錫舊。上足付衣誰。枯坐能離垢。繙經且忍飢。由來儒釋異。親爲剖然疑。  
恭和御製降旨免山西前歲民欠詩以誌事元韻

迓釐禮中臺。問俗溥宏惠。正供減今年。溫綸宣德意。載咨司農臣。重稽格外例。往者值偏災。曰惟單闕歲。  
民欠權倚閣。爲軫磽瘠地。茲來全豁除。十行詔遐暨。鴈門功德峙。汾水恩波逮。祝聖轉金經。佛日四表被。  
恭和御製游千佛洞得古體四十韻

宗門心卽佛。立說簡而約。云何有千佛。誰解此理竅。清涼真佛國。僊洞鑿崑嶠。得毋五丁手。抉幽力排募。  
沿谿向右折。十步九回拗。始進若入窞。漸深未掀淖。奇峯各羅列。如鶴或如鷁。兩臂猿攫拏。一足夔踰踔。  
遠望目已眙。下臨心更矯。洞口闐然谿。神鏡夜光搖。中有諸佛像。膜拜來四徼。世尊說大乘。迦葉示微笑。  
藥叉魔波旬。各各護持效。目犍富樓侶。大德修行劬。不二啓法門。文殊提其要。騎象誇猿猊。那用輿與輶。  
一一具好相。詎有胛肥誚。千佛本一佛。心性人各抱。三教理同源。我皇竝深造。春巡歷臺懷。晴雲披絮帽。  
四禪透宗旨。掃除儒釋鬧。因過白雲寺。遂指西峪廟。甘露功德水。滿月天人貌。精舍樸而古。秘洞窈且窕。  
直上試輕馳。寧辭路回繞。卻登絕頂望。積雪四山曜。法螺鐘磬聲。靜中聞大樂。叶山田麥抽萌。卹舍粟藏。  
窖。占豐察璇樞。祝釐闡象教。山靈答嵩呼。洞府供宸眺。宗鏡微乎微。傳鏡道可道。谿光皆空明。谷音自清。  
妙。天工巧渲染。著色非意料。紺宇列如麻。茲焉獨幽峭。付戒馬駒踏。離步鳴王叫。于茲托新詩。洽洽鈞天。

調造化運爐錘。理蘊入燭照。小臣叨載庶。下里望莖詔。叶追趨豹尾後。異境媿未到。韻奇已迫窘。況欲窮禪奧。

恭和御製題城規守城錄元韻

從容應敵竟全城。一局殘碁話汴京。大廈詎能支寸木。良醫未可恃黃精。金湯無德難爲固。輓輒非人何以行。天語煌煌垂定論。先幾莫待事將成。

恭和御製題宋中興聖政卅元韻

和親何至以臣稱。往事堪嗤宋紹興。汴洛劫灰全不計。汪黃推轂已同登。兩宮竟絕還歸望。二策空矜聳動能。半壁偏安慚袖手。長城自壞憤填膺。漫言五馬南遷匹。幾見三軍北伐曾。內禪得人差足慰。詞臣歸美例相仍。爲尊者諱詞多曲。允執其中愆必繩。大矣皇言褒貶正。千秋公論式欽承。

恭和御製經畬書屋卽事元韻

六經教士各專治。四庫新編聖主時。甲乙丙丁統所部。校讐繕錄慎攸司。哲王道在惟欽若。諸子言淆必辨之。日理萬幾還學古。健行以造物爲師。

恭和御製游獅子園憶舊元韻

游賞卷阿昔日陪。園居仍對碧峯開。羹牆見處皆思聖。心性渾然不改孩。慈孝一誠常默感。因緣有觸記



從來世尊法會真如昨。餅水天雲絕點埃。

恭和御製鹿角椅元韻

五紋岐出質猶全。想見仁皇射獵年。囊建虎文兵不試。椅名鹿角用長絲。欲存大路椎輪儉。詎闕雕文刻鏤妍。手澤依稀神鑒在。文孫繩武志殷然。

留王快鎮座主少宗伯介公有詩紀事次和

天教十日住鞭絲。似與谿山有夙期。古寺半藏雲斷處。好花全放雨晴時。三成官笥穿揚捷。一隊征驪踏雪遲。行帳追陪真是樂。夜來頻醉百分卮。

三月朔日疊前韻

日飲無何但學絲。匆匆又過禁煙期。折花紅杏深邨裏。選石清波激溜時。山未知名看亦好。客來不速話偏遲。同年小集今朝是。遙憶芳醪倒屈卮。每月朔同年諸君例有小集

憶五臺山三疊前韻

清涼峯色翠如絲。欲見文殊那有期。靈境雲封全未識。鈍根棒喝定何時。但求達磨安心竟。不礙豐干行脚遲。會得菩提本非樹。可容無當也名卮。

三月三日自曲陽入行唐境途中杏花盛開四疊前韻

上已煙光颺柳絲。此行未負杏花期。偶來冀北深邨路。大似江南細雨時。每到籬枝鶯語密。怕防落蕊馬蹏遲。鷓鴣若許隨身挂。一朵眞宜飲一卮。

座主宗伯公折杏花一枝。插行帳茶鐺中。至晚盛開。有詩五疊前韻奉和。

伴取爐煙細細絲。拗花供養趁花期。氈帷四面留香地。茶銚雙清吐蕊時。著色還須崇嗣畫。尋春眞笑牧之遲。一枝何幸隨桃李。也到公門佑玉卮。

奉酬宗伯公見贈六疊前韻

清如冰更直如絲。坐我春風一月期。燕許文章推後輩。崔盧門第冠當時。八持玉尺衡材富。雙引金蓮歸院遲。獨愧散材同社櫟。縱經雕刻不成卮。

眞定府隆興寺七疊前韻

林立豐碑認色絲。巍然傑閣俯崇期。遺文猶識張公禮。殊像難描李伯時。綺語多生消欲盡。機鋒百偈轉空遲。醍醐具足清涼味。未要花前白雪卮。

游蓮花池八疊前韻

激泓十頃麴腥絲。邂逅清游愜所期。巖壑苑成千里勢。煙花況值暮春時。游魚吹沫涵空樂。浴鳥梳翎點水遲。一事尙留餘憾在。不曾池上舉三卮。

懷鄉九疊前韻

春筍秋瓜夏藕絲。齊民月合有程期。客來但乞澆花法。僮約頻申曬藥時。頗解著書師蔡癸。也曾學圃問樊遲。大瓢五石原無用。只合江湖作巨卮。

寄題雪浪石用東坡韻

彈渦空復說登州。那似雲根湧急流。四面空嵌銜石骨。一拳凹凸激潮頭。玲瓏明月懷中貯。透瘦襄陽裏。裏收。咫尺波濤來眼底。渾疑朝暮見黃牛。

送李葆畹進士東歸

籍甚詞壇第一流。御風曾未到瀛洲。揮鞭重指都亭路。又逐人間款段游。截鼻斷鶴兩兼難。天許才名折美官。半刺但題前進士。故應蚤達勝方千。我識鄭公元斌媚。人嫌李令太穢唐。雲門山色容高臥。大勝東華軟土忙。古柏參天鐵榦成。風霜歷盡骨逾清。縱然才大難爲用。偶露文章世已驚。蠶尾山薑例可循。頭銜未辦領詞臣。生天偶落它人後。終是拈椎得髓人。岱宗訪篆劉斯立。歷下題詩李泰和。探借十年多暇日。著書定較往時多。

中秋後五日同錢坤一侍講王琴德舍人曹來殷蔣漁邨二庶常過大慈延福宮

傑構出雲端。三元舊戒壇。延禧資母后。董役出中官。明成化中孝肅皇太后建古壁丹青繪。虛庭栝柏寒。豐碑猶未圯。

剔蘇幾回看。殿外有成化敕諭碑。

### 苦雨

翻盆伏雨接秋天。避漏移牀夜少眠。瘦柱壓敲支未穩。殘書灑漬曬無緣。艸生屋頂多于齋。車到街心泛若船。一事差強人意處。久稀剝啄至門前。

### 題韋慎旃舍人翠螺讀書圖

牛渚山頭月。娥眉亭上風。謫僊已千載。高興古今同。鐘響夕陽外。書聲老屋中。誰能識此樂。毋乃逍遙公。

### 題汪對琴博士後譚蓺圖

識是詩人骨相寒。瘦羊分得供朝餐。偶然泥上留鴻爪。便與人閒重此官。白雲明月悟前身。諫果甘回味始真。三百年來得同調。阿誰譚蓺似汪倫。

### 過歸義廢寺

一泓古井兩株槐。券尾比鄰署字皆。輭燈模糊埋碧蘚。古幢剝落臥空階。老僧持鉢身全病。過客尋碑眼

獨揩。聽話閒坊宣化事。剎那興廢漫牽懷。寺有彌陀邑特建起院碑。載咸雍元年賣地券云。今賣白已在京宣化坊門裏面街西小巷子內空閒地內有井一眼。槐樹兩

株。末有東鄰南鄰西北鄰人姓名又載寺所藏畫像大小硬盤九壇輓轎四壇云云。又有石幢仆地。其一面云。會同九祀龍集敦祥亦遼時物也。

移寓

幾度柴車輾轆行。喧囂爲避市人聲。門開一面西山對。庭敞三弓夜月盈。新燕呢喃邀作客。古槐磊落事爲兄。玉虛道院南鄰近。時有天風度碧笙。

藤牀木几手揩摩。洗足關門耐養疴。巷僻最宜生客少。家貧猶蓄古碑多。先生自署支離叟。前輩曾題安

樂窩。陶晚聞阮裴闔沈欽伯諸前輩俱曾寓此。儼直從來須計月。催租也似吏催科。

盧端臣先生招飲卽席賦呈

八米詞林秀。蒲江樂府傳。才應雄大歷。名冑後盈川。俗味酸鹹別。家風禮讓先。蒸壺招弟子。啓霧各忻然。

# 潛研堂詩集卷六

奉命典試湖南出都宿良鄉縣有作

五千里路賦南征。六月都亭擁傳行。桃李滿蹊教手植。冰淵一念久心盟。長風欲渡江河漢。壯觀全收冀豫荆。回首春明猶未遠。試拈詩筆紀初程。

四年五度此停驂。玉尺重持祇自慚。已卯七月。典試山東。庚辰二月。及今年五月。恭迎大駕。辛巳二月。扈蹕至五臺山。皆宿良鄉。此次過此。計五度矣。漸識途矜老馬智。偶留跡似印泥參。迎風宰堵金鈴語。過雨芯題翠黛含。應笑勞勞車騎客。軟紅十丈點朝簪。

宏恩寺

侵晨投豆店。便道訪桑門。排闥羣峯入。當街雜樹籓。法王猶守律。寺僧係律門。與華山同宗。慈氏不言恩。強與安名字。誰將公案論。

督亢陂

督亢膏腴迹已荒。攜圖當日入咸陽。千金枉購夫人劍。不及無且一藥囊。

道中卽事

經月愁霖雲霧迷。怪來三伏冷淒淒。回風撼樹全疑雨。積水平塍半作谿。古道已看濡馬腹。淺涔何止漉

牛蹶肩輿縱比徒行穩。怕聽禽言滑滑泥。

雨宿定興

三椽客舍小于舟。浙浙瀟瀟響不休。恰似故園梅雨後。孤篷聽雨泊沙頭。  
北方盛夏常憂旱。惟有今年苦雨連。官路水深二三尺。居民入市欲乘船。

輿丁

陸行不通車。水行不可船。泥濘數里閒。行旅歎屯遭。王事有程期。豈敢或遷延。夙昔怯鞍馬。而況淖在前。  
籃輿舁丁夫。跣足徒涉便。夾輿以四丁。扶持防蹶顛。牽輓蟻緣附。參差魚貫聯。退蹠後人足。進拍前者肩。  
踏土仍踏浪。脚底懸渦旋。所得纔分寸。其難乃萬千。嗟爾亦人子。詎不知自憐。不惜胼胝苦。終朝博百錢。  
勞人以奉己。我慚紅兩顙。前途可安行。且莫歌局蜷。

曲逆詠古

六奇孺子擅陰謀。曲逆名城萬戶酬。阿世取容終王呂。因人成事竟安劉。白登圍解輸奇繪。雲夢弓藏痛  
僞游。當日高皇數三傑。運籌元只說留侯。

定州道中

形勝居然控趙燕。中山故國暫停鞭。行來明月清風店。恰稱輕雲細雨天。楊柳青濃圍近郭。黍麻綠潤長

平田。太行西北遙環擁。千里蒼茫一氣連。

雪浪石和東坡韻

韓幹散馬雲錦屯。聲價未若海石尊。古來文人例愛石。摩挲一日忘昕昏。衆春園中春最好。水木彷彿江南邨。誰移石丈此中貯。一拳突兀當松門。咫尺便作千里勢。天吳蹴踏光魂魂。只疑靈洞通水府。故遣百浪飛山根。天工游戲自奇絕。嵌空不費雕鐫痕。神物欲下襄陽拜。絕品宜與奇章論。文登彈過石安在。當年曾養菖蒲盆。大千世界恆沙劫。俛仰陳迹感慨存。

眞定

河朔雄藩自昔聞。南連趙魏北燕雲。風聲勁挾滹沱響。山色青從恆嶽分。宏正有靈應俎豆。寶臣何物紀功勳。廟堂姑息無長策。往事空悲成德軍。

登隆興寺大悲閣周覽隋宋元碑刻晚宿雨花堂對月得詩七首

飛檐縹緲徹三層。乾德規模記昔曾。始信護持龍象力。千年傑構尙崢嶸。隆興寺鑄金菩薩像并蓋大悲閣唐乾德元年僧惠演撰

白豪殊相頂光圓。聞說金塗七度全。遇宋卽興遺識在。荒唐且任老僧傳。周顯德中毀佛像鑄錢像中有文云遇顯卽毀遇宋卽興見僧撰序

開皇龍藏護瑤函。奕奕銀鈎妙蹟鑱。彈指周齊經幾劫。參軍猶署舊頭銜。



長明鏡向佛前吹。分付官錢幾貫支。閏月上旬當怯薛。傳宣中旨出嘉禧。

元長明鏡錢記。延祐五年。僧永恩書文云。閏正月初□日拜住。

怯薛第一日嘉禧殿裏。有時分欽奉聖旨云。

承旨書家奉楷模。膽巴遺跡久榛蕪。惟餘本命長生碣。留在西廊少榻摹。

元聖主本命長生祝延碑。王思廉文。趙孟頫書。并篆額。今在閣。

前西廊寺舊有帝師膽巴碑。亦趙書。今無存。

冰山一霎便全傾。玉券空鐫上輔名。賸有孤嫠逢愍思。施錢地下懺長生。

秦王夫人施長生錢記。至正十四年王訪撰。秦王夫人者。伯顏

之妻。怯烈真氏也。

輜車幾日太匆忙。一宿安眠青豆房。多謝雨花堂外月。照人心地亦清涼。

望華塔寺

華塔同登最上頭。重來清淚落西州。金光紺碧依然在。忍向城南續舊游。

去年三月與介少宗伯同登是塔。今公已下世。

戲題趙州茶棚

宗門語錄太紛翠。直下鉗鎚是作家。公案古今難勘破。鎮州蘿蔔趙州茶。

柏鄉謁漢光武廟

白水出真人。天符赤伏陳。一成仍祀夏。三戶果亡秦。決戰昆陽日。膺圖鄙邑辰。雄才殄羣盜。大度保功臣。豁達高皇匹。精勤宣廟倫。嚴陵星作客。南頓號稱親。卜洛規模正。崇儒教化淳。祚延十二世。頌溢卅三春。

小縣祠猶古荒臺跡未湮石人傳誕妄。有碑大書光武斬石人處麥飯話艱辛。樹老神鴉宿。梁空乳燕賓。冕旒紛夾侍。想見帝王真。

題圓津庵用壁閒梁棠邨胡南荅湯西厓諸公倡和元韻

名流題詠想當年。興寄長松怪石邊。無策破閒聊覓句。有方療俗是譚禪。古藤似幔低延月。曲沼如珪冷浸天。燕楚往還經萬里。飛鴻留爪亦前緣。

鄴中詠古

銅雀臺空霸業陳。分香遺令劇酸辛。纍纍疑塚都相似。愁絕西陵泣望人。南皮公讌興何如。雲散風流十載餘。少壯人真須努力。至今猶寶偉長書。井蛙何事逞雄心。一柱橋頭朽骨沈。記否三臺功就日。殿中棘子已成林。專征景略樹奇功。瞥眼魚羊事業空。太史浪占星得歲。雌雄飛早入秦宮。孝穆當年奉使還。評量文雅薄衰屏。中原文物知多少。心折韓陵片石閒。青雀飛來羽翼垂。河邊殺豨那能羈。內家相對空揮淚。玉體殷勤黃髮期。殿上紛紛供御囚。癡癡國是十年休。風流宰相楊遵彥。只與君王進廟籌。白頭臨陣被犀渠。投袂勤王葛誕如。可惜關西好男子。老爲晉六茹驅除。

苦熱

青蠅結隊故飛飛。火織炎官又作威。暑已失時猶張王。二字俱去聲秋方當令尙依韋。曉風稍稍涼侵袂。午日

騰騰汗透衣。空羨蘇門高隱者。適然鸞鳳共忘機。

自鄭州入新鄭道中作

百里陂陀路。連岡往復皆。雙厓堅似鐵。一線旋如蝸。土硬全疑石。沙回忽有階。坡翁烏帽句。寫景妙難儕。

東坡鄭州道中詩登高回首坡隴隔。惟見烏帽出復沒二句寫景宛然。

讀左氏傳

從政威不猛。五美之大端。云何尙火烈。以民爲艸菅。國僑昔治鄭。衆母鞠育殫。遺愛長在人。清淚尼父潛。救世鑄刑書。要豈如申韓。易箠告太叔。猛易而寬難。此言失持平。罔顧理所安。將毋慄馘子。傳會非真傳。政寬則得衆。我思魯論言。

過許州追悼亡友周西隲刺史

三載金臺別袂分。繆爲恭敬意殷勤。今朝真到籛城路。不見風流舊使君。已卯夏西隲之許州任。過予寓齋話別。且言待子典試。兩湖過

許某當負弩效驅耳。

文章博洽世無雙。手葺官齋榜古幢。惺悵堂成人已逝。蛛絲空冒讀書窗。西隲到許後貽書言近移唐咸通石幢一後梁貞明石幢一于

靡中築小室貯之。  
顏曰古幢書屋。

讀史縱橫貫弗功。眼光如月破羣蒙。和林舊事編成後。更與何人質異同。予近改  
修元史。

夜臺寂寞竟何如。落月空梁夢見虛。不用中郎求貌似。手痕細認隔年書。

### 望中嶽

西來紫氣鬱千盤。天外諸峯馬上看。石闕遺文留漢篆。金泥絕頂表唐壇。星辰捫歷三霄近。松柏陰森六月寒。五嶽壯游初志在。何時扶屐到層巒。

### 許昌詠古

讖書曾記代塗高。艸艸移都計枉勞。國是卅年禾絹諾。姦雄一手太阿操。樓桑未遂中興漢。石馬俄成大討曹。休詫牀頭捉刀者。軍司狼顧亦人豪。中興之中讀平  
聲。唐人已有的。

### 邨行

幾日輕陰暑漸銷。孤邨稍喜避塵囂。秋梁已穗宜刪葉。晚豆將花亟護苗。細細菱絲浮水面。纍纍瓜蔓挂牆腰。雨餘準備前途滑。伐柳填薪當小橋。眞羨寬鄉一老農。久無冰炭在心胸。妻工舉臼調鉛拙。兒解耕田識字慵。食指動來炊飯熟。衰顏開處濁醪濃。平生不省公卿貴。世守頭銜賣菜傭。

聞蟬

眞令俗耳得鍼砭。愛汝迎涼不附炎。曉月一聲楊柳店。午陰百過綠槐檐。身輕自覺能離垢。飲少從知未礙廉。莫信忘機便無患。螿蟬張臂亦何嫌。

雨宿蔡寨邨舍

爲避淋頭雨。聊求蓋頂茅。泥深愁滑滑。雞唱聽膠膠。野老能供饌。山僧暫打包。淹留隨處好。恐類伏波嘲。

田家

岐路忽三叉。居民四五家。人行茅屋罅。犬吠枳籬斜。拗項壺盧架。長身巨勝花。故園宛在眼。南望白雲遐。

雨止

天改雲容澹。人欣雨脚停。依依遠邨外。忽有數峯青。

曉行

揮策去匆匆。邨原極望同。樹枯時帶瘦。山好不嫌童。紫蓼秋塍雨。青帘曉市風。輕涼適吾體。渾忘客途中。

與王惺園修撰對弈

夢騰長困日如年。暫賭楸枰當晝眠。眞訝觸蠻分敵國。幾曾虞芮讓閒田。到頭才悔全軍蹙。得手徒爭一著先。白鶴觀中成例在。從來勝敗總欣然。

確山道中

昨望翠峻嶒。今朝度幾層。連岡肥少骨。仄徑曲如肱。紅倚谿頭蓼。青垂屋角藤。童兒纔五尺。驅犢上高塍。

渡淮

我昔北游過清口。兩濱交匯趨雲梯。獨清安能救衆濁。浪湧半挾沙與泥。今朝乘輅義陽郡。遙望桐柏明秋霓。長台關外尋古渡。輕舸撇波如鳧鷖。粼粼白石照見底。輕風吹皺青玻璃。連峯屈曲自回抱。一條玉帶垂腰圍。南來計程三千近。經涉滹沱漳洛淇。渡河以後惟汝潁。終類邾莒朝魯齊。當年神禹奠四瀆。各以巨海爲會歸。河伯雖欲鵠巢占。勢不肯下猶相持。壯觀先後落吾手。所惜汎泆故道迷。高興竟馳大別頂。坐看江漢萬里朝宗時。

山行

了無犖礪礙人行。起伏高低路總平。可是山靈多蘊藉。不將圭角露崢嶸。林於萬个柳千行。木槿編籬卵石牆。高地棉花窪地稻。不知身住在它鄉。

自信陽入平靖關

宛轉雲盤阪。崢嶸冥阨關。千重包汴洛。一綫劃荆蠻。要害思防戍。登臨忘險艱。四圍蒼潤意。全改北條山。勢逼疑中斷。途窮忽有梯。祇尋山脈絡。不辨景東西。倏覺升天易。終憂入窖低。回頭來處路。恍惚已難稽。

紫翠繞重重。橫岡更側峯。樹藏山面目。雨拓水心胸。花艸都含秀。陰晴乍改容。此中多隙地。安穩讓三農。  
水向山頭引。人從屋上耕。腰鎌收稻出。背笠跨牛行。籬借新栽椹。扉編舊種荆。雙河衣帶似。石罅弄琴箏。  
池沼天然匯。曾無斧鑿痕。三時魚價賤。七月蕩花鱖。風定波猶急。沙激水不渾。在山清徹底。難向外人論。  
夙抱看山癖。曾無濟勝資。此行天假便。卻喜境多奇。氣厚蒸雲霧。姿妍薄粉脂。後來須刮目。記我首題詩。

七夕宿牛靖關

七夕今朝是。窮關風雨秋。祇依山作嶂。不見月如鉤。兒女團圓節。征夫寂寞愁。艸花籬外放。也自號牽牛。

自應山入安陸縣

百里孤城倚翠峯。揮鞭南望翠猶濃。地靈未肯趨平行。山意居然蹈複重。絕磴千回牛旋磨。危蹊一綫蟻  
盤封。後岡欲斷前岡合。登頓翻添客興慵。  
控扼申光襄漢閒。北來歷盡幾重關。湖波演漾雲連數。嵐氣空濛陪尾山。背郭千家黃稔熟。沿邨萬个綠  
筠環。征人日暝剛投宿。細數昏鴉接翅還。

雲夢縣

地溯西陵舊。宮傳雲夢遺。人煙低遠市。秋意入疏籬。艸綠黃香冢。苔封伍員祠。圖經尋往蹟。歷歷寄懷思。

行連岡閒卽目

低岡如伏牛。直上踏脊膂。曲折隨地勢。向背迷處所。上坡復下坡。時見風帽舉。日夕少人行。斜陽亂鶉語。  
詠道中所見艸木

楊柳性易活。道傍鬱婆娑。一一懸官牌。手栽數不訛。行旅苦煩囑。小立清風過。誰云無才思。庇蔭亦已多。  
前時河水溢。濁浪驕鼃鼉。斫伐千萬株。猶足支積波。豫章號良材。十年始作科。迂闊好大言。收功竟如何。  
樗木生不材。匠石棄弗視。栽之官路旁。蔥蔚亦可喜。云何冒椿名。附會罔知恥。枝葉偶相若。臭味詎能似。  
人言樗易長。舍彼寧取此。嗟哉逐臭夫。亟去洗我耳。樗木俗名臭椿孟秋天始涼。下隰見紅蓼。花籬帶露斜。身弱

得風早。疏籬淺水閒。娟娟秀而好。根柢非堅牢。顏色能自保。騷人倘回顧。終覺異凡艸。  
木槿日及花。晝榮夕輒悴。莊生論小年。蜉蝣蟪蛄類。道旁見一枝。妖紅可人意。未登君子堂。俛仰籬下寄。  
壽命旦暮閒。猶以色取媚。嗟爾亦何知。我言責太備。

瓜壺皆蔓生。莖葉頗相同。秋來結實好。纍纍懸屋東。剖瓜如蜜甜。爭噉喧兒童。生冷忌食多。恐致腹疾攻。  
壺盧雖寡味。佩之當藥籠。中流偶失船。坐收千金功。徒以甘苦論。鄙哉田舍翁。

浮萍生無蒂。隨波忽近遠。風來半汀失。雨過一池滿。飄泊狂瀾中。葉葉獨安穩。衆芳憂淹溺。乃以智自遜。  
推移不凝滯。于我元無損。不見長樂翁。五朝被公袞。

讀詩識苕苒。采采向中田。雨後綠葉肥。結穗垂馬鞭。物微人所棄。不堪充豆籩。本艸幸見收。弗以下品捐。



小試輒有效。果使結轡痊。用之苟得宜。功豈下參連。乃知醫國手。廣蓄所當先。

小艸澹巴菰。得名蓋未久。移栽始閩嶠。近乃處處有。烈日炙葉乾。黃絲細如絡。筠筒煙一縷。相習以口受。肺腑非鐵石。火攻奚可狃。奈機今時人。嗜此不去手。糜財更妨功。濫觴起誰某。安得拔其根。卮茜種千畝。

武昌

驚濤卷雪壓城低。九派江流迹已迷。三楚颿檣風上下。萬家煙火水東西。山圍大別單椒峙。洲擁金沙碧艸萋。遙指僊人騎鶴地。危樓終古切雲霓。

秋花

蝴蝶紅房坼。牽牛紫萼攢。偶依籬角住。也受露華團。天意憐秋艸。人情感歲闌。穠芳難耐久。珍重及時看。

邨中記所見

小小茅簷曲曲籬。牆敲聊借石頭墻。日高編箔烘煙葉。雨歇攜耒打豆莢。香稻已催千頃割。殘荷猶見一枝垂。由來氣候山中別。試補爾風七月詩。

萬松岡有序

七月十七日。入咸寧縣。行山岡間。夾道皆長松。官爲編號。懸牌子樹。記其生枯之數。遙望小松布滿崖谷。其多如薺。數十里。中青葱不斷。山故無名。予目之曰萬松岡。詩以紀之。

虬枝引路百尋強。五粒新柯密作行。說與它時編地志。嘉名合喚萬松岡。  
連岡登頓不嫌疲。爲愛清標瘦更奇。頗勝湛然老居士。低頭下拜萬松師。

蒲圻山行

我家東海上。百里不見山。偶然平地覆一簣。便已自號岡與巒。茲來山行已五日。置身長在煙雲閒。橫峯側嶺各秀絕。如眉如髻如玦環。如龍掉尾牛奮角。神龜縮頸長蛇蟠。濤聲十里松子落。楓葉未老青猶攢。恍惚置我山陰道。應接不暇目力艱。寸岑倘可移吾里。壓倒虎邱更馬鞍。高人偃蹇恥標榜。名字那肯留塵寰。區區河伯傲海若。夜郎自大吁可歎。

高嶺舖

一徑入煙霞。危崖赤似砂。石奇蹲巨豕。路曲縮長蛇。攔釜宵煨芋。提筐午捉花。邨居無面勢。茅屋數家斜。

口占

萬疊雲嵐有路通。一峯不與一峯同。松篁夾道如迎送。人在秋山紫翠中。  
湛湛江楓葉未丹。相逢有約莫盟寒。重來記取深秋後。烘染殷紅待我看。

此页空白

# 潛研堂詩集卷七

宿萬年庵用壁閒吳文恪韻

庵有董思白書  
歇心處三大字

琴筑鳴幽澗。聽來不厭喧。鐘聲和月遠。木葉受風翻。奧曠疑天設。清涼卽佛恩。安心何日竟。我欲問桑門。

將抵巴陵

入山八九日。山意漸闌珊。螺髻經千疊。羊腸剩幾盤。泉聲無雨縮。蟲響入秋寒。遙望煙邨外。漁舟閣淺灘。戴星忙結束。卓午便消停。樹影窗中速。碁聲枕上聽。有情花展靨。無事鳥梳翎。此去巴陵近。煙波渺洞庭。

岳陽樓

傑閣出城墉。驚濤日夜春。地吞八百里。雲沒兩三峯。已極登臨目。真開浩蕩胸。不因承簡命。那便壯游逢。

曉行

爲避風波就陸行。潺潺卻愛聽谿聲。楚南不比黔南險。也覺途無三里平。沙岡凹凸不成山。也有煙嵐四面環。遙見人家邨落近。青螺出沒短牆閒。

長沙

行盡官郵兩月程。崇城百雉儼崢嶸。雲開嶽麓千尋碧。秋霽湘江一鏡明。礪砥磬丹仍土貢。火耕水耨樂

邨氓笑它遷客憂卑濕。每日登樓玩晚晴。

賈太傅宅

石牀柑樹跡云徂。故宅猶傳賈大夫。世已治安偏上策。賢如絳灌尙嫌儒。洛陽太守封章薦。宣室君王禮數殊。如此遭逢良不薄。未應問鵬寄揶揄。

東長沙張慧川明府

獻紵論交十載前。滄浪亭畔話纏綿。訪秋圓渚宵連榻。過夏長安午擘箋。管領風騷名下士。平章山水吏中僊。停車傍聽輿人頌。三異中牟萬口傳。昨歲燕臺我送君。今朝握手楚江濱。折麻不待衡門鴈。卷幔同看夢澤雲。泉性出山仍峻潔。蘭言入座益清芬。宦游我似文園倦。慚媿臨邛恭敬勤。

屈賈二大夫祠

去國憂君志未伸。千秋廟食共湘濱。吉占枉向靈氛卜。痛哭誰憐年少人。呵壁問天空侘傺。沈書弔古寄酸辛。莫言宣室虛前席。也勝招魂七澤辰。

中秋試院對月

萬里清光一樣圓。重簾深靜夜忘眠。箏琶俗調休來耳。冰雪高文若有緣。射策諸生難樵燭。鎖闈同事鬪

蠻牋明珠魚目由來混。恐負天家鐵網懸。

試院示同事諸公

杞梓丹沙眼底收。評量甲乙費窮搜。劍埋地下猶沖斗。錐處囊中自出頭。從古文章無定論。由來場屋困名流。風檐甘苦皆親歷。珍重諸公子細求。

五色迷離信有之。隔簾幼婦認妍媸。須求神駿驪黃骨。漫賞鮮新桃李姿。腕底生枯憑畫筆。眼前勝負賭圍棋。當場勒帛休輕下。此是青衫淚濕時。

楚南士子場後以試文謁學使吳雲巖前輩雲巖決其必售者五人曰丁姓丁正心張德安石鴻翥陳聖清比揭曉則五人皆中式而五魁之中得其四焉楚人傳以爲盛事雲巖有詩因和其韻

一一春蠶食葉聲。善鳴此日果先鳴。鑄顏蚤識心良苦。說項方知眼獨明。僞體別裁當代望。愛才如命古人情。三年手植多椀榦。分刈無私玉尺平。

吳雲巖學使訂于重九日載酒嶽麓登高兼訪山長劉孟調前輩以風雨不果往次日孟調以詩見寄次韻奉荅

擬訪皋比嶽麓陽。道鄉遺跡未全荒。一宵秋雨回征櫂。幾疊青螺掩翠妝。問字相從緣恨淺。看山有約興空狂。臥游只合師宗炳。欲借冰絃四座張。

嘲道旁楓樹

秋光九十去侵尋。樹樹山楓尙綠陰。枉費詩人盟息壤。不知叵信在霜林。

代楓樹荅

何心火迫染臙脂。遺世方成絕代姿。可笑鴈臣歸太蚤。不曾留待葉紅時。

予旣作詩代楓樹解嘲。次日山行楓林有數株先紅者。復成是什。片片秋容獨自矜。一宵霜後暈潮凝。不欺然諾從來少。數本眞成耐久朋。

重過武昌

黃鶴磯前水抱樓。金沙洲外荻花愁。燕吳南北傳迢遞。兩地離情入暮秋。

登黃鶴樓懷翁覃谿中允彭六一編修二公典試湖北

榜人催欲渡。小泊爲登樓。奇觀詎容失。高秋聊此游。空濛雲外岫。浩蕩水中鷗。信美非吾土。凭欄亦少留。

城以依山壯。樓因得地奇。塔仍元代剏。棗說古僊遺。樓前有勝像寶塔。題云大元至正威順王太子建。後爲僊棗亭。有棗一本。枯而未朽。云僊人所植。紫

蟹秋來味。丹楓霜後姿。登高羨星使。來趁菊花期。湖北當事。例于重九日。置酒樓上。延主司登高。

田家

霜落秋原萬木衰。蕭蕭亂葉逐輕颺。漁舟小泊丹楓裏。邨酒初筍黃菊時。老屋旋蝸催墮戶。新畬驅犢蚤。

翻犁官租足了身無事。燈火團圞婦孺嬉。

### 德安道中

一徑穿山頂。人來樹杪行。輿丁防足滑。擔僕苦肩賴。楓柏天然畫。原田局上枰。三關遙在望。翠巘倚雲橫。

### 楊忠烈公漣祠

茄花委鬼日猖披。想見張髯瞑目時。倉猝移宮關大計。慨慷伏闕進危詞。姓名空冠東林籍。魂魄誰招鎮撫司。齒冷三朝修要典。南牙宰相北牙兒。

### 入平靖關

曉看紫翠畫闌明。不信身從畫裏行。谿水一灣分向背。山雲片刻改陰晴。盤旋石磴重關峻。曠蕩秋原古木平。屈指歸程垂及半。幾回清夢到神京。

### 信陽

淮水淺可涉。楚雲望已微。日斜棲鳥樹。人語釣魚磯。伐木家燒炭。裝絲客製衣。往還經兩度。逝景迅驂騑。

### 確山

朝辭明港驛。夕秣朗陵芻。風力冬來壯。山容寒到枯。櫛櫞悲落葉。蒼莽眺平蕪。此去中原近。官郵總坦途。

### 曉行口占



山行五日僕云痛。歷徧嶽崎得坦途。底識主人賦平行。幾番回望翠糝糊。

遂平

叢爾吳房邑。猶傳夫槩封。隱成淮蔡蔽。直達汴河衝。納稼先完賦。于茅計禦冬。邨氓閒最樂。擊壤話高春。

鄆城

古召陵地。韓退之平淮西碑。勝之召陵鄆城來降。

楚使盟書地。淮西戰紀勳。激波潁陽月。古驛召陵雲。老樹全成秃。饑鳥似喚羣。蒼涼荒艸路。誰弔太邱墳。

臨潁

小邑停征旆。高歌倒酒杯。苔皴鍾傅字。艸溲馬融臺。禪漢詞多詐。依梁事可哀。千秋傳潁谷。純孝輓風穢。

鄭子產祠新鄭

東里有祠堂。與人誦不忘。救時羊舌誚。授政子皮良。製錦成非易。操刀割恐傷。墓門遙在望。心折杜當陽。

鄭州道中

山如秃赭樹如髡。風緊雲凝漲霧昏。莫道冬來生意少。青青宿麥徧寒原。

渡河

古渡尋滎澤。遙山辨太行。落槽中溜緩。解纜一颿張。微綠千畦麥。深黃萬樹楊。回思前濟日。禪指改炎涼。

曉行口占

日出煙消見遠邨。風光依約是蘇門。天容山色看無別。只認遙空抹一痕。  
最愛寒山面目真。鉛華洗盡見精神。天然古澹仍堅瘦。比似嶽崎磊落人。

湯陰

姜水流城北。淇泉屈邑東。霜清僧寺磬。樹老古原風。故里堯君素。荒墳嵇侍中。金牌三字獄。千載泣英雄。

韓魏公祠

宋家賢宰輔。屈指首韓公。將相三朝寄。安危一體同。黃花堅晚節。霖雨斂神功。漳水有時涸。此祠終古崇。

渡漳水

水道三冬縮。輿梁十月成。荒雞催夢短。瘦馬踏霜行。趁蚤僮偏嬾。衝寒酒易傾。畿南今日到。遙指滏陽城。

晚抵邯鄲

邢趙山川指顧閒。太行千里勢回環。寒雲北入邯鄲道。落日西銜車騎關。倦鳥梳翎將就宿。疲牛脫輓自知還。往來驛吏多相識。塵浣征衫幾許斑。

食客行

平原豪俠如信陵。傾財結客坐上盈。雖處囊中相奇士。三年不識毛先生。騏驎千里山來寡。戀棧甘心託廕下。蚤知碌碌皆公等。悔殺美人謝覽者。雞鳴狗盜脫孟嘗。不如世有市義良。三千珠履從春申。不如世

有無望人。翩翩濁世誰最優。觀君玉貌皆有求。君不見千金上壽天下士。拂衣徑去魯連子。

沙河道中

霜落山無色。沙深艸不生。一河岐兩派。五雉見孤城。文筆顏開國。功名宋廣平。梅花亭外月。十里送人行。

定州道中

寂歷荒寒古渡頭。空林敗葉落飈颼。何人領略蕭森意。明月清風過定州。  
昭陵繭紙久無存。響榻臨檣互攷論。肥瘦紛紛辨真贋。空依定武作兒孫。  
雪浪齋中秀色參。松醪自釀最清甘。八州作督如春夢。又見孤臣到海南。

晚行清苑城外見月十月十日

朝辭郭隗里。夕宿徐河涯。明月大如鏡。照見人鬚眉。空林葉盡脫。了不蔽清暉。微風動枝柯。水中荇藻披。  
一颿風利過。乃是人影移。誰言霜月苦。玩之獨忘疲。山家多畏寒。未暇領此奇。行者日旁午。有景無人知。  
寓意不留意。適爾與吾期。瞥眼恐易失。援筆爲賦之。

自我出國門。五見明月圓。鎮陽禮大佛。虛堂可譚禪。武昌東湖驛。團碁夜忘眠。中秋在試院。官燭三條燃。

歸來宿岳陽。鏡面天水連。六月十五宿真定隆興寺。七月十五宿東湖驛。八月十五在試院。九月十五宿岳州岳陽樓。今夕復何夕。清光益澗鮮。地以

南北異。節亦溫涼遷。惟有如珪月。長此清淨綠。過去及見在。未來亦復然。太潔性所抱。有恆德斯全。莫嫌

霜華冷。悟茲忘言詮。

寄楚南諸同好

乘傳曾游七澤濱。三秋氣侯似春分。曉山出霧皆成浪。晚樹和煙半作雲。引路松楸存古幹。涉江蘭蕙有奇芬。舉頭嶽麓遙相望。恨未摩挲北海文。

冠蓋追陪恰四旬。芝蘭臭味倍情親。舊游回首譚三渚。慧川刺史相過。輒譚涪江之游。古碣留心訪九真。清泉明府江君。蔗畦以手搦吳。

九真太守。谷府君碑見贈。太守風流懷鄭監。寶慶守鄭君東里。文壇派別說吳均。學使吳雲巖前輩。清風店上重相憶。落月依稀入夢

頻。

還京述懷

僂指星軺半載期。楚雲燕樹兩相思。幾回夢憶金鑾直。兩度恩叨玉尺持。湘浦秋風催驛騎。盧溝寒月照鞭絲。歸裝檢點羸前度。篋裏新排一卷詩。

江明府于九拓石鼓山劉莘老題名見貽并索詩

江侯昆弟古與稽。同游石鼓窮西谿。二分垂足百尺梯。徧拓唐宋元人題。千里緘致費赫躡。忠肅留識尙未翳。廣韻。烏奚切。軒如老鶴立羣雞。熙寧新法算黍圭。抗論十害遭排擠。監倉公暇兩子攜。振衣扶屐來攀躋。九字瘦勁懸虹霓。題云。劉莘老來游。踏踏。凡九字。右方題云。後百八十三年。六世孫震孫蒙恩來持。庚節拂拭舊題。不任感愴。寶祐二年秋九月旦。凡三十三字。誰與讒口具。

錦縷父死不葬肆慢慳。廣韻郎奚切。拜罷錄元祐六年言者論摯父死于衡委而不葬爲子不孝。摯抗章辭位自作家廟記以辨當時之寃。文孫持節腰玉犀。三改甲子跡未迷。拂拭遺刻心愴悽。孫以祖重名不泚。維公忠義爲根柢。偶然飛鴻印雪泥。重之乃與瑤琨齊。人貴自立非虛兮。

題袁蕙纒孝廉南湖艸堂圖

湖光一輪鏡面揩。四圍遠山眉黛佳。誰與寄費營茅齋。松毛覆檐落澗階。軸簾終日扉掩柴。仰屋著書萬卷排。不妨土木爲形骸。有時乘輿上翠厓。自攜藤杖青櫻鞵。蒼茫高詠金石諧。謂張雲濤同知同調偕。相於唱和投詩牌。力返正始艾淫哇。扁舟過訪泊水涯。山來臭味無參差。不知主客相忘皆。多君嗜好與俗乖。泉石之癖如宿痲。偶游京洛行六街。征衫曾不浣塵霾。題君畫卷手屢叉。敬亭雲氣滿我懷。

擇石宮庶庭前叢菊盛開招諸公同飲賦詩竝作墨菊長卷出以見示并屬題

小庭才半畝。點綴頗不俗。春華詎非佳。獨愛秋英菊。黃白閒緋紫。淺深各有族。不用瓦作盆。不用架縛竹。所貴全其天。自然無拘束。主人供寫生。不寫形寫神。淋漓潑墨汁。下筆清而淳。百四十餘朵。朵朵皆鮮新。裝堂風牡丹。凡品何足珍。眞花元入畫。畫花直徧眞。相清圖主客。洗盡京洛塵。幾日不相見。坐失此良會。卷後許題詩。附庸收自鄙。迫冬花事歇。掩關且塞兌。日手畫圖看。已勝雅集再。

送吳二匏舍人南還

一葉梧桐始報秋。潞河東下趁輕舟。歸程十里嚴陵瀨。紅蓼西風古渡頭。  
薇垣詩格數吳均。歸興秋風戀紫綬。閒煞青綾舊時被。對花題詠更何人。  
手版支頤爽氣深。家山大好足徘徊。天都面面光明海。此去休教空手回。  
凌寒雨到夙齊名。姜被今年又合并。不羨春明聽漏夜。對牀風雨更分明。

### 五塔寺

卓立金剛座。巍然五塔崇。猶傳印度式。匪假育王功。分影光明月。搖鈴縹緲風。石闌終古在。不壞是真空。

### 萬壽寺

宏麗仁王寺。經營萬歷年。飛來奇石簇。藏弄漢經全。董役傳常侍。延釐說九蓮。一鐘移兩度。彈指悟因緣。

明永樂中命姚恭靖監造鑄大鐘重八萬七千斤藏大內萬歷丁未建寺移置于此國朝雍正中復移鐘于德勝門外之覺生寺

### 昌運宮

香火前朝院。天風戛玉笙。門開青幃對。人蔭白松行。亭覆康陵敕。碑亭二其一刻正德五年六年敕諭兩道苔封內監塋。宮爲

中司禮太監張永所建賜額混元靈應宮永崇在其後客來譚往事。差覺勝元明。劉瑾建大德元明宮在朝陽門外遺址今無攷

### 雙林寺

可怖修羅相。無遮演撲兒。祇林誰昔構。像設至今貽。洞失明陽跡。碑留媚竈詞。碑稱寺後築上石爲山有明陽洞左臺右榭今皆廢

毀碑中稱馮

保曰恩公 隔牆半畝地片瓦拾沙彌

寺東爲興教寺明景泰中司設太監王助所建香火院以奉梵僧者今已鞠爲茂艸矣

哭吳雲巖侍讀

隔夕仍同醉。今朝遽哭君。只疑凶問誤。難制淚珠紛。朝露晞何速。愁雲黯莫分。受恩三楚士。誰作大招文。

題韋鐵夫授經圖遺照

先生扶陽之苗裔。漢唐以來稱德門。詞章雕蟲哂小技。枕藉六藝培本根。廿年寒氈冰雪擁。打頭屋小如祇園。諸生執業競問難。辨舌欲擬懸河翻。胸中空蘊經世略。手無斧柯誰與論。側聞秉鐸泗州日。咨詢疾苦行荒邨。州城久搜洪澤水。民田大半居魚鼈。何人奏報水已涸。廬井非改租額存。一田兩賦計畝算。遑恤閭左朝無殮。一朝丈量詔書下。奏記上官叩九關。至今泗人口碑在。活我婦子釋戴盆。當時牧民者誰子。媿媿坐視徒聲吞。從來行道必有福。不于其身于後昆。公餘下帷課子舍。亭亭玉立皆瑤琨。五郎標格更絕俗。執卷雒誦無晨昏。誰與傳神在阿堵。鬚眉彷彿清而溫。少陵熟食示宗武。康成禮堂傳益恩。惜哉祿養生未及。展圖涕淚空餘痕。生晚恨不識公面。得交公子猶弟彙。忍饑讀經亦有志。廢棄白歎古井簪。願從太史乞家法。五世教授衆所尊。只愁里中兒瞧讓。那不簾金遺子孫。

獐酒詩爲查恂叔太守賦

三年粵西賢太守。薏苡明珠百無有。獐人遮道送公歸。各各獻以一盛酒。金臺召客勸客嘗。色黝而黑甘

且香好添南徼虞衡志。滿酌青州從事觴。

題張右丞秋原放牛遺像

華陽真逸自畫牛。一絡其首一脫繮。楊岐禪宿靜者流。升堂羨渠得自由。斯圖寓意其然不。一翁方瞳更白頭。忘機兀坐與天游。秋林深處聊夷猶。烏犍神駿如驂騑。縱之小坡俾小休。中青本白厥角絅。自飲自齧鳴聲牢。文犧被繡非我儔。底須叩角爲商謳。天空野闊任所投。善刀而藏可自謀。從茲不作穿鼻羞。翁今已去其神留。披圖仿佛瞻前修。湛然心跡不繫舟。此意得之蒙莊周。

題陶吾廬前輩歸去來館圖

先生蚤賦歸去來。山中日永循南陔。前身靖節只君是。卜宅仍在匡廬隈。羲皇之上有歲月。顏謝以降無人材。偶借素心析疑義。要使俗學除陳莠。文孫指點手澤在。清風仿佛無塵埃。小同能承北海學。不須問道求宗雷。

平確齋自臨川令被薦入覲賦詩奉柬

幾載參商歎隔塵。京華會合倍情親。天涯聚散憐同調。海內循良見古人。廉吏可爲從所好。素心相對得其真。寒窗小集團圍話。鴻爪留泥認宿因。

豫章南去數郵程。撫字心勞得頌聲。錐利終能脫穎出。泉流只似在山清。薦書共道公評在。異政知因儒



術成宗派西江兼領袖。吏才元不掩詩名。

紳書東觀話當年。舊雨常懷平澹然。木以不材宜號散。鶴誠善舞未妨僊。要知菽粟功堪濟。終勝俳優格取妍。計日朱轡開五馬。姓名題處紫薇天。

送商寶意太守之官雲南

十年遺愛粵西留。萬里天南又壯游。詩句好題金馬嶂。心期依舊玉壺秋。單車按部人歌德。隻手安蠻帝借籌。不負衝寒輕叱馭。滇山奇秀甲神州。

乾隆二十八年起居注書成詣乾清門入奏恭紀六首是日雪

時政年年注起居。編成常屆歲將除。尋常卷帙休相擬。此是人閒第一書。

紀月編年例發凡。卷分廿四祕瑤函。每月分上下二册一言一動無虛美。特許詞臣手自緘。起居注書成例由本衙門奏聞即緘封送

內閣滿本堂庫收貯不進呈御覽

元日千官賀紫宸。歲除曲宴酒三巡。四時典禮從頭紀。一統于今百廿春。順治元年甲申世祖章皇帝定燕京一統中外至是歲癸未蓋

百有二十年矣

跋尾千言綴後頭。輕塵足嶽露添流。清班久占慚何分。四度書中姓氏留。卷末跋語起居注官例得列名歲庚辰辛巳大昕以畧起居注

官癸未甲申以充起居注官皆得綴姓名卷末

平明啟事入乾清。一隊僊班禮服更。是日例易補服中貴向前相指點。玉皇案吏奏書成。  
銀海光搖六出駢。僊居處處是瓊田。呵融雪水濡新翰。更紀明年大有年。

送周稚圭同年觀察粵西

酌君椒花酒。聽唱驪駒詞。春風一去六千里。壯游持節灑江湄。十載情親比骨肉。如苔同岑鳥共枝。曲江  
列讎午試馬。瀛洲分席書課詩。僂指同館卅餘輩。聚散落落晨星微。素心晨夕我與爾。臭味投合無差池。  
前年天子試館職。如椽巨筆濡淋漓。瑤臺月明鸞鶴響。坐令笙磬皆凡卑。才人例具用世略。特簡侍從充  
監司。文章經濟本一揆。名位輕重由人爲。新正錄別遽分袂。露輞直指天南陲。計程西江歷南楚。沅湘交  
會連浯谿。衡山石廩可落手。起看雲海鋪琉璃。粵西山水更殊絕。一峯獨秀卓筆錐。七星巖迴捫列宿。西  
湖波澹激清漪。戟門晴暇鈴索永。按部排日探幽奇。磨厓處處識歲月。妙跡何減焦黃碑。宦游如此良不  
俗。那戀班直趨蛾眉。雪中鴻爪皆前定。兩萍會合必有期。南魚北鴈報無恙。庶幾一慰長相思。

門神

蚤春佳氣正充闔。袍笏僊曹一例除。刻畫從人爲活計。推敲無地得安居。彈冠卽是當樞日。冷眼相看對  
面初。故紙堆中堪送老。功成不退待何如。

火判

誰言官到判司卑。鏡市元宵得令時。炙手盡知騰上速。攻心卻以架空奇。電光石火爭些子。鳳髓龍筋炫阿誰。捫腹此中何所有。因人作熱亦憐伊。

題曹檀潛先生柳汀觀稼圖

廿年前侍春風座。負郭無田居轆軻。食硯何曾飽糜粥。叩門差免催租課。此時只羨多牛翁。碌碡登場飯黃稔。旁人拍手競擲揄。矯屋頭低氣不挫。一經遺後計未失。厥父載菑子肩播。掌上珠元照乘明。庭前槐已參天大。紫泥封誥下九霄。里鄰聚觀牛酒賀。人情轉眼改菑枯。先生付人一笑歌。卻寫江鄉觀稼圖。綠楊流水圍邨暝。黃梅雨足瀉淙淙。三寸新秧始分科。水田營營如掌平。主伯亞旅來相佐。立苗欲稀兼欲勻。縱橫成列無偏頗。方阜堅好幸其然。鹵莽滅裂報將柰。秧歌信口無宮商。前者一唱後者和。先生科頭搖羽扇。閒看三農泥漉髀。齊人要術書可續。石湖雜興詩能作。頗欣畝亦懷新。未戀北窗但高臥。買田異日恐虛譚。望歲庶慰民勞瘁。伊予上世本力耕。竊祿官倉良已過。回首鄉園顧浦西。四體不勤計何左。陶潛歸田吾欲云。樊須學稼公毋呵。從游應許老門生。倘昇籃輿備一個。

# 潛研堂詩集卷八

奉命典試浙江作

頻年奉使單車出。手種齊松與楚茝。三度承恩今較渥。此邦文獻甲它邦。

鍾陵制義穆堂文。浙榜從前說兩君。眼力縱輸前輩好。得人猶望張吾軍。

順治甲午熊公伯龍康熙庚子李公紱主浙江試最稱得人

聲名標榜久相忘。不愛腴田陸氏莊。但願它時到台蕩。有人爲我具春糧。

出廣寧門

又作皇華使。輕裝出郭門。雨微前路潤。雲淨遠峯尊。稽古榮真忝。程材鑒恐昏。臣心元似水。擬與漸江論。

趙北口

漣漪百頃鏡光涵。十里長隄路舊諳。淺艸平沙通薊北。板橋流水似江南。兩行官柳排濃綠。幾隻漁舟點蔚藍。浩蕩白鷗應笑客。浮家泛宅只空譚。

毛萇里

申培轅固各專門。誰似毛公詁訓尊。北海作箋傳古學。西河製序啓真源。四詩未墜斯人出。千載云遙故里存。太息後賢矜鑿空。欲將部婁廢崑崙。

董子故里

蒼莽長河古木疏。流傳董子下帷居。天人不媿賢良詔。道誼羞稱功利書。曲學公孫方貴幸。助邊卜式蚤遷除。空譚災異真何用。絕倒從游呂步舒。

周亞夫祠

棘門霸上兩營分。細柳堂堂獨不羣。大慰君王拊髀意。竟收頗牧作將軍。重厚堪爲少主臣。顧成遺命記來真。如何吳楚功成後。撤箸翻憎鞅鞅人。

途中偶作

久晴厭塵揚。久雨苦泥滑。正使不晴亦不雨。曉猶畏風午病渴。人生大患求無厭。乃以我相去聲咎造物。一身所欲尙難副。天公焉得人人悅。吾儕乘傳四牡駢。日有廩給糜度支。居停得所人忘疲。客行如此樂復樂。偶值暑雨意不怡。何況悠悠行路者。敝車羸馬愁羈飢。微逐名利將奚爲。

卽事

畿南千里列輕郵。纔過雄州又莫州。半日晴兼半日雨。五分夏雜五分秋。綠楊樹底鳴蟬語。紅蓼邨中浴鷺浮。指點昔年來往地。飛鴻指爪幾曾留。

晏城

地入齊河縣。城仍晏子封。禳星詞正大。枕股義從容。節儉砭時失。流連究主誦。但存足欲戒。擗殿益何庸。  
將至開山鋪

青山正如黃叔度。旬日不逢鄙吝生。忽見馬頭晴翠湧。計程知已到長清。

### 長清山行

四圍屏障似天成。人在青山缺處行。雨過乍添谿水響。秋涼偏愛嶺雲生。朴淳摩詰田家句。平遠營邱畫裏情。好景當前愁易失。停輿卽事一回賡。

### 登岱

巖巖氣象傲王公。錫號天齊配昊穹。五嶽降神尊第一。長男出震位居東。登臨始覺乾坤大。讚誦真慚擬議窮。梁父肅然分左右。同時頰首丈人翁。

歷盡嶠嶽十八盤。攬身已在碧雲端。煙光依約齊州小。水氣微茫少海寒。石壁尙留唐帝隸。玉符莫問宋

家壇。傲來名峯高峙空千丈。俯睇聊同一簣看。

水激沙崩石磴危。振衣直上不言疲。畏難長恐中途誤。陟險全憑定力持。目極吳門橫馬匹。手摩秦樹認

蚪枝。壯觀天借今年雨。添得銀河百道垂。前月大雨。道間爲水所壞。行至山半尙有相阻者。予堅執不可。

半生虛慕列僊材。日觀天門未到來。此度初窺真面目。新秋更喜豁氛埃。已離下界衣無垢。漸近剛風樹

不栽。偃蹇羣峯休傲客。新從岱頂賦詩回。

程蘊山明府招飲白鶴泉上

晨游東岱上層巔。歸路重尋白鶴泉。山水夙饒狂士癖。淹留爲有主人賢。蒼茫擘絮雲初合。澗灩浮波月正懸。酩酊今宵判盡興。詰朝南去又揮鞭。

羊流店謁羊太傅祠

古祠瞻拜薦山肴。野店西風石徑坳。墮淚碑猶存峴首。浮江計已定吳郊。輕裘偏愛文人服。杯酒何嫌異國交。不是君王能信任。樂羊三篋謗書淆。

宿遷道中

近水田多下。依岡徑半荒。人貧愁旱潦。地小束隄防。老屋苦爲瓦。終年麥作糧。莫嫌淮北陋。千里亦同鄉。

雨中過永濟橋

垂虹一道枕清波。漁戶拏篙挂綠蓑。載得滿船魚虎子。秋風細雨六塘河。

隄上

三伏汛初過。新秋仍滿槽。增隄沿歲例。刈葦歎人勞。颿向林端過。波逾屋頂高。寢薪憂厝火。迂闊獨吾曹。

清江浦懷舊

壬申之夏渡清口。因哉亭前賦折柳。是歲相國高文定公具舟送予北上。同舟者仁和周君天度、陽湖三莊君櫛及予三人。固哉艸亭在河道。總督公解之西。文定公所建。三千里路送輕舸。素心晨夕得二友。周生媿雅才。胸羅四庫無不有。莊生倜儻士。痛飲狂歌坎鼓缶。三人齒序我最少。挹袂拍肩相左右。只言莫樂新相知。風裏浮萍那長守。我今乘輅重渡河。已成老翁髮未皤。莊生投効周生死。聚散零落同逝波。艸堂突兀猶如許。艸堂主人今何處。華屋山坵瞥眼殊。栗主空聞祀袁浦。十四年來如夢中。雲泥泡影總成空。惟餘九折黃河水。仍與清淮流向東。

漂母祠

一飯且知報。寧忘推食恩。少年輕國士。老母識王孫。惠比千金重。名將百代存。娥姁亦巾幗。鐘室淚空吞。

題淮陰釣臺

試問真王貴。何如守釣磯。生慚噲等伍。那至結陳豨。鐘室謀何亟。平城計已窮。暮年思猛士。太息擲良弓。

董江都祠和冰持前輩韻二首

漢代徵賢良。天子臨軒策。晁董及公孫。舊史可尋繹。江都獨純粹。言必則古昔。六藝是表章。一使爝火息。嗟哉曲學徒。枉尋勵直尺。居然廁公卿。坐受小吏白。君看平津閣。何如廣川宅。休言宦不達。幸免故人責。先儒專一經。白頭守師承。惟公業春秋。天人理可憑。人事或僭差。五行災異乘。貴近勿優容。天警見園陵。



睦李譚禩祥。所見判淄澠。讀書重有識。毋任勦說仍。膠西王雖倨。禮賢尙足稱。下馬拜遺祠。百世願振興。

同冰持前輩登金山次韻

平山佳麗說揚州。爭似江心翠黛浮。車馬塵埃從不到。忽疑天際結飛樓。  
蒼茫四顧全無路。縹緲中流得此山。身住風波卻安穩。始知方丈在人間。  
遠望蒼苔紫蓋形。馭風頃刻到青冥。只疑身是乘槎客。銀漢中央一點星。  
妙高臺聳俯羣山。玉帶橋頭水一灣。莫道單椒形勢小。聲名久已動江關。  
銜刀如廁也徒勞。兵解由來數莫逃。世上豈無營葬地。卻將遺蛻付風濤。  
禪房要下各排連。曲徑穿來翠嶺巔。試取中泠第一水。要從波底得真泉。  
半日無風海氣晴。山靈知我遠來情。游僊真挹浮邱袂。同到金鰲背上行。  
焦先舊隱若堪攀。咫尺丹梯想像閒。得隴何妨仍望蜀。取之不禁是名山。

游寄暢園

名園結構自然佳。真在青山綠水涯。奇石介如廉士操。清泉鑿爾古音諧。濃陰半畝松杉在。樂事三春花鳥皆。萬歲亭前瞻聖藻。朝川別墅詎能儕。

虎邱

巨石千人坐。清秋雙屐停。樹含新雨潤。窗入遠峯青。臺識高僧跡。池藏古劍靈。題名多未蝕。手錄補圖經。  
左旁崖石有淳祐辛亥。四明程振父等題名。右有淳祐癸卯。長樂潘枋等題名。德祐乙亥。天台戴覺民等題名。又石觀音殿壁間有宣和六年。胡少汲等題名。紹興八年。向子諲題名。白來修山志者皆未之載。

### 山塘

宛轉山塘路。繁華自昔傳。波光千里曠。郭外萬家連。樓閣煙中市。笙歌月下船。狂游思曩日。彈指十餘年。

### 游上方山

果然奇秀占三吳。樓閣空明入畫圖。半畝疏篁蟠徑曲。百尋紺塔倚雲孤。山容蘊藉真名士。波影清妍彼美姝。宜雨宜晴宜月夜。石湖元是小西湖。

### 石湖

潏灑紅亭射曉霞。波光百頃渺無涯。居民種芰分湖面。小艇叉魚踏浪花。遠浦風煙通震澤。上方鐘磬出楞伽。田園雜事皆詩料。曾是常年參政家。

### 泛澹臺湖

解維鮎魚口。落颿寶帶橋。激波杏無際。十里明青瑤。輕颿出其閒。快翦分生綃。煙開虹亭樹。風動淞江潮。水禽去又來。葭葦寒蕭蕭。緬懷浮家客。清標不可招。臨淵起餘羨。且聽榜人謠。

入德清縣界有橋曰望僊喜其名與吾鄉同作詩紀之

故園門對小橋開。顧浦西偏一水洄。此地嘉名欣偶似。今宵鄉夢若相催。魚梁蟹斷分明見。桑葉菱絲次第栽。怪得征人屢回首。便疑身已到家來。

初到杭州

生平但願識杭州。便抵人閒萬戶侯。五十日程欣始到。四千里路不空游。湖光澹沲遙連郭。山色清佳恰傍樓。只待秋深公事了。畫船載酒暫勾留。

試院戲題

終朝閉閣亦何爲。萬卷文書次第披。還怕粗心失佳士。闌中一月廢吟詩。秋風片片落花飛。射的雖懸入殼稀。簾外未知逢勒帛。點頭猶自祝朱衣。壯游濟勝興空賒。閉置真如新婦車。一道重門分內外。吳山咫尺卽天涯。

食筭

箕箒千畝宋人頤。已過春山燒筭期。差喜鞭梢秋正長。食單頓頓一斤貽。主司供給單。每日鞭筭二斤。日有兩頓食。故云。

填榜

丹沙竹箭眼前收。袞袞諸生放出頭。百炬燃來渾不夜。文光直射斗牽牛。揣摩剽襲枉辛艱。千手雷同欲亂真。別白淄澠心獨苦。要令世有讀書人。

青袍鵠立望如何。得意常稀失意多。留取寸心公道在。冬烘頭腦任人訶。  
鉞石相投有夙因。飛花茵溷那能均。宋家坦率休輕誚。我亦當年落解人。

泛湖

秋水清無滓。天然鏡面平。四圍山作髻。鏡裏照分明。出郭便離俗。泛舟聊適情。樓臺金碧色。人在畫圖行。  
九日浙中當事招集小有天園登高卽席得句

依巖面水敞軒堂。賓主東南翰墨場。信有湖山稱絕勝。不妨風雨作重陽。是日笙歌入耳音非俗。詩酒當筵興最狂。佳節向來孤負了。今朝高會願無忘。

表忠觀

錦袍玉帶儼天人。鐵券當年字未湮。運至開門稱節度。時平納土列功臣。碑文淳古思和仲。祠宇馨香續妙因。忠孝千秋終食報。卅傳枝葉尙紛綸。

岳忠武墓

已奉班師詔。空憐涅背文。雕兒能告密。竟撼岳家軍。  
一紙到詔獄。雙棺藁葬時。五郎猶有子。二聖竟無兒。  
公案莫須有。沈寃何日伸。東朝猶未返。遺恨賈宜人。  
文臣動愛錢。武臣多惜死。中原事可知。含寃到獄市。

浙闈藏事蒙恩給假省親恭紀

久列蘭臺校祕文。每依北斗望南雲。叨承鳳詔衡多士。曲體烏私荷大君。十日循陔申眷戀。一庭舞采試  
繽紛。老人倍覺精神爽。聽話天恩到夜分。

程才濟北又湘南。玉尺叨持已度三。敢戀湖山尋勝槩。庶憑文字契真參。人誇桃李新陰茂。天與椿萱老  
境甘。此日登堂拜家慶。添將佳話入叢譚。

故鄉風景尙依稀。暫卸征衣著錦衣。門外喜無熱客鬧。案頭猶是舊書圍。家傳壽骨占應驗。臣祖贈奉政  
大夫王炯年

九十二祖母朱  
氏年八十二世戢良箴誠勿違。贏得親朋相歎羨。簾金終讓一經韋。  
經句子舍重留連。回首睽違十四年。車服敢言稽古力。箕裘恐負義方傳。翁誇矍鑠休扶杖。母恤單寒爲  
著緜。分付臨岐無別語。主恩高厚寸心鐫。

過青駝寺遇雨

青駝寺北去匆匆。古木寒煙四望同。十月東風吹雨過。蒙山全沒暮雲中。

口占

調調刁刁西風生。蕭蕭撼撼落葉輕。秋蟲唧唧復唧唧。客子行行重行行。

曉行

曉星欲落猶未落。僕夫催我起趁站。清泉橫道淺可涉。老樹人立儼冠劍。誰家牛鐸已先鳴。雜以鞭笞言多僂。我語僕夫且緩行。月黑沙深防馬陷。

望岱宗殘雪

雨霽已三日。岱宗殘雪明。斜拖吳觀練。寒偃泰安城。風勁裘知敝。霜濃酒易傾。匆匆乘傳過。回首玉崢嶸。山行

沙回路轉歷巒巖。窄處纔通劍一椽。獨木橋敲聊代筏。隻輪車小卻張颿。蓋茅屋比旋蝸縮。戴石山如覆釜臙。日暮馬蹏行較疾。識途應喜脫征銜。

十月二十八日河閒道中遇雨

十月小雪候。北方例無雨。昨已入大雪。頗訝氣蒸礎。晨興日光澹。亭午雲氣聚。微雨從北來。廉纖絲萬縷。浙浙落疏林。滑滑憚行旅。彷彿江以南。小春候如許。六合今一家。天意示和煦。徒以疆域分。淺哉夏蟲語。

雪後過鄭州

昨來猶見雨斑斑。那識飛霰積此閒。雪滿寒原全沒路。霧籠遠市只疑山。官郵百里分炎冷。客子兼程又往還。趙北燕南今日到。孤城指點瓦橋關。

趙北口殘雪

林端積玉尙封條。冰下叉魚泛小舠。想得西湖當此日。孤篷聽雪段家橋。

琉璃河

征車輾輓媿塵顏。咫尺西峰未易攀。一片玉裝成世界。琉璃河上望房山。

題查恂叔太守榕巢圖

太平賢守政多暇。解西一池綠波瀉。不須岸上更牽船。頗喜枝頭可築舍。一榕婆娑數畝餘。材不材閒天所赦。直榦撐空風日遮。橫枝臥水龍蛇化。向背俯仰隨面勢。似與先生作閒架。巢居之閣有前例。嘉樹何嫌吾久假。開徑祇須就樹根。安窗恰好尋葉罅。一榻以外長物無。十笏之居樂土借。水氣微茫只似秋。月光穿漏偏宜夜。判牘何曾公務妨。覓句且將熱客謝。身居瘴鄉貌更腴。日坐斯巢美無價。只今卜宅傍春明。尙戀前塵如味蔗。乃知寄託苟不凡。一枝居然勝廣廈。不然打頭矮屋長欠伸。樹猶如此徒悲吒。天南榕樹多無限。此樹因公得名乍。丁寧莫掃舊巢痕。它時好與甘棠亞。

漫成

一水逶巡活羣山。峭蒨親日長桃自銜。春蚤柳橫陳。蜂蜚忙何事。絲蘿施有因。喬松千百尺。偃蹇不隨人。丙戌禮闈卽事用壁閒韻呈望山相國漫士少司農臆川少宰及同分校諸公

南宮登俊鎖闈深。元老司衡赤鳥臨。燕許文名推蕝苑。韋平相業出儒林。探驪真喜珠光曠。射斗還愁劍氣沈。話到寒窗稽古日。風檐甘苦卅年心。

廣座從容語笑深。聚奎堂上德星臨。前身永叔元文伯。司農公名與歐公同當代宣公久翰林。煙染松煤香細細。光分藜火夜沈沈。冰壺表裏俱澈澈。想見和衷一片心。

勺水難分渤海深。螢光敢竝月華臨。隨班幸躡僊人跡。列坐眞游作者林。刻燭已輸才捷敏。剝蕉猶媿思深沈。穆如一誦清風句。取士無非報國心。

斗室低吟一榻深。七年光景兩回臨。庚辰會試曾預分校飛鴻踏雪重尋跡。新筍逢春又出林。所望宗工懸尺度。只愁宿學易埋沈。應眞十八東西列。同證菩提不染心。

### 題邵蔚田侍讀收綸圖

六鰲曾得手。獨繭遽收綸。此去江湖闊。煙波自在身。  
緣木人求欲。信天吾所師。得魚同一飽。漫畫亦奚爲。  
一璜何足戀。白首釣磻谿。試看投竿者。江鄉醉似泥。  
蛇足休重畫。屠刀且善藏。從今林下好。見一榜新堂。

### 題趙編修鷗北耘菘圖



淺水淙淙雨後添。讀書不礙灌園兼。猩脣鹿尾都嘗徧。那及秋菘分外甜。

冬至後六日錢籜石少詹招同查儉堂太守紀心齋侍御程魚門舍人畢秋颿侍講曹竹虛編修  
小飲分韻得日字

三百有六句。赴壑蛇行疾。吾儕耽文酒。爲樂時勿失。朝聞折簡招。快若癢去蝨。隆冬相暖熱。作會慕真率。後至不我拒。密坐可促齮。酒行蕉葉三。客偕竹林七。捫腹方便便。舉醕尙逸逸。主人顧姪客。言啓畫禪室。橫斜萬玉圖。煮石山農筆。席間出王元章萬玉圖長卷傳觀一一皆生動。疑有暗香出。華光與補之。誰能漫甲乙。忽憶香雪海。玉梅萬株密。此時踏雪尋。清逸興無匹。見彈思炙鴉。欲語失笑啞。近游天所許。懷歸我已必。銷寒判今宵。友梅願異日。

送趙雲松出守鎮安

詔守繁難郡。官辭侍從班。文雄能敵瘴。政簡足安蠻。臘月衝寒去。長途叱馭艱。天教詩境拓。飽看粵西山。世方尊外吏。君尙戀春明。結習惟文字。關情獨友生。才由更事出。心到瘴鄉清。莫獻籌邊議。南交亦我氓。

府南爲交趾地。交人奉職貢甚謹。故云。

謝文節橋亭卜卦硯歌

硯爲查榕巢太守所藏

是何一片石。千秋磨不磷。壘山先生遺手澤。滿堂觀者神爲振。當年變名入建陽。朝天橋上亭中央。明夷

三日義不食。却以破硯當餼糧。君平賣卜非吾匹。北望中原長哽咽。眼中只有石丈人。江南且無廝養卒。集賢學士來求才。手書卻聘心不回。太息作銘刻左右。重公并重此石友。硯之兩旁刻程文海銘云。此石吾友也。不食而堅。語有之。人心如石。不如石堅。誰似當年采薇。首陽采薇計已成。倉皇重作燕山行。憫忠寺中守義死。不食而堅與硯似。不食守義賢也。凡三十二字。公之北去硯南留。埋沒泥沙百卅秋。好事得之識歲月。廢硯足抵周天球。硯背有明人題宋謝侍郎硯五字。左方云。明永樂丙申七月。洪水去橋亭。易爲先生祠。相地得之。閩後學趙元。榕巢太守癖嗜古。紫檀匣子深藏弄。斗室居然七客寮。耐久石公堪共語。歙州龍尾名夙聞。貞心不轉獨此君。停尊欲醉忠臣酒。炙硯慚無放膽文。

### 病起

四十年猶壯。經旬病獨侵。害風增欬逆。伏枕屢呻吟。思澀詩魔退。精銷藥債尋。今朝差快意。屋角聽鳴禽。五色徒盲目。三餘欲息肩。安心真是藥。省事便成僊。昭略生來瘦。元章近日顛。山妻苦相勸。第一且歸田。  
人日同王琴德朱竹均曹來應畢湘蘅陸健男登法源寺後閣晚飲琴德寓齋同東坡廣陵會三同舍故事各以字爲韻予得曉字

人日例登高。此風近來少。西曹澹蕩人。志欲出塵表。約我試春游。初哉首基肇。法源古寺近。毘盧修閣竄。一握去天裁。千里極目了。鈴語清而和。鐘聲輕不窳。上方洵嚴淨。下界徒纏繞。犀首適無事。止酒毋乃矯。同隊水中魚。故交松上鷲。聊復恣談嘲。不待引介侶。騷人感初度。是日予四歲。月如過鳥。念念煩惱縛。法

鏡本常皎。在家蒲褐師。李德好譚禪。題所居曰蒲褐山房。大意已先曉。泰山秋豪末。究竟誰大小。

舟行偶占

十指拏篙邪許同。腰牽百丈曲于弓。篷窗兀兀低頭坐。閒看來船使順風。浩歌擊楫滿天涯。生長江鄉每自誇。半夜疾風人不寐。始知泊宅不如家。

衛河

河曲如之字。颿斜作扇形。依依岸旁柳。猶賸數分青。

臨清

城外雙流合。波光玉帶彎。風尖舟似箭。水縮岸成山。置牖裁通漕。譏商舊設關。北來稱鎖鑰。煙火萬家環。

阜河

出牖通漕口。沿流下阜河。颿隨風轉脚。艣過水旋渦。樹老殘黃葉。沙明浴白鵝。旅人聽最喜。半夜有吳歌。

宿遷

左挾中河右大河。彈丸小邑地無多。長風送客過淮浦。輕舫沿流學楚歌。畚土丁夫勤版築。算緡關吏恣喧訶。拊循彫勅良非易。傳語當官政莫苛。

見道旁艸舍戲作

雪壓風掀雨又零。編氓終歲苦伶俜。誰知廣廈神僊客。也縛黃茅作小亭。

### 汜光湖

澗湖萬頃鏡新磨。撒網家家住碧波。行到淮南勝淮北。艸房漸少瓦房多。

### 冬至京口阻淺

到家途漸近。留滯復連朝。風逆濤頭縮。天寒澤腹枵。行傾京口酒。坐俟海門潮。不寐鰓魚目。隆冬第一宵。

### 偕蔣春農舍人游甘露寺

潤州城北三芙蓉。昔人曾以神山況。屹如北固居中央。震爲長男方主鬯。老鶴昂藏首俯啄。卻顧金焦雙翼張。甘露之寺當其巔。傑閣凌虛誰昔勑。茫茫浩劫閱廢興。刹竿千載猶無恙。元豐鐵塔插紫霄。正統金經闕龍藏。修廊屈曲宛虹垂。正殿巍峨滿月相。六時梵唄長讚誦。萬里江山作供養。古鐘製從至正年。巧思乃出平陽匠。達魯花赤識姓名。方信圖經語多妄。

大殿銅鐘元至正九年造鐘款有鎮江路達魯花赤馬速忽總管李世安鎮江上萬戶府達魯花赤永安

名又有溫州路平陽縣匠人名鎮江府志職官表失載馬速忽名又誤以李世安爲達魯花赤不知世安漢人不得任達魯花赤也我昔翦江數往還。探奇未到常惴惴。天

寒潮涸阻歸舟。夙緣未了今宜償。舍人本是山中人。導吾先路蠟屐綱。水枯遙指巖壁露。木落兼無榛蕘。妨徑造禪關心地涼。更上岑樓眼界放。哆口直欲吞滄溟。摩頂居然俯羣嶂。平生富貴吾不戀。一餉清閒神所賦。會須徧踏江南山。竹杖從君次第訪。

遣懷雜題 悼亡妻 王恭人

泊宅秋來願少酬。輕裝穩上潞河舟。清輝玉臂今何在。看月蓬窗獨自愁。  
布衣椎髻不曾嫌。雅稱貧官上竹鮎。懊惱疾風吹爨室。從今擬廢五音占。

挂壁丰姿宛似君。返魂那有異香薰。真成南旺湖頭水。行到中流卻兩分。

鐵甕城邊風雪餘。京口阻淺兩日三山秀色望何如。魂歸到此應留戀。四十年前說悅初。恭人生于丹徒學舍

江上青螺秀作堆。風流眉嫵事成灰。將愁排遣終難子。只似潮頭去又回。

生無枉橫亦無愆。相見今生詎有緣。倘遇蘇州趙十四。結壇判倒一囊錢。

伯通橋下水如銀。一昔經過亦愴神。廡下祇今誰舉案。固應目我作凡人。

美酒新魚自製詞。急流長怪退猶遲。今朝果泛東吳櫂。孤負懷歸管仲姬。管夫人漁父詞。身在燕山近帝居。歸心日夜憶東吳。斟美酒。膾

新魚除卻清閒總不如。趙子昂題云。吳興郡夫人。不學詩而能詩。不學畫而能畫。得于天者然也。此漁父詞皆相勸以歸之意。無貪榮苟進之心。其與老妻強顏道雙鬢未全斑。何苦行吟澤畔。不近長安者。異矣。

彈指匆匆歲又除。安仁髻髮已全疏。縱然下溟田居遂。更有何人出荷鋤。

八音歌效黃山谷

金屋貯阿嬌。彈指朱顏彫。石椁自云固。長夜不復朝。絲吐蠶已僵。玉韞璞空剖。竹林有達人。閉關但頌酒。  
匏樽引自酌。醉入無何鄉。土中皆可埋。青烏誠荒唐。革故鼎取新。勞勞歲月促。木散匠弗顧。得全吾道足。

金人背有銘。戒哉三緘口。石言晉魏榆。反常乃爲咎。絲惟飲無何。籍不挂臧否。竹直懼先伐。水虛故善受。匏繫人所全。櫟散天與壽。土炭重有時。榆枋起亦偶。革華暫相於。毛穎盟耐久。木人石心兒。仲御吾尙友。

此页空白

# 潛研堂詩集卷九

到家作

十年詞賦殿頭傳。一夜蓴鱸夢裏緣。竊比奎章虞閣老。在朝應制又歸田。

虎邱追和清遠道士韻同陳藥耘作

春風吹我游。閉門真癡漢。最近數虎邱。而無猛虎竄。平平轉多奇。小小頗堪玩。陳生今雲卿。肯伴元結漫。舟繫青山橋。人行綠楊岸。劍池水清淺。講臺石零亂。摩娑題名字。殘缺已失半。俗生不好古。遺文日放散。安能呼蜉蝣。與之語昏旦。日高花坼房。雨過禽刷翰。撫景良可吟。學道遲自歎。皈心普門品。合掌人天贊。  
石觀音殿壁間刻大乘妙法蓮華經觀世音菩薩普門品一部。下方列銜者。自右僕射兼門下侍郎平章事曾公亮而下。凡九十餘人。不畧年月。以宋史宰輔表。公亮除授次第推之。當在熙寧初矣。

和陸魯望補沈恭子詩韻有序

魯望補沈恭子詩。不知恭子爲何人。予以南史證之。蓋吳興沈初明也。初明仕梁爲吳令。陳文帝時以明威將軍還鄉。卒于吳中。其答張種書極道虎邱之勝。誠不媿風流詞翰之目矣。所謂清遠道士者。或寓言如茂陵通天臺之比。抑世果有僊人。千年不死而遊戲人間者邪。晉宋已降。官未至台司。又無五等之封而得諡者。例稱子。



安期曾干楚。柱下亦仕周。誰云列僊人。非卽爾我儔。關洛一枰弈。秦漢兩部優。日月眼中過。山水腳底游。棲神遊八極。鍊形藏九幽。不知何時臘。但覺天易秋。適來與我遇。勾吳有故邱。竝坐千人石。偶配劍池流。彭殤孰爲天。今昔奚足愁。翩然化鶴去。肯作樊籠囚。桃源津已問。干寶記獨搜。恍兮成夢覺。爾唱我且酬。

第三泉

吳郡志唐張又新品第東南烹茶之水爲七等以虎邱石井爲第三松江爲第六

虎邱泉第三。又新品久傳。阿誰屈次五。後來強爭先。陸羽品虎邱泉第五人心有愛憎。泉德無差殊。夫惟不爭名。是以長不枯。

游師子林

柏池松徑未全荒。咫尺居然萬仞岡。題詠最多名士句。清幽爲近上人房。繚而曲似盤之谷。阻且長非水一方。畫手倪徐今不作。天留真本在吳閫。

鱗諸巷

俗訛爲穿珠巷

炙魚抽劍決須臾。曾爲吳王啓霸圖。何事世人多愛富。卻將俠客作穿珠。

虎邱觀玉蘭

虎邱玉蘭天下傳。坐臥其下日屢遷。游人莫漫輕題品。曾閱游入六百年。白于繇更膩于肪。晴日烘開澹澹香。共信潔清能自保。生來不上美人妝。

托根近在法王居。萬朵含苞次第舒。欲祝人天長養力。更無風雨一旬餘。

同陳藥耘宿陸篠飲荷風竹露艸堂

江漲橋頭路。油雲濕四圍。偶同陳正字。來訪陸探微。艸閣邀山入。蔬園得雨肥。主人留信宿。翦燭話依依。

同篠飲藥耘步至湖上泛舟登孤山放鶴亭

湖山與我有夙約。際曉東風收雨腳。清游造物詎我靳。火急出門杖策各。客兒蠟屐從所好。陶令籃輿且先卻。花光橋抵松毛場。桑柘陰陰青繞郭。一重一掩引入勝。四山合沓疑張幕。三年再到西子湖。澹妝濃抹渾如昨。榜人解事若相待。一葉扁舟鏡中著。沿緣挈音荇藻閒。卻上孤亭望寥廓。昔人孤絕肯結廬。特立雞羣意有托。茂陵不艸封禪文。齒冷乘軒衛公鶴。有山可居品便高。欲買空言氣徒索。興來且作十日游。廉讓之閒差不惡。

上巳日游靈隱諸山

不負嬉春上巳期。氣晴天朗最相宜。菜花黃惜三分減。柳葉青兼萬縷垂。對酒常醒差少債。愛山成癖未須治。鷺峯著意延生客。紫翠玲瓏特地奇。

飛來峯

岩巖鷺嶺認靈蹤。始信飛來第一峯。壞塔尙傳埋舍利。幽龕隨處肖真容。洞穿巖腹皆通透。泉出雲根自

激淙結習未能忘好古題名一一拭苔封。

湖上雜題

十里春風碧玉流。四圍曉霧翠眉浮。游人第一難忘處。明聖湖中水月樓。  
湖船精妙者名水月樓見戒庵漫筆

一片光明鏡裏身。四時涼燠總宜人。十分面目纔窺半。前度深秋今暮春。

湖上寓樓

錢塘湖口寺門前。黃篾三閒一榻便。排闥山爲不速客。傍檐柳亦有情緣。清宜摩詰詩中畫。窄比思光岸上船。晴雨春光都領略。樓居真足喚神僊。

葛嶺

稚川澹蕩人。偶爲餘杭游。遂令斯嶺名。與公俱千秋。我來登絕頂。江海生雙眸。雲蒸僊巖石。竹覆僧寺樓。井湖煉丹舊。臺延初暎浮。清泉流鳥下。宛聽琴空侯。蚤衰導養拙。神僊非所求。卻掃謝浮榮。肯許同調不。何必訪勾漏。此中可忘愁。

葛嶺詠古

集芳園裏貯蛾眉。鐙火西湖此一奇。六載襄陽圍不解。相公卻有半閒時。公田搜括竟何堪。幕上營巢計太憨。風月無邊枉拋卻。南行愁煞木棉庵。

鳳凰山

天目飛來一鳳皇。婆娑兩翼拱錢塘。木波去後遺蹤失。猶有人稱御教場。  
一王駟馬萬人誇。腰鼓城堅靜不譁。造物那知旁舍貴。卻驅怪石爲排衙。

水樂洞

水石相撞擊。善鳴假以鳴。何必絲與竹。太音無虧成。

三生石

咄哉澤公癡。三生證夙諾。顛倒一念誤。乃爲情所縛。生死且未忘。何怪長墮落。至人外形骸。無相本無著。  
重游飛來峯登絕頂疊前韻

只疑偈仄少行蹤。捫葛真登最上峯。石露礬頭何齒齒。雲生鳥下自容容。夕陽倒射巖閒塔。夜雨平添澗底淙。珍重飛來莫飛去。天龍爲我一丸封。

韜光庵用白樂天招韜光禪師韻

嶺上疑無路。雲中別有家。行過翠竹徑。忽見金蓮花。浩蕩登高興。清幽學道芽。啞羊真可哂。不會趙州茶。  
神尼舍利塔

神光夜起般若寺。阿師識兒風骨異。五柱入頂鱗角生。苦桃臙走兒墜地。焦梨嚙索數欲終。晚得天下文。

軌同。此公詎止作柱國。佛法所佑非人功。仁壽初元頒舍利。各造浮圖石函瘞。河朔清流解貢諛。普爲諸州紀符瑞。妙善菩薩入涅槃。睨地伐大漸放癩。阿摩侍疾數無禮。區區佞佛良可歎。慈悲之教自天竺。沈猜峻法祚宜促。可惜神尼付囑言。不勸君王少誅戮。恆河沙劫閱廢興。斷塔猶以神尼稱。人言佛光夜常見。照徹十方無盡證。

僧房偶題

公案重重落白窠。上堂舉拂意如何。九年面壁無言說。失笑兒孫語錄多。打包參學辦行勝。青豆房頭度牒增。休說解吟僧亦俗。爾來并少作詩僧。

學士橋

背郭一灣春水活。臨湖盡日遠峯描。它年倘卜杭州住。記占清波學士橋。橋在清波門外。

寶成寺觀元人所鑿麻葛刺佛像次藥耘韻

世間何人最慈悲。調御丈夫號悉達。若云慘毒可度世。何異活人用野葛。世尊皮肉捨勿吝。普濟衆生如掬渴。云何番僧作變相。卻塑魔王喚菩薩。祝釐漫說朶兒禪。梵語或訛馬吃刺。壘壘憫懸胷前。吮血磨牙澹生活。旁觀縮舌增怖恐。錯認鬼母劫兒鉢。我聞黑神起北方。柳貫護國寺碑。摩訶葛刺神。漢言大黑神也。摩訶葛刺即麻葛刺。譯音無定。提兵南下助式遏。當時君臣各膜拜。受戒皈依意惻怛。涿鹿之北全寧南。涿州全寧路。俱有。六時供養

求解脫。此像鐫從至治年。石不能言也。塗抹供羊。羊果害人。帝師義墮氣已奪。見馬哈刺佛前供羊心。上曰：曾聞用人心肝者有諸。帝師答曰：有之。凡人萌歹心害人者，事覺則以其心肝作供。耳上再問曰：此羊曾害人乎？帝師無答。輟耕錄所云今上謂庚申君也。

### 寶石山次韻藥耘

崑嶠出城西。卓立千花塔。雷峯儼弟鬣。鴈行不相雜。曉迎暎光射。暮受雲氣納。盤石踞其顛。呀如門半闔。山高風自涼。匪秋亦颯颯。二分垂在外。側足敢輕踏。遙聞鐘磬聲。隔嶺相應答。天然好圖畫。可惜付邨衲。安得買山資。結茅安木榻。澹沱高士湖。一日繞一帀。傳聞寶正年。制書可摹搨。千搜竟何有。前路碧蘚合。

### 游吳山紫陽洞

城隅抱崇峯。樓閣插天半。支從龍山分。秀奪蛾眉粲。晨聞折簡招。濟勝得良伴。小泊學士港。同訪列僊館。孤亭洵四宜。平臺詫大觀。紫陽頂最高。丹磴陟匪憚。湖山秀而文。江海浩無岸。分明在目前。一一几上玩。山腰尋古洞。曲徑連復斷。人險蠅穿珠。得路鳥攬翰。飛來青芙蓉。塞開紫絲幔。豐下朶頤垂。窪中引手盥。迷蹤注眼認。異境咋吾歎。僊翁昔棲真。妙用在嬾散。胡然怛化餘。留榻召舉案。乃知情難忘。夫豈吾輩但。山中遺蛻在。俯仰人代換。令威倘歸來。安識舊里閭。學道煮沙初。駐景熟胛旦。對酒且放歌。低昂任土炭。

### 湖上對雨

疾雷殷殷陣雲烏。對面山光一霎無。插口忽疑噴急雪。波心無數撒明珠。快思老杜翻盆句。濃似襄陽潑

墨圖獨坐小樓叫奇絕。雨湖真箇勝晴湖。

連日徧游湖上諸刹有懷古德各題一絕

虎跑寺寰中

說得須行得。何人悟宗旨。多事兩於菟。遠移南嶽水。

法相寺行修

修公古如來。宴坐味禪悅。參禮但默然。永明大饒舌。

聖果寺文喜

前三後三三。惘然味多少。文殊自文殊。大意吾已了。

靈隱寺慧理

杖錫西天來。呼猿明月上。孤峯飛何之。師言毋乃妄。

鳳林寺道林

棲禪依鳥窠。安心架巖廣。可笑宰官身。不知住處險。

瑪瑙寺智圓

杜門中庸子。不識王欽若。致意老慈雲。一僧且留卻。

龍井寺元淨

辨才住訥齋。非辨亦非訥。何處見全身。唾霧卽明月。

智果寺道潛

苦空百念冷。新句尙驚衆。一酌參寥泉。是身卽是夢。

歸舟口占

輕波滑笏一颿開。細雨留人濕綠苔。多謝南高峯頂塔。五十平聲里外送儂回。

題王麓臺蘇齋圖卽用卷中查初白先生韻

峨眉僊人去渺茫。誰能抗手與頡頏。遼哉尙友七百載。有若米顛寶二王。與古爲徒世大笑。從吾所好生非狂。稽首拜遺像。堂堂復堂堂。儼然俛仰揖讓于其旁。當年枕榔林中儼屋尙見逐。祇今空齋供養弈弈鬚眉光。鏡潭月相磨。繡谷花半掩。地已占清涼。心真忘夷險。麓臺翰墨奪化工。咫尺萬里望不窮。雪堂白鶴觀。恍忽移此中。天人游戲八極同。飛鴻偶見指爪蹤。不信桃花塢畔宅。眼中突見長帽翁。伊余生晚思遺風。裴回小庭三徑通。珊瑚網中畫卷亦無數。清遠獨愛王婁東。丁寧勿浼寒具手。過眼雲煙夫豈偶。紀聞它日傳中吳。耕漁之軒名與俱。倪高士耕漁軒圖爲吳人徐達左作銘心絕品世所無。

題王石谷蘇齋圖



笠屐頽唐古丈夫。騎鯨去遠欲相呼。東坡號借香山白。繡谷齋顏玉局蘇。春夢過來那有迹。小園賦後未全蕪。摩挲雙眼誇奇絕。心折耕煙第二圖。

題繡谷牡丹圖

康熙己卯蔣樹存先生邀諸名流于繡谷送春庭中牡丹初放馬元馭扶藪楊晉子鶴徐汝采若及目存上人上睿各圖一花乾隆戊子十月先生孫應平出圖相

示爲賦  
二絕句

胭脂多買亦何爲。一朵居然絕世姿。好手寫生從古少。徐黃難得在同時。藍尾三杯酒未乾。斬新花蕊出豪端。百年手澤能藏弄。羞煞人家黑牡丹。

家中牡丹

暮春三日到臨安。頗恨尋春後牡丹。那識故園遲半月。天香猶是待人看。

讀漢書

黃綺避秦漢。采芝汗漫游。不與豎儒伍。而況辨士流。吾冠幸而恙。欲溺將奚由。姓名落人間。失計逢留侯。鴻鵠羽翼成。徒爲娥姁謀。假館建成所。安呂非安劉。區區具金幣。毋乃溷公不。

茂陵慕不死。意與僊人期。豈知巫蠱禍。乃自方士貽。黃老尙清淨。文景所以治。變而譚神僊。所見一何卑。我欲見鉅公。罔上如嬰兒。服藥可少病。勿爲妖妄欺。

在漢中葉後。政柄歸尙書。置相不選賢。竄取容默徒。流汗婦參語。僂背吏夾扶。扶陽與防鄉。醞藉稱通儒。

恩澤列徹侯。促媿保位俱。威福自臣作。履霜慎厥初。居攝頌功德。後來奚足誅。  
厚味實腊毒。高位易觸罪。五鼎食幾時。失意便菹醢。不見葛繹侯。刻印拜上宰。涕泣不肯受。自云從是殆。  
才果濟蒼生。溘死亦何悔。淺哉曲學夫。持祿不知止。  
文網日以密。士節日以貶。造請公卿閒。見笑徒自黠。藜席避田蚡。長揖無汲黯。將軍肯臨況。治具吾敢儉。  
乃公戒牀下。大要教兒鬪。偉哉平林朱。願請尙方劍。  
持平三尺法。人主與民共。云何武健吏。內深次骨痛。操下束濕薪。一時重足恐。殺人計自安。古法置叵用。  
天道有神明。好還神所恫。賢哉萬石姬。斯言可警衆。

贈張丈擔伯

詩翁老去髭毛疏。風格依然正始初。無事何妨浮白飲。研思雅稱艸元居。羊求舊侶凋殘後。禽尙游蹤冷落餘。魯殿靈光今獨在。它時通德表門閭。

王彙英家藏古錢歌

錢府上士受姓始。我今逃債無從逃。九章綴術亦曾學。不解子母營羊羔。平生最嗜金石刻。鐘鼎款識窮爬搔。貨布雜品儲一二。如捉贏蛤遺鯤鼈。王生好古今都穆。卜居恰近吳南濠。十年藏弄肯出示。古色斑駁爛錦條。溯初尊盧首作幣。三品後出泉布刀。外圓函方法九府。扣囊底智自六韜。金刀契錯布么幼。黃

新代漢先塗高。真人白水讖已驗。造物終厭蛙聲囂。五銖之廢開通鑄。椒房指爪痕深牢。紀元各各吉金勒。三司呈樣頒神臬。所嗤僭僞盜正朔。寸涔妄欲驕海濤。世閒兒女尙厭勝。吉語宛轉銘周遭。幕文奇詭難殫述。星官北斗下采旄。雙魚三雀隱龜背。蒼龍糾屈鸞翔翱。或言撒帳取善頌。貴主釐降夸富豪。或云佩之辟五兵。卻鬼可當度索桃。顧譜洪志人所讀。愛而不見空鬱陶。多君聚之在掌握。區別年代分牛毛。臨川之愚和嶠癖。同牀異夢嗤若曹。阿堵中物如此良不惡。傾身障籬誰訾訾。孔方絕交吾已久。畫餅差勝啖白蒼。白蒼艸食之不飢乞君拓文遠相贈。瓊瑤欲報心忉忉。

題姚和伯射獵圖

寶馬茸裘態甚都。車中閉置晒非夫。不看南部煙花記。卻擬東丹射獵圖。詭遇休誇獲十禽。參連白矢法重尋。由來射御無非學。見獵何妨儒者心。逐兔呼鷹一隊偕。雨餘天闊淨于揩。江鄉那有寬平地。姑妄言之亦復佳。

登馬鞍山

一峯縹緲小而奇。歸熙甫云吾崑之馬鞍山小而實奇乘興登臨憶少時。彈指流光真小劫。拍肩名士又新知。危崖大字鐫和仲。荒艸孤墳認改之。欲倩孔珪謂孔鶴瞻謝猿鶴。獻嘲休誚北山移。

題王未巖畫井引

未巖修撰。蚤爲麓臺入室弟子。筆法蒼勁。駉駉欲度驊騮前。登第未久。卽赴玉樓之召。尺素流傳。人爭寶之。此本雖未完。而架構已具。一展閱間。如見經營慘澹之迹。鶴谿主人善藏之。勿爲人豪奪也。

縑素風流數太原。奉常墨妙啓兒孫。麓臺已老耕煙死。又見吾鄉畫狀元。  
浴堂西畔蚤修書。紅杏詩才小宋如。幾輩句臚矜第一。評量能事要推渠。  
買畫金多膽太豚。紛紛贗鼎散人閒。匡廬眞面誰能識。一幅模糊未了山。

### 崑山學宮石

洵美夫子堂。卓立一品石。氣蒸震澤濤。秀分洞庭脈。天公爲鐫劂。雲根起巖積。混沌竅鑿七。空洞腹容百。  
舞女大垂手。飛禽小張翮。劍客但蒯緱。神人儼冠幘。中豐肥勝瓠。下銳枯疑腊。豹文窺一斑。螺髻露寸碧。  
置之在東膠。重于寶尺璧。雨灑翠娟娟。雲生青團圞。左股割蓬萊。全身見姑射。玉山連修眉。婁江繚匹帛。  
似充雪堂供。不費康樂屐。吾儕雅好事。來觀湖疇昔。謂言丈人峯。來自平泉宅。石本宋參政衛文節公家物夷亭潮初  
驗。石浦居新闢。扇障元規汚。詩取白傅適。奇石聚所好。兼金買非惜。九華列几案。二室落肘腋。羅立如兒  
孫。得意詫賓客。茲石尤絕倫。與公交莫逆。雲煙過眼殊。山邱回首隔。高齋犁爲田。曲池填成陌。遂令皴瘦  
姿。半遭屠沽尾。歸然適有幸。觀者愛無斃。巍巍尊經閣。肅肅函丈席。諸生競摩挲。異代發光澤。介如君子

操偉哉。巨人迹。它山攻可籍。一簣進求益。洗宜泮池水。蔭借歲寒柏。十鼓媿岐陽。七壁陋張伯。誰云一卷小。肯以九鼎易。卻憶畏壘亭。曾載吳松舶。雙峯比泰華。百年挂蘿薜。歸太僕安亭故宅有雙石其一亦衛文節物邨童敲火頻。牧牛礪角亦。席裏倘移來。劍合眞喜劇。盡取望徒奢。得一心已懌。奇傳到公名。拜學米家癖。清叔人可重。熙甫記良核。題詩諗後來。流連日將夕。

題西莊丈室散花圖

毗邪一室靜無朋。十笏量來了不增。爲有散花天女在。此生判作在家僧。茂苑春光花白紅。斬新一朶倚東風。天然滿月天人相。只恐劉元塑未工。雕籠百舌弄朱唇。萬首唐詩記得眞。見說送郎新句好。清才今又見陳珩。法門不二悟如何。結習多生佛所訶。何事靈山諸弟子。一身容易著花多。淨名示疾原非疾。嚼蠟無心卻有心。多事登肩老羅什。不知吞卻幾回鍼。

邵桷亭築小樓題曰梧巢作詩四首諸同人多有和章邀予繼和

百尺樓居倚碧梧。目窮千里豁平蕪。秋霜躡屐探鴉舅。春雨添棚護鼠姑。境到閒時喧亦靜。心從安後有仍無。南華義諦都參透。牛馬隨人儘意呼。

便欲身攀棲鶴巢。安牀恰對樹枝交。購書只似求聲鳥。避俗眞嫌在戶蛸。魚乍戲餘蓮動葉。燕方來候竹

抽梢元亭問字尋常事。門外從無熱客敲。

惠子多方據槁梧。維摩宴坐作跏趺。木因號散能逃斧。金爲求祥怕躍鑪。立腳定來知地闊。置身高處似雲孤。堯夫觀物書成後。安樂窩中自得吾。

果有楊修菜有巢。主賓雜坐閒談嘲。樓高雅稱登王粲。詩苦偏宜學孟郊。親友搏沙嗟易散。光陰炳燭莫輕拋。更呼便了申初約。不遣塵埃積滿坳。

讀蜀檣杙得絕句八首

井底蛙聲妄自多。鬼兵開國事如何。武陽叢冢閒枯骨。枉向風塵識八哥。  
樂府新聲試轉喉。海棠花蕊想風流。徐家姊妹皆傾國。玉貌偏輸趙解愁。  
玉簫歌徹月華新。長夜觥籌集會真。怪煞嘉王悲底事。臨觴不飲太癡人。  
翊聖宮深入侍曾。煙霄謬陟那能勝。十臣各有安邦略。專寵無如荆髮僧。  
龍舟戲水碧淙淙。花外樓臺見數重。從此錦城真似錦。城頭張幕種芙蓉。  
長鞭萬里去何依。餘慶新年願已違。天水東遷向何處。夢中神語出青衣。  
指揮如意擁貔貅。漫擬隆中第一流。卅載平章非伴食。它年降表要卿修。  
石經次第刻豐碑。下筆羞爲輕豔詞。莫道降王才思少。官箴四語後人師。

外舅王虛亭先生挽詩

華屋山邱瞥眼殊。江鄉太息失潛夫。伐檀詩格先雙井。嘉祐文心啓二蘇。身健幾曾扶卽栗。心安偶喜坐團蒲。十年八座郎君貴。雜誦依然稷下儒。

清羸碧鶴鈍無知。一見偏將國士奇。不獨譽兒兼譽壻。只宜稱舅又稱師。三年寂寞鰥魚泣。七日倉皇梁木萎。地下若逢靈照女。爲言蒜髮已如絲。

# 潛研堂詩集卷十

## 京口阻風

恆河回首感波斯。潘岳顛毛蚤就衰。舟遇逆風多費力。人來熟路懶題詩。漸疏肉食牙將落。苦愛山行腳未疲。問訊竹林知不遠。天應留我一探奇。

## 榜人謠

江上多顛風。三日斷來去。鄰船猶未開。且莫爭先渡。

## 渡黃河四日入邳州境

水急沙深兩岸彎。經旬不見髻螺環。推篷一笑真難得。目送邳州幾點山。

## 昭陽湖

濛濛萬頃水雲風。八月猶殘菡萏紅。湖上人家無長物。蕩舟齊出賣蓮蓬。一年強半是辛勤。家具無多只一身。菱角魚苗都賣卻。晒將荷葉當炊薪。兩行老柳綠方酣。百里遙山翠欲含。只少紅樓兼畫舫。風光約略似江南。

## 謁先賢仲子祠



世已無堅白。誰能免伎求。升堂功自進。浮海去何愁。品與顏曾亞。賢于管晏流。巖巖鄒嶧近。廟食共千秋。太息東周日。虛生政事才。未逢治賦使。終致結纓哀。君子窮如此。強哉矯不回。浩然留正氣。魂魄想歸來。

濟寧

鴻爪重來此地留。清波依舊遶城流。天邊又見初弦月。泆上終誇第一州。水引魯橋回玉帶。碑傳漢隸擗銀鉤。尋常那敢輕題句。子美南池太白樓。

杜文貞公祠

森木鳴蟬八月涼。拾遺游跡未全荒。中書落筆才真壯。賓客諸侯老更狂。直欲許身追稷契。何曾譚藝薄盧王。南池再拜瞻遺像。宛到成都舊艸堂。

南旺

四面皆成浸。中流貫一河。民居編葦易。生計捕魚多。打棗秋霜煮。懸鐙夜舫過。尙書遺澤在。廟貌儼巍峨。

分水廟

十夫邪許舌唇乾。挽索長嗟上水難。不道順流元有日。試從分水廟前看。輕颿如箭激漣淪。下牖開頭捷有神。好語來船莫相妬。明朝各自順流人。

衛河

順水拏篙捷。乘風挂席便。漸移雙隻楫。默數往來船。岸柳秋仍綠。沙禽晚欲眠。河流元自濁。不礙月長圓。  
古詩

治生無良方。要取纖嗇善。不見東家翁。起富百千貫。幼小歷辛勤。到老腳猶健。兒孫漸頹惰。蚤眠起常晚。婚嫁選高門。煩費不知限。產分食指多。歲率恐無羨。乃逸侮父母。空使識者歎。

新隴故鬼冢。古屋今人居。百年一小劫。艸木更榮枯。當其快意時。自詡智有餘。錢刀身外物。偶爲我之儲。人滿天所概。封殖徒區區。子孫已難保。勿嗤它家愚。

東家選入官。西鄰試登科。側聞長老言。祖父積善家。一朝遽自大。輿服相矜夸。內史固貴人。里門肯下車。英特縱邁昔。行義恐不加。世情見爛熟。聊付一笑呵。

伊尹世所師。與人靳一介。取之胡不然。多多母已太。子母算無遺。尺寸得始快。忍斷友朋交。不念骨肉愛。疏傳飲幾何。和嶠癖可怪。老至耄將及。蓋受孔子戒。

楊邨道中

岸岸垂楊萬縷斜。輕陰日午不飛沙。只疑白浪如銀湧。十里秋風蕎麥花。

題王雅宜借銀券

文云。立票人王履吉。央文壽承作中。借到袁與之白銀五十兩。按月起利二分。期至十二月一併納還。不致有負。恐後無憑。書此爲證。嘉靖七年四月日立票。

人王履吉押作  
中人文壽承押。

艸堂貲待王錄事。少米惠乞李大夫。分人以財今已罕。稱貸保任古有諸。詩人多窮乃往例。四壁蕭然了無計。雅宜山色難療饑。下策區區憑約契。誰其借者袁與之。白銀五十無零奇。萬息二千一歲率。貨殖之傳寧吾欺。年月日子紙尾壓。歲暮責償應不乏。生平恥食豪家鯖。此來卻費山人押。風流寸楮偶流傳。筆法圓勁鍼裹絲。好事嗟賞歸文休與趙凡夫評。估一字直十千。褚先生客馬少游。此帖爲吳中馬上舍紹基所藏馬生寓褚學士邸乞我作詩述其由。歲將暮矣我亦愁。有臺逃責招我不。

題沈東田觀察小像

調御元無相。猶龍患有身。信天心是易。行樂氣常春。山以靜斯壽。梅因清益新。當前生意滿。落落寄吾真。靜裏日如年。春來樂事便。夢知蕉鹿幻。戲任紙鳶牽。曉撰青藤杖。閒浮藥玉船。行窩隨處有。觀物悟先天。題箕僊畫爲曹慕堂給諫作

列僊逃人間。無爲得自在。云何爲物役。毋乃洩天絳。前身筆墨緣。結習了不悔。促迫見能事。淋漓絢異采。胸中出邱壑。意外藏傀儡。遙山翠列眉。繁花紅綻蕾。武陵本人世。此景不我給。黃門偶得之。寶于珠百琲。色相真卽幻。達人視齊等。多改切畫廚慎藏弄。莫學狂顧愷。

臘八日同曹習庵編修吳白華侍讀陸耳山宗人集趙實君齋消寒小飲卽席口占索和

車輪嬾逐軟塵忙。官意文情兩欲忘。隋書李孝貞傳官意文情一時盡矣不速竟來容惡客。無何且飲卽寬鄉。鋪糜大勝盤

游飯。啣酒兼呼般若湯。招引吾儕相暖熱。詫渠元叔未空囊。

翼日諸公和詩未到疊前韻催之

聽鼓應官有底忙。會依真率約無忘。身藏人海翻成隱。酒遣愁魔別是鄉。只愛澹交深似水。不知世味熱于湯。諸公才大皆詩伯。好句先催出錦囊。

同人約爲詩會遲而未果習庵疊前韻見示依其數答之

身閒心卻爲詩忙。結習應嗤老未忘。臘盡正宜催歲課。交親還似在江鄉。霜肥鐵腳堪成鮓。冰凝高芽好按湯。便擬清譚消永日。從來無底是書囊。

黃山谷詩書囊無底譚未了

輕塵弱艸百年忙。自愛垂名久不忘。中酒幾曾妨學道。著書何必待還鄉。聯吟韓愈應招夢。雜體江淹或擬湯。我欲致師慚思涸。匹如漉水壅沙囊。

題寓齋壁疊前韻

瑾戶窮冬了不忙。異同堅白辯都忘。身隨候鴈重爲客。語類籠禽尙帶鄉。故友漸稀星向曙。妄心已去雪消湯。一家長物休嫌少。羞澀猶存舊日囊。紫薇司諫校閒忙。渴睡希夷一覺忘。大自在能參佛地。無何有可認吾鄉。三冬粗足撐腸米。甲夜先溫洗腳湯。算計平生差受用。東坡居士腹如囊。

再題寓壁仍疊前韻

四十餘年日月忙。蚤衰容易事全忘。推排自媿稱前輩。諧謔偏欣道故鄉。且住爲佳嗤望蜀。徒勞無益莫揚湯。如來慧眼看能破。未必愚公讓智囊。

丹黃塗乙勘書忙。掩卷先愁過目忘。賦別久枯江令筆。說經欲到鄭公鄉。古泉汲井憑修綆。活火煎茶候沸湯。杜左和錢均是癖。休將使腹傲空囊。

鼻端觀白怕心忙。煩惱歡愉要兩忘。形影互嘲皆妄相。神僊可致有真鄉。滑甘且試青精飯。峻利休嘗白虎湯。康濟一身吾已足。千金肘後檢方囊。

一冬何事夢偏忙。梅筍江南思不忘。百里近游船當屋。三農活計稻爲鄉。澆花特地儲新水。薤艸隨時利熱湯。聞說林檎栽幾樹。秋來結子定盈囊。

得家書知後圃新栽林檎幾本林檎俗呼花紅

柬習庵

款門剝啄不辭忙。坐久譚深主客忘。甘井汲泉宜勿幕。習庵寓甘井街官園種菜只如鄉。予寓官菜園上街校書君正

然藜火。病齒吾方呷藥湯。卅載光陰敲石過。兒時記賭紫羅囊。

傳依縛律枉多忙。挂角羚羊迹要忘。誰似公才誇八斗。真看詩老出吾鄉。蒸砂千劫終非飯。薄酒三鍾卻勝湯。攻短自來須苦口。刀圭爲我啓行囊。

曹劍亭刑部和韻見贈卽奉答

餽歲人間作意忙。先生閉閣坐來忘。兩篇觀物心中易。一枕游僊夢裏鄉。老手詩真如啖蔗。庸醫藥莫試煎湯。熊羆譚笑居然卻。十笏清齋倚隱囊。劍亭疾初愈

二十二日吳杉亭舍人招同褚鶴侶刑部蔣漁邨編脩陳寶所給諫小飲疊前韻

行廚真訝咄嗟忙。剪燭西窗話不忘。但願同心常聚首。何妨異縣更它鄉。吟堪度日頻敲鉢。熱不因人自造湯。門外飛沙寒刮面。欲從質庫檢衣囊。

答嚴跂堂和韻見贈之作

黔南薊北馬蹄忙。踏雪飛鴻意未忘。暮節無聊惟索句。才人不遇例思鄉。談嘲顧我真如朔。儻葛憐君略似湯。一盞酌來相慰藉。毛錐那得久藏囊。可怪詩成擊鉢忙。把來過日不能忘。半空真見華嚴閣。六出爭奇戶牖鄉。力厚似斟缸面酒。味甜欲嚼菜羹湯。求魚自笑先投蚓。引出人間罟百囊。

己丑除夕疊前韻

九陌喧闐爆竹忙。過年俗例未應忘。北來幾月俄除夕。南望停雲是故鄉。繡襖癡兒能覓栗。青裙小婦爲調湯。屋租米券都償了。壓歲錢猶足一囊。

一夜偏兼兩歲忙。春風如候幾曾忘。癡獸不資甘遠衆。慈儉能持欲化鄉。促坐共圍爐炭火。延齡預辦粉團湯。元日食粉團。吾鄉謂之百歲團。只愁才減年徒進。食粟區區爲革囊。

竈馬桃符遞換忙。迎新推故了相忘。艸元多暇官知冷。泥飲相邀士有鄉。習嬾漸如三起柳。療貧終少十全湯。祇應无譽仍无咎。日玩羲爻六四囊。

矻矻窮年爲甚忙。文章報國意難忘。遺經獨抱真奇貨。破硯重磨當狹鄉。壯不如人思炳燭。行求無悔怕探湯。開春欲到琉璃廠。購取奇書滿一囊。

次韻嚴跂堂正月三日對雪

聞君逃禪學迦葉。不作佛助驚蛺蝶。苦吟瘦生生未攝。險語偈人和韻疊。我窮堅壁兵不接。詩腸十日稍安貼。齋空法喜爲妻妾。苦行如僧少度牒。今日何事手揩睫。示我新詩笑浮靨。春三日雪盈尺浹。曰大有年紀瑤笈。當甲如荼萬夫讐。真妃攜從畫出獵。六合瀕洞一足涉。大慈布施倒囊篋。令嚴不聞人語喋。詩人舌耕六籍髓。失喜滿酌三升臘。一身康濟陰陽燮。搖筆千言觀者懼。句奇格變書之篋。令我目眴心以愜。彼盈我竭欲頰頰。信手答之倚牀櫟。技癢不禁破械輒。我詩可棄履中屨。君才有用劍上缺。春風馬蹄行蹠躩。勿作平原乞米帖。

跂堂和予詩兼訂春游賦此答之

此身何似舟一葉。了識非周亦非蜚。聊以詩酒自調攝。憶昔下筆文采巖。自言古人武可接。少游風雨縱  
妥貼。不中退之作婢妾。陋哉斷獄取陳牒。盲人漫學離朱睫。嫖母強效西施靨。少作可焚汗背浹。君平僂  
骨注丹笈。洗默艸元語不響。暮作干詩當漁獵。奇外出奇趣日涉。白戰了不攜三篋。我頃多言悔喋喋。豆  
羹菜藿田父饁。敢匹炮羔祠伏臘。獻歲三陽和氣變。蟄蟲始振响雉懼。春雲如黛風如箠。與子偕游我心  
愜。一笑色動三豪頰。酒一偏提果一櫟。醉翁飲少一醉輒。有山且著謝公屐。有車莫彈馮公缺。過隙白駒  
去蹠蹠。觴詠千秋傳禊帖。

正月十九日同曹習庵編修張繡堂趙實君兩上舍游白雲觀次習庵韻

重陽之教起關右。一花七葉了無垢。神僊宗伯出善門。戊辰正月日十九。全真心欲長交梨。遺世肘仍化  
枯柳。干鐙焰向崑崙傳。一滴源從甘井瀏。馬譚劉郝漫齊名。秦華居然俯陵阜。兩朝徵召笑不應。卻著芒  
屨雪山走。老翁八十更何求。曷不杜門丹竈守。至人有道先濟物。忍令芸生死速朽。榮芝黃綺解避秦。區  
區獨善詎高手。僊家那有不死方。五利文成非吾偶。長春真人告元太祖云。有衛生之道。無長生之藥。阿誰辨僞妄。營營多事山  
僧想顏厚。釋祥邁作至元辨僞錄。詆毀全真。即今都人傳讖邱。了識長春道長久。招邀朋舊出城西。後車不載偏提酒。令  
威千歲幾曾歸。不朽之名乃真壽。白雲去住自無心。能解世人煩惱否。

寶刀行送龔梧生同年之官黔中

梧生藏一  
刀甚奇古。



寶刀千金淬鸚鵡。丈夫出門萬里攜。四更月黑白虹出。眼中貝玉真如泥。三刀佐郡才小試。百鍊平生成利器。生筩買犢相勸耕。循吏于今見龔遂。

送胡牧亭侍御南還

矯矯神羊柱後冠。曼容移疾遽辭官。賣文價賤窮休送。避債臺遙去尙難。半世艸元耽寂寞。十年薄宦耐酸寒。鄉園舊侶應相待。夢澤春風把釣竿。

二月廿七日同慕堂給諫竹君學士伯思戶部登陶然亭

瀟灑閒亭子。登臨便不同。人來春樹杪。山落酒杯中。艸細纔抽甲。池枯不滿弓。江鄉當此日。桃杏已青紅。

哭翟舍人均廉子乙酉典試所得士

才望雄三浙。文章博兩官。瘦羊終澹泊。小鳳亦清寒。鵬自培風久。鮎偏上竹難。侏儒應笑爾。長飽一囊餐。祿命妨文士。精神憶苦吟。空羅胸列宿。終欠腹三壬。管輅言腹無三壬不壽之驗自牖言如昨。居盲病已深。祝予何太

急。慟絕不成音。

題候官林氏所藏漢甘泉瓦拓本

貴賤世無常。不見金與瓦。尋常博者注。棄之等土苴。一枚傳自漢。萬金千勿假。古色敵敦彝。篆法證蒼雅。誰云搏埴工。恐是造化冶。古人一物微。製作不苟且。曰長生無極。云漢并天下。款識避雷同。吉語當祝嘏。

香泉強解事。毋乃所見寡。陳子文疑長生未茂陵甲帳空。銅僊淚盈把。博物不逢張。千年委山野。文孫寶手澤。勿替引來者。瓦全神所護。金蠶我姑舍。翻怕多財翁。笑汝癖成瘕。

題吳香亭鴻臚古藤詩思圖

海王之邨近書市。新城尙書曾卜廬。藤花一本手所植。歲久翦敗惟枯株。神明扶持終有力。生意宛轉枝頭蘇。好花應厭俗客對。風流今又逢鴻臚。追逐唐賢究三昧。新詩解脫如花腴。猶嫌三春花事去。更倩畫手紀以圖。古槐修竹靜者居。置身花下晨夕娛。綠陰滿架清有餘。封殖無忘前輩譽。明年花開可痛飲。折簡行復招吾徒。比鄰更呼程舍人。謂魚相於聯句窮朝晡。此藤此屋清不孤。佳話欲繼匏菴吳。吏部官廨

植庵手

同曹慕堂給諫朱竹君學士陳伯思戶部史文量孝廉曹申之上舍爲西山之游出郊宿二老莊和竹君韻

探春有伴靳從驂。潑眼山光削碧簪。心地偏應更遠。味于交澹不求甘。竹谿耽逸人仍六。蕉葉澆愁我亦三。城市漸遙巖谷近。此中容得是清譚。

張忠烈王輔墓

高冢似祁連。旁可萬家聚。蒼涼閱人代。忠烈增跂慕。百戰起將門。三台贊政務。偉哉定南交。富良一葦渡。

縛會如縛羊。繫頸逮婦孺。疆理二十年。木壞中自蠹。空聞捐之議。盍思鄭吉護。可惜東西楊。一著偶投誤。事往那可追。墓田了非故。猶存翁仲立。尙識夫人祔。夫人吳氏劉氏祔葬石刻敘宗支。昭穆粲然具。歐表例可循。世系足推溯。摩挲恭靖碑。忠烈子懋碑在其右數十步有碑題云特進光祿大夫左柱國太子太師追封寧陽王諡恭靖張公神道碑梁儲撰文李鏗書文字中矩度。傳鈔病未能。悵望斜陽暮。

山行疊前韻

仄磴崎嶇不礙驂。雜花瑣碎也宜簪。雲來天外當頭合。泉在山中徹底甘。陟險直須作氣一。避喧已似伐毛三。十年結想今纔到。目擊端倪勝耳譚。

歲月堂堂隙過驂。清游差喜盍朋簪。只除佛地境皆俗。每到山行心欲甘。驃騎名真輸第五。瞿曇義且叩前三。捫蘿恐有遼金刻。好撫遺聞入筆譚。

戒壇

大衆同回向。天神護此壇。光明心不昧。堅忍力須完。薤艸根宜斷。傳薪火自鑽。宣尼箴四勿。吾道亦先難。傳戒從心幻。開山記法均。結壇還似昔。成佛定何人。清聲諸天曉。喬松太古春。安心雖未竟。三宿亦前因。

和竹君戒壇讀遼法均大師碑因弔學士王鼎三十韻

爲禮司空塔。兼鈔學士碑。殘編猶可讀。遺行已難追。博物雄燕涿。通經習禮詩。太寧蜚遯日。上已祓除期。

下坐羣相誦。揮豪信不羈。識山嗟肉眼。脫穎借毛錐。策射清涼殿。名臚白玉墀。奪標先獨占。紀歲兩存疑。

遼史道宗紀清寧八年六月御清涼殿放進士王鼎等九十三人本傳則云清寧五年擢第與紀異初捧州僚檄聊牽縣令絲才名宜館閣祕典預論思汲

黯言常意宣公政屢咨忤時官未進罵座醉偏癡騷客終遷謫清流被撈笞孤寒經歲甚雨露一朝施果

復鑿坡舊何曾鳳德衰暴風驚忽舉臥榻正無敵忠直神惟佑詞章世所推珠雖百琲失豹偶一斑遺幢

署優婆塞寺有石幢二其一題云受戒弟子優婆塞范陽王鼎製文銘徵壇主師簡栖文品貴法護筆蹤貽刻倩王惟約求容釋裕窺

焚椒書可匹礪畢妙難訾椎拓應千本模糊恐異時舊聞探墜逸正史證階資開國分封渥丹文制誥知

勳纔都尉轉賜許佩魚垂碑題馬鞍山故崇祿大夫守司空傳善薩戒壇主大師遣行碑銘并序朝議大夫乾文閣直學士知制誥充史館修撰騎都尉太原縣開國子食邑五百戶賜

紫金魚袋王鼎撰并書稽古榮非忝逃禪俗漫嗤元言譚吼石密戒受毗尼佞佛何妨達匡君要有裨馬鞍峯頂望

懷古且支頤

姚少師祠

灑灑泉流檻外分披緇入定戒香熏空登北郭詩人社難上西山老佛墳好殺共和尙誤著書賴有故

交焚依然病虎形容在曾否聲名直半文少師自贊畫像云這箇禿廝忒無仁聞名垂千古不直半文

夜宿潭柘寺用石刻金僧重玉韻

泉清山瘦氣如秋假榻精廬臥亦游夜靜與居惟木石心忙難伏似龍蚪月篩叢竹搖空影風入高松響

急流一室了無增減相。此身今欲號浮休。

妙嚴公主拜輒

相傳妙嚴爲世祖女。于史無據。恐是傳會之詞。元時宗女皆得稱公主。不必帝女也。

昔聞元公主。苦行何精進。六時五體投。一輒雙趺印。沁園自言富。視之如朝薜。法輪得慧珠。愛河斷利刃。單極幹可絕。受礪石欲磷。區區搏埴土。踏破存者僅。至人得魚忘。凡夫刻舟認。饒舌紫柏師。寶爲山門鎮。匣藏尙宛然。曾費宮錦襯。當時宗室女。下嫁魯趙親。去聲各冒貴主稱。內朝鴈行覲。詎必出辭禪。齊諧勿盡信。

僧房偶題

漸綠春來艸。常青屋裏山。門前無垢水。不肯到人閒。

潭柘寺

四圍山簇青蓮花。蓮中之的法喜家。篋裏龍子自來去。殿頭鷓鴣吻猶含呀。泉聲無盡波羅密。樹影可怖鳩盤茶。盧溝橋只一舍近。行人不記恆河沙。

三月廿二日同錢宮詹籜石紀太僕心齋朱學士竹君褚學士左峨曹給事慕堂馮刑部君弼入法源寺觀海棠偶見旁院牆腳支翁方石有異撤而視之則遼大安十年觀音菩薩地宮舍利石函記也心齋有詩紀其事卽次韻

長安春可游。賞花到佛寺。至德靈芝書。景福南敘記。妙跡屢摩挲。響榻勸好事。卓立尊勝幢。石函列其次。

復有党竹谿。令史述建置。寺有遼薦福大師尊勝陀羅尼幢記。磁州司馬劉贊撰。又石函四面題字。天水蕭甫書。金禮部令史題名記。大定戊戌八月黨懷英撰。皆昔人所未著錄。予數年來先後訪得之。

劫火了不焚。人天護初地。得隴復望蜀。吾儕心已肆。運甓覆苔石。果得義中字。想見揮豪初。淋漓墨瀋翠。一萬舍利藏。卅二相好備。檀那百千家。合掌歎神異。金錢巨社輸。宮商法螺吹。皆用記中語。事往七

百年。誰識聰辨智。記文燕京管內左右街都僧錄崇祿大夫檢校太師行鴻臚卿聰辨大師賜紫沙門善製所撰。自大安十年甲戌至今六百七十七年矣。昇來鎮僧寮。鈔取

入書筒。紀年古多同。舊聞或誤識。劉同人帝京景物略題作金大安十年。考金王永濟紀元大安止于三年。此記乃遼道宗時所刻。非金刻。結習文字閒。淨名

毋我議。

琉璃廠窰戶掘土得古墓棺槨朽盡而骨法殊異視其誌石題云大遼故銀青崇祿大夫檢校司

空行太子左衛率府率兼御史大夫上柱國隴西李公墓誌銘撰書人則不可考矣督廠工部郎

中孟君濬令改埋于故兆東二十步并其誌瘞之世遂無拓本李公之名不見于遼史因撫誌文

大略作詩以遺考古者

琉璃廠前工搏埴。昌志切十夫畚土土委地。捨畚漣洏見枯齒。棺槨不具骨法異。其旁片石誰所誌。大遼李

公官闕備。厥諱內貞吉美字。漢前將軍出所自家。於媯汭世有位。舉唐秀才祕書試。試主簿丞清淨治。大

聖南牧六師肄。向化請命隸下吏。屬珊帳下蕃漢騎。廿萬精兵可敦置。中丞提舉金魚賜。左右僕射新寵

被述蘭王燕南面寄授以押衙心膂倚戒得抱公輸忠義專城薊州寬惠莅都監銀冶廉直遂檢校司空  
三台致終于太子左衛率先燦殷氏三子嗣繼室以何有男二各各通顯周行置保寧十年月夏季行年  
八十恆幹棄葬之京東石室闕黃腸便房久摧毀白日忽照長夜寐歲閱八百隙過駟富貴聲名竟何事  
改埋且免烏鳶飮猶勝溟漠堙名字吾生金石有奇嗜恨未醴椎入篋筥遺聞可補隆禮志傳與好事紀  
原委

題候官林氏陶觔硯銘册子

蕉葉青花甲乙分故交耐久更能文想嫌結綠縣黎俗別署頭銜萬石君  
鐵畫分明手自鐫名山藏弄耐千年怪它歐趙搜金石椎榻何曾到硯田

送江子九之官安慶

隆冬風雪冷僕夫將載馳送君路三千游宦皖水湄君才故磊落循良古爲師文章與政事能手兩兼之  
仕途如黃楊逢閏一寸虧別駕古通守職閒秩未卑衡陽君舊游手捫岫嶺碑天柱亦南嶽山靈緣在茲  
振衣可一登荆揚儼列眉石壁剔落蘚恐有龍眠詞見彈太蚤計令我朶兩頤人生有幾別後會復何時  
君爲江淹賦我媿錢起詩

游善果寺

白紙坊前青豆房。當年賜額乞貂璫。

明天順八年。尚膳監太監陶榮。題請賜額。禮部給劄付。石刻尚存。

修廊搏換鬚眉古。東西廊。塑五百羅漢。明孝宗時。

內官監太監姚訓所造。

老幹支離檜柏涼。豐碣未磨禮部劄。荒原誰認故侯牆。

碑載寺四至。東至官路。西至歸依山。地南至慈仁。牆北至太平侯牆。

桃一樹開旋旋落。瞥眼春光有底忙。

### 法源寺看花

丁香花落海棠殘。火迫春風到牡丹。冷笑山僧忙底事。栽花只博別人看。

### 法源寺觀牡丹因懷琴德

精藍地近一牛鳴。每到花時幾度行。天與色香矜智慧。人從開落悟虧成。老僧底用譚優鉢。長者真須學淨名。蒲褐先生無恙否。何緣共坐話無生。

### 題黃星槎所藏漢華山碑拓本

江夏過虢我。袖中有西嶽。六丁取不盡。古色尙斑駁。一飯先鍾梁。三舍後斯邈。森森劍鋒藏。苕苕禾穎擢。美女簪好花。壯士橫長槩。白象露齒牙。蒼龍吐芒角。掉尾魚戲波。垂頭鶴俛啄。依稀六百字。字字玉在璞。杜遷石已碎。郭香文未剝。當年松譚閣。此碑舊藏宛委山人郭宗昌松譚閣後。歸王山史。嘯月樓顧亭林所見。即此本。薇露手親濯。侍史妙裝潢。牙籤自追琢。嘯月古逸民。顧榮共商推。手書付官奴。恐溷俗子濁。山史題册尾。戒其子非承我命。不得令人輕爲題跋。歲久罕益珍。性癖果而確。風流今猶昔。嘲笑任蝸鷲。院體行楷書。我見輒欲設。借君羅紋硯。試一臨池學。



題惠松厓徵君授經圖

漢儒說經重詁訓。授受專門先後印。三代遺文近可推。大義微言條不紊。後人鑿空誇心得。一筆欲將鄭服擯。虛譚名理訶玩物。陳義甚高詞已遁。我朝經術方昌明。天遣耆儒破迷悶。紅豆風流手澤貽。三世大師清望峻。正誼常睇董仲舒。識古共推劉子駿。尤長義易泝九師。輔嗣說行存亦僅。郢書燕說一例芟。墜簡逸象盡日捃。畫吞仲翔洵已足。論持趙賓兼有切。苦心孤詣識者誰。後有子雲或能信。禮堂寫定不得傳。令子趨庭萬人俊。羣書暗誦才翩翩。家法相承語諄諄。青紫拾芥何足云。樸學千秋宜自奮。吾生亦有好古癖。問奇曾許摳衣進。廿年聚散等浮漚。宿艸青青老淚攬。展圖彷彿見平生。苦井長智幾時澹。黃門精熟繼長翁。試聽它年石渠論。

爲袁春圃給事題苦瓜和尚餘杭看山圖

連蜷不了幾行樹。辣闢無根千尺岑。一洗人閒甜俗格。丹青如見苦心心。

題沈椒園前輩松亭讀易圖

先生晚好易。韋編百過讀。兀坐古松亭。清吹風謾謾。凜然歲寒姿。勁直凌凡木。三百八十爻。取象各有族。白茅藉无咎。枯楊華非福。失據蒺藜危。得繫苞桑卜。乘剛怕葛藟。善柔嗤萑陸。松耶何乃遺。疑義費往復。善易象可忘。至理思爛熟。科上槁奚爲。堅多節所獨。抱經究終始。洗心以自淑。行藏三十年。回首一信宿。

漸鴻瞻羽儀。賁趾脫輪腹。道協敦良九。名取安節六。磊砢後彫心。莫逆交不贖。經師多上壽。額手爲公祝。

病目廿二韻

百目卅月餘。屏葦疏酒醜。晝常怯窗明。夜苦辨星皖。觀火光忽岐。迴風涕偏漚。眇凝春麥芒。淚流浙米漚。綠瞳欲掩珠。赤眚已侵販。漫天作謝絮。平地起秦棧。朱碧只一概。金沙莫分揀。看書春月翳。作字秋蛇縮。視鳥真如鳥。寫弗卻類弗。約僮宥使了。課兒昧瑟憊。漸近杜欽盲。空羨華元睥。欲尋龍樹方。安得金鑿刻。平生耽文字。藝林志飛獲。分無蛾綠餐。徒勞汗青篋。多記精日銷。玩物顏有赧。天教息吾黥。日使良其限。五蘊先斷色。萬事難挂眼。方圓河洛圖。疏密麻沙板。相對了不知。付之一笑莞。象罔傲離朱。申徒薄子產。戒慎所不睹。斯道本至簡。渾沌未鑿初。今吾豈異撰。

贈伊宛中孝廉

本蒙古伯都氏改隸滿洲古北口提督謚愷僖布蘭泰公之孫

之子名家彥。風流數妙年。譚經探義海。搜句出心田。老馬途能識。神錐穎最先。中郎枕中祕。欲待仲宣傳。

鐙下作

一鐙熒熒光。欻然散數點。漸遠光益多。百道飛電閃。外環暈幾重。著色閒濃澹。殷紅日杲杲。蔚藍波潏潏。心知眼前障。欲以一手揜。五采更交射。不絕始燄燄。夜夢神告予。妄相去以漸。莫漫投刀圭。最忌弄鉛槧。幻影非有著。真精宜自斂。譬之泥在水。水激泥不瀦。又如雲掩月。雲過月不染。復其見天心。我圭本無玷。

圓桌

會記瑤臺聚八僊。方桌一名八僊桌。模稜新樣阿誰傳。剪鐙真快團圓話。讓坐無妨左右旋。移到中庭天似笠。分將半面月初弦。瓜廬與爾差相稱。聲叟從今莫惡圓。

暖炕

熾炭中央氣四通。先生真欲號冬烘。未妨厝火仍安寢。且耐薰心略禦窮。上座試安木居士。炕邊以木爲之。新守土司空。江南有客酸寒甚。伏枕偏愁內熱攻。

羅兩峯鬼趣圖

人言鬼可憎。君獨觀其妙。觸于目所遇。審厥象惟肖。巨室可偃寢。馳逐誰所召。昏暗鎖自縛。安得慧鐙照。六趣理本同。執著互相笑。奇詭到筆端。似聞談出訛。書家艸聖難。此乃書家之艸聖也。豈有不善真書而作艸書者。苦心世莫料。瞰室非爾防。一任梁閒嘯。

上海图书馆藏书



A541 212 0006 16348

